

Jonî Yagaala Tewaanya' Jonî yîdavakesî.

Gotîyarîne Yagaalyai (Jizaazai)
mwaalîkerînesî.

¹ Sinnawî kîgaakuna Kwaaka dava' mima'nyawî Gotîyarîne Yagaalyai mwalyaakewînyî. Nabaai, Gotiyai mwaalakewî gamînyawî Gotîyarîne Yagaalyai mwaalî'. Gotîyarîne Yagaalyai sahwai Gotiyai.

² Sinnawî kîgaakuna aayawîdaasî Gotiyalyî sahwai mwalîbainyîna yaakelyî. ³ Gotiyai sara kyawîra' sahwai yuyangî sara wakînikengî. Aane pîrî' kîrî' gamî saba yîma'naka' mî'. Aawa, sahwai wakakengî yuya sa.

⁴ Sinnawî sagaa' sahwari gaalyabwi warakelyî. Gaala sabwî a'mwe yuyaraavîre Baakelyî. Yînika sai a'mweinaavîna kunya tewaanya yawîrya'ne nejaavînikerîna. Kunya tewaanya yawîrya'ne wîjaavîna kaneya' baaka savî nayaa mwaidanyaine. (Gotîyarîna nayaa yawî'daanyaine.) ⁵ Saburîdaasî jîhînya kayaa'nanyaburî Gotiyare baake' wannyîna. Nabaai jîhînya sa' baakevî mwavîlayînikesî.

⁶ Gotiyai yawî'na "A'mwera baakevî mwaabîka!" yawîraka sinnawî a'mwerî wîdaasakelyî. Sai Jonî (Bavîtaazîya Yadei) wîdaasakelyî. ⁷ A'mwe sahwai jalîkurakya'nei bîna. "A'mweraavî a'mwengî Jizaazai Baakerîna

wi'jalikurakana!" daka wi'daasakei bina. "Kadika wi'napiji Naangeri limwagapika!" dakei bina. ⁸ Joni gami sai Baakei mika! Aawa. "Baaka nawi'nya sarina jalikurakana!" dakelyira. ⁹ Di'vi Baakei Kwaaka davakina walaabaka a'mwe gazainazainaavina Baaka nebulya'nanyalyi. A'mwe yuyainaavi kunya tewaanya yawirya'ne nejaavadei.

¹⁰ Nabaai, Kwaaka davaki sai bamwaaina ya'. Sinnawi Gotiyai kyawira' sahwai Kwaaka dava' sara wakina. Sara wakina yaka bamwaaina kya' kiri' Kwaaka davaki mwaalyara gami sahwari myawiramaari yesalyi. ¹¹ Gannya Anga Yizirelina bina yaka bamwaaidisi gamijiyara mamaari. ¹² Sara yina yeva mamaari kye' kiri' a'mwera pwara "Nebulyasira. Naangelyira," deva maarina ye'. Maarina kye' sai yuya saraavina gannya diraginyabwi wi'jaavina ya'. Gannya diraginya sabwi sahwara Gotiyare kaimiraayara yima'nya'nebulyi. Gami sahwarinaji gamire yayavinaji limwaga'divisaraavinebulyi. Yi sahwara mudikera yima'nyina ye'. ¹³ A'mweraavire yisavakaavidaasi tawengina mudikera mima'nyina. Aawa. Kilaakejikiya sidusaburi mudikera mima'nyina. Aawa. A'mweraavire diraginyavi mudikera mima'nyina. Aawa. Gotiyai gevwi yawi'na "Sahwara nimire kaimiraayara mudikeraavi yawakinima!" kadini' yima'nigavinikengi.

¹⁴ Gotiyarine Yagaalyai a'mwe kilaa'nakei yima'nyina yakei neminyawi gannya seli ange' yiladaakuna. Gamire kilaakejiki wilamwaaina

yîna yada tinna dara wangano' "O, Nawî'nyai diraginangei daaka!" Sara dadaa gamîre byaan-nyavî tinna wangano. Ganîmaangerîdaa'nyai gavei yamakînarîkabaabîta byaanna sasi. Sahwarî yuneba yanga gaimwangebulyî nebulyabulyî maanga yeku'nîkelyî.

¹⁵ A'mwe Jonî gamînyîna nejalkurakada jaka dara danganna "A'mwe dazarîna yîhîthelyî. Nîmî Gotiyare yagaala kyîhîthîwa dîviya pwai bozî yîhîzîwaakadei Naangelyî. Nîmî sahwayînyî mîka! Nîmî maalîkeinyîra. Nîmî mîma'nyagaa' kuna mwalyaake'na Sînnawînyalyî."

¹⁶ Sahwai maanga yeku'nîkevîdaa'nyî nemî yuyainaavîna wana nawî'nya nejaavade'na tewaanna mwaaiho. Nemînyîna gamîre yanga gaimwagaimwange' nejaavada nejaavînkelyî.

¹⁷ Sare' Gotiyai kujaa' Ne Mozîzai Gotiyare Kîwînya tewaanya' wîjaavîna. Wîjaavîna neyînîke' nemînyawîna Gotiyai Kîraazîtiya Jîzaazari wîdasaabîna. Wîdasaabîna kyîni' sahwarî nemînyîna yanga gaimwangebulyî nebulyabulyî yîma'nînîke'nanyî.

¹⁸ Gotiyarî a'mwe Kwaaka davakîyaina wangadaanyarîna mî'. Aane pwai kwai tinna mwanganyî. Aawa, Gotiyai gavei Ganîmaangeryaba kusîmagîna mwaalîkei nemînyî yîbwarîdaakwia neyîkelyî.

*Jonî a'mweraavi aalya'yadei wîdînîke'nesî.
(Matîyui 3:1-12; Maakî 1:7,8; Lukî 3:15-17)*

¹⁹ Jonîmîre jalîkurakya darestî. Jonîmyawîna Juyara Anga Jeruzaalemi mwaalya naangera a'mwe pwaraavi wîdaasîna. Gotiyarîna

mubithika yira'divisaraaviji Gotiyare Angevi widaayadivisara Livaayaraaviji widaasina. Mi'na widaasina kye' wina yina yeva Jonimi yiwaara'na "Gimi bewaiginaka?"

²⁰ Yiwaara'na kye' Joni "Yagaala sa' madiwina!" myawiri yaka aangyagaala nebulya' kave nayaa widina "Nimi Gotiyai Nyidahilakyaaka Kiraazitiyainyi mika!"

²¹ Sara yiwaara'na "Nabaai, bewaiginaka? Ne Yilaajaigi daaka?" Sara yiwaara'na kye' Joni widina "Aawa, nimi mika!" Sahwara widina "Gotiyari nayaa wi'nanejiwaakade naangerina yemwaaiho sahwaigi daa?" Widina kye' ma'maa'na "Aawa!" ²² Sarevidaa'nyi gaminyi widina "Dinedana! Bewaiginaka? 'Nedasiwaasaraavi ja'nawija' nayaa widaana!' dona gyiwaara'manigo. Sahwaigi giminyina be yagaala dimaniginavaka?" ²³ Widina kye' sai widina "Nimi sainyi dareinyira

"A'mwamaayaba maanguraayainyi jaka widangadinyainyira.

"Naangei tuta tewaanyavi wawode'na

"Tusa' yida'na nayaa jamakwila!" ' ,

Wi'nawijiwaakya Aazaayai niminyina sara dinikest."

²⁴ Yiwaaraveveraavi a'mwe Periziyara widaasina yesare. ²⁵ Sahwara gaminyi

yiwaara'na "Githahilakinika Kiraazitiyainyi mika! Gimi Ne Yilaajaigi mika!

Wi'nawijiwaakya naangerina yemwaaiho sahwaigi mika! Sarevidaa'nyi a'mweraavi aalya' baa'na yivanigina?" ²⁶ Joni ma'maa'na

"Aalyavi bavitaa'ya' yadinyainyi. A'mwe

pwai sariminyaba tinnyaba daavikeri myawiranganyivanigava. ²⁷ Gamî sai a'mwe naangelyî. Sinnawî nimî biweinyî, sahwai di'viyai yarai bathei naangei mwaalika. Nimî gaimwange'na naangere kwaari'masivilya' yirapurideinyî mika. Sahwarîna nimî a'mwe nawî'nyainyî daaka!" sara wida' Jonî.

²⁸ Yuya sa Aalya Jothanî kengihîrî Anga Betaani Jonî aalyavî bavitaaziya' yadaa'nyiyaba yîma'nyîna yakengi.

Jizaazai neminyîna balakerînesî.

²⁹ Mwanyagaa' Jonî mwaalaka Jizaazai bakerî tinna wanganaasîna yaka a'mweraavî wîdîna "Yîthaanyi, dazai Gotiyarei Sipîzipîya Diwînyala! Kayaa'nanyanna a'mwera sipîzipîyari tamîna yadivî' kwaraanyaba Gotiyarîna dîka nasî'na yadevaabi' sai Kwaakevakî mwaalyainaavîre kayaa'nanyanna marasîsa'na baladelyî. ³⁰ Sahwarîna yîhîthadînyalyî. Nimî biweinyî, divî a'mwei bathelyî. Nimî mîma'nyagaa' sai kuna mwalyaakelyî. Sai sinnawînyai Naangelyî. Nimî maali'keinyîra. ³¹ 'Boziyai Naanga kwarînera,' yawîrena gamînyî myawiranganyainyî. Aawa. 'Sahwarîna Yîzîreli'yaraavî yîbwarîdaakwîa'na yîma!' dena biwa. Aalya yîhyadînya savî dara jawîryide' 'O, sai Naangei daaka!' "

³² Jonî tinna mena bahanaraka a'mwe Juyaraavî wijalîkurakîna "Sîgunyavî Gotiyarebadaa'nyî Kuryai Tewaanyai kwaamîryaibîsai walaabîna yaka a'mwe sarî mwalîbainîkerî tinna wanganerînera.

33 Sɪnnawɪ gamɪnyɪ myawɪranganyainyɪ. Aawa. Bavɪtaaziya'na nyɪdasaabakei sahwai nyɪda' 'Dɪvi dara dangadeigɪnyɪ. Kurya Tewaanyai a'mwe pwarɪ bwalamwaaɪna yaja' wangana'gɪzɪ dara jawɪ'de' "Ai, sai a'mweraavɪna Kurya Tewaanyarɪ yanga wɪjaavadei daaka!" Gɪmɪ aalyavɪ bavɪtaaziya' jɪthe' sai Kuryarɪ bavɪtaaziya' yadelyɪ.' 34 Sara wɪdɪna nyake' tɪnna nayaa wangamweinyɪ yɪhɪzalɪkurakɪvanɪge. Sai Gotɪyare Gawaalɪvaangelyɪ."

Jizaazarera sɪnnawɪnyaraavɪnesɪ.

35 Mwanyagaa' Jonɪjɪ gamɪreraalyɪ sara ayaba daa'dapi Jizaazai kaanya yamarina. 36 Kaanya yamarina yada Jonɪ wanganaasaka gannyaraarɪ wɪdɪna "Yɪthaanyi! Sai Gotɪyarei Sipɪzipɪya Dɪwɪnyala!" 37 Wɪdɪna kya' Jonɪmɪreraai kadɪka wɪ'nyɪna yagɪlyaraai saraai Jizaazarɪ mɪdɪnna. 38 Sara mɪdɪnna yɪna yadaakɪlyɪ gɪnyɪma'naka saraai mɪdɪnaabɪna yagɪlyaraarɪ tɪnna wanganaka yɪwaara'na "Berɪ'na bɪ'manɪgɪla?" Saraai wɪdahi "Ravaai, anga garɪvɪ mwaaɪhɪna?" Yɪvɪruyagaalya' "Ravaai," yagaalya' "Nejɪwaakadɪnyaigɪ," wɪdɪnɪkesɪ. 39 "Ravaai, anga garɪvɪ mwaaɪhɪna?" wɪdɪna kyagi sai wɪdɪna "Kaanya bakɪlyɪ danganyɪla!" Sarevɪdaa'nyɪ gamɪjɪ wɪna yagɪla gannya anga mwaaidevɪ tɪnna wanganna yagɪla sagaa' gamɪnyaba mwaalɪna yagi. Bɪna yɪna yagɪlegaa' sawɪtɪrɪnyagaakɪ (4 kɪlokɪ).

40 Saraai Jonɪmɪ kadɪka wɪ'nagɪla Jizaazalyɪ wawagɪla pwai Edɪruyalyɪ. Edɪruyai sai, Saai-

moni Pitare gya'mwelyi. ⁴¹ Ediruyai sai sinnawi wina yaka Saaimoni gya'mwerina birikaanya yina yaka widina "Ai! Nemi Mezaayari mena biramaa'mwona!" Yaya sa' "Mezaayai," dini' "Kiraazitiyai." ⁴² Widina yaka Saaimonimi gaminyawinna makuna. Makuna kya' Jizaazai tinna wanganaka widina "Gimi Jonimire gawaali'ginyi Saaimonigi. Gimire yaya' Sipaaazai githivanigesi." Juyaraavire yagaala "Sipaaazai," Girikiyagaala "Pitai," aangyagaala "Silaangei," dinikesi.

Jizaazai Pilipiji Nataanyaliyi saraari widinike'nesi.

⁴³ Mwanyagaa' Jizaazai "Pwaraji Galilineinera," daka Pilipimi birina yaka widina "Dinyimidinaama!" ⁴⁴ Pilipi sai Anga Betizaaita mwaalyalyi. Anga saba Ediruyalyi Pitalyi sadaraai mwaaidisaba. ⁴⁵ Pilipi kadika wi'nyina yaka Nataanyalimi biramaa'na yaka wida' "Kaanyaka! Ne Mozizai kiwibukuyavi pwarina yida'nike' nabaai, Gotiyari wi'nawijiwaakyara sarina pikarya yida'nikevine sari mena biramaa'mwona. Sai, Jizaazai Jozepiyare gawaali' Naazareti mwaalyalyi." ⁴⁶ Widina kya' Nataanyali yiwaara'na "Naazaretidaa'nyara tewaanyara daaka! Savidaa'nyi tewaanyai dalyaabiwaka!" Pilipi wida' "Sahwaigi bwangana! Nebulya'na githiwana. Bwangana!"

⁴⁷ Nataanyali badaa'nyi Jizaazai tinna wanganaka sarina widina "Yithaanyi! Sai Yizireliya tewaanyalyi. Kwaasi yadei

mika!” ⁴⁸ Nataanyali savi kadika wi'naka yiwaara'na “Ni'minyina gara yawi'mwaana?” Yiwaara'na kya' sai wi'dina “Sagaa' Pilipi giminyina mabiriwakegaa' yita pihya kaavilyavi mwaaida'gi gwangamweiginyira,” wida'. ⁴⁹ Nataanyali wi'dina “Ravaai, Nejiwaakadinyaigi, giminyina diwa. Gimi Gotiyare Gawaaliki. Yizireliyaanaavi nemaremwaaidinyaigine!” ⁵⁰ Wi'dina kya' sagaa' sai wi'dina “Yita pihyavi mwaaida'gi gwangamwa, githiwe'na niminyina danyilimwamwaana! Sabwi maalikebwi, divi naangengi dangadengira.” ⁵¹ Gaminyi wi'dina “Nebulya' yihithivanige. Sigunya' basinadaa'dozi Gotiyare mamaayara ejeliyara A'mweraavine Kaimiraayaryawinna walaabina, yilaawina yadaapiri danganyideihilyira,” wi'dina ya'.

2

Anga Kena a'mwei kwala maarake'nesi.

¹ Yirika daryaai dariki Kwaaka Galili Anga Kena savi kwala maarya yina. Kwala maarya yina kye' tika munnevi Jizaazari ganaange' mwaalina yadi'nyi nabaai, ² Jizaazalyi gamirerari saraavi munne'na jivwaramaa'na. ³ Sara yina kye' munne' nyina yadaapiji aalya waainiya'na wigainyina yadaa'nyi ganaange' Jizaazari wi'dina “Aalya waainiya' maayarera.” ⁴ Wi'dina kya' sai wi'dina “A'mwe'gi ‘Sana sana ja!’ baa'na nyidiwaana? Nimi regaa' mika!” ⁵ Sara wi'dina kya' ganaange'

widaayadivisaraavi widina “Sara yihithathe'na sara jila!”

⁶ Juyara aalya yinyabwina wa'di'nyi si-aalitala atina ata puridaa'nyi nyidala kune warakengi. Aalitala gazasa' maanga kyeku'na' aalya naanga (80, 100 litaaya) di'na'nikesi. ⁷ Si-aalitala sa kune warake, sahwai widaayadivisaraavi widina “Aalitala sa aalya maanga yunebanna yeku'nade dimaradingikaabyila!” Widina kya' maanga yeku'nya'ne aalya maradingikina maradingikina kye' ⁸ widina “Aalya piri' yirapiji tika munnevi maremwaaidarina dumaryaawila!” Sara widina kya' makuna yeva wijaavina kye' sai yaamiji nyina. ⁹ Aalya sa' sinnawi aangaalya' di'na'di'nyi divi aalya waainiya' yima'nyina yinikesi. Yaamiji nyina yaka dina “Waburyasi. Waainiya da' gawidaa'nyavaka?” Sai myawiri yada sare'na widaayadivisara yawireva aalya wijaavina yesarera. Kuna myawiri yada miginyai taaya' maarakeri munnevi maremwaalakei widina “Kaajo!” ¹⁰ Widina yaka widina “Neminyina tewaanya yiwaana! Sinnawi a'mwe pwara gazarazara aalya waainiya nawi'nya' munne wijaavina yadivi' divi a'mwera waainiya naanga nadivi' nayaa myawiryaraavina aalya waainiya yirike' wijaavina yadivisare pwara. Sare'na yadinyaigi mika! Kwaigi aalya waainiya nawi'nya' navika yi'nadi'nyi, waainiya piri' mi'na kanwo divi nawi'nya' wijaavina neywaanyaiginyi,” widina ya'.

¹¹ Kwaaka Galili Anga Kena saba Jizaazai wijiwaainya'ne sa' yina ya'. Wijiwaainya'ne

sinnawînya' yakesî. Gannya byaanna diragînyabwi wîjîwaaînake'na wîjîwaaînya'ne sa' yakesî. Gamîrera naangebwi wanganeva gamînyî limwanna ye'.

¹² Mena yakegaa' sagaa' Anga Kaapanîyamî sabanna gamîjî ganaangesî gya'mwerari gamîrerari walyuna yeva yîrîka pîrî' pîrî' saba bamwaaina ye'.

Gotîyare Angevîna Jizaazai wawoke'nesî.

(Matîyui 21:12,13; Maakî 11:15-19; Lukî 19:45,46)

¹³ Juyara dîna “Aya kîgaa' Pari'ma'munne' naadera Gotîyai nemînyîna diragînna kavadaîhasamaryaa' yaasîwa'wawînya Yîzipî saba yagalya'mayaawo' yawîta'negaa'.” Juyara dîdaapi Anga Jeruzaalemi sabanna yîlaawîna.

¹⁴ Yîlaawîna yaka Gotîyare Angevî wîlîna yaka dara wanganake' “O, a'mwera bulîmakaawoyarajî sipîzipîyarajî kwaamîryarajî damubîvanîgava! Nîgwîa nawi'nya Gotîyarî wîjaaya'na nîgwîa pîmîlîka yanga yînyîna yadîvîsara kunnya yî'bînyangî damwaaihava!” ¹⁵ Dîna yaka “Sabwi mipînera!” daka wîlyabaai maarîna yaka mala lî'bwarya'ne' yavîkarîna yaka Gotîyare Angevîdaa'nyî sipîzipîyarajî bulîmakaawoyarajî saraavî tamaasîna yaka nîgwîa mariwînasî'na yaka yanga yînyîna yadîvîsaraavîre yî'bînya yarai marapuratawasi'na.

¹⁶ Sara mî'na yaka kwaamîryaraavî mubadîvîsaraavî wîdîna “Sa dîmakwalyula! Nîmware ange' mubange'na mîka. Dîmakwîla!” ¹⁷ Wîdîna kya' gamîrera

yawì'na “Gotiyare bukuya' dinya'na ‘Gotiyaigi gimi'ne angevina yilaaya dika nimi'ne simunyavi nyinadevaabisasi.’ Dinikesi Gotiyare bukuya', sahwarina.”

¹⁸ Sara yakevida'nyì Juya naangera sinna tika wida'daa'nyì yìwaara'na “Yiwaanya'na aai githiwaka? Gotiyai naangeiginyì gimwaaihiwake' yawiraade'na diraginya wijiwaainya' ja!” ¹⁹ Yiwaara'na kye' widina “Gotiyare anga nawì'nya dari kayaaka kyigalapiri yirika daryaai dariki ayina yidikaavidesi.” ²⁰ Sarevida'nyì Juyara widina “Sa' be'na diwaana! ‘Yirika daryaai dariki yarai madi'desi,’ diwaa' kigaa' kwarama pijaakuna (46) sara wawilavakesi anga da' madaapi. Yirika daryaai dariki gaverikaavi dimadeigi dathiwaana!”

²¹ Widina yesa'na kiri' sahwai gannya kilaakejikina widina silangavina mì'. ²² Sara widina kye' divi Jizaazarì ayina yidika'na kya' gamirera yagaalya' widake'na yawì'na yeva dina “Gotiyare bukuya' sara dinike'na kigaakuna Jizaazai widake' nebulyasi,” dina, limwanna ye'.

Jizaazai a'mwe yuyaraavirebwi yawì'na yake'nesi.

²³ Anga Jeruzaalemi sagaa' Pari'ma'munnegaa' mwaalina yada nawì'nyajì diraginyajì yadaa'nyì a'mwe kwalaalyara tinna sara wanganewa gaminyina dina “Sahwai naangelyi,” gaminne yaya' limwanna. ²⁴ Sara limwanna kye' a'mweraavirebwina a'mwera yaasiwa'wì'nya

yesa'na nayaa yawi'da kuminyina yilaaya yarai myina. ²⁵ A'mweraavire yawita'naji kumire sɔdusa'naji nayaa yawi'dei. Sarebwi pwai mujiwaakyi ya'. Sarebwi wigainadei mi'. Sare' dare'nesi. Sahwai a'mweraavine sidu'nakei nayaa yawiralimwagarikelyi.

3

Jizaazalyi Nikothimaazalyi saraar'nesi.

¹ Juya pwara Perizikiwinya yadivi' mwaalina yeve pwai Nikothimaazai wo'nikei Periziyai mwaalina yakelyi. Sai a'mwe naangei Juyaraavi maremwaaidei mwaalakelyi. ² Mwaalina yaka sawita pirivi Jizaazaryawinna bina yaka bamwaaina yaka wida "Wijiwaakyaigi, 'Gotiyai githasiwaabikeyi bahina wijiwaakina neyivanigi. Sare' dare'nesi. A'mwera wijiwaainyangi yivanigi. Diraginya yivanigi. Gotiyai magihaimwagyazi kwaji sara mi kyidi' diraginya dawwi,' sara yawi'mwona."

³ Jizaazai ja'nawidina "Naanga nebulya'na githivanige. A'mwe pwai kwai ayahi mudikei mima'nyi yajai Gotiyai maremwaaladeva tinna mwanganyi yannelyi."

⁴ Nikothimaazai wida "A'mwe naangei mudikei yima'nade'na gara yoji yima'nadelaka? Pigasaai a'mwei ganaangevi munyiki ayina wilaminyina kyoji ganaange' gara maaradelaka ayahwala!"

⁵ Sai ja'nawidina "Naanga nebulya'na githivanige. Kurya Tewaanyai a'mweri aalya myi kyoji mudika mumwaaihi kyoji sai Gotiyare

maremwaaideva wiladei mika! ⁶ A'mweyore kaimiraayai miw'i'naka yaginnakalyi. Gotiyarei, gamire munyiki Kurya Tewaanyai bulamwaaina kyoji sai a'mwe Gotiyare Kuryai kininnakelyi mudikei. ⁷ Githiwe'na 'Sari'minyi mudika ayahi yihimwaaihana!' githiwe'na atika maru'nata myinnera! ⁸ Yihuta gami sa' kaanna wina yadevaabisasi. Yihusa' kadika wi'nadinyaigi 'Sawinna wawade' daaka! Sabadaa'nyi bathe' daaka! dadinyaigi mi'. Aawa, sare'na Gotiyare Kurya Tewaanyai gazaizare munyiki bulamwaaina yinikei mudika yima'ni'. Mudikei tewaanna yada a'mwera tinna wangamaniga'. Kumi mwanganyivaniga' aaya kaavilyavi."

⁹ Nikothimaazai ma'maa'na, "Nyidiwaanya' gara yima'ninikavaka?"

¹⁰ Sai widina "Yizireliyainaavire nejiwaakadinyaigi sabwi myawirivaniginyaigi daa? ¹¹ Naanga nebulya'na githivanige. Nayaa yawirama'daanya yawi'daa yihithivanigo. Tinna nayaa wangadaanya yihithivanigo. Sara yihithivanigo'na nemire jalikurakyavi mamaaryivanigasaihilyi. Sabwi kadika myivanigata sa' baa'na yivaniga'.

¹² Kwaaka davaki yinikengina kyihithiwa malimwagyivaniga' 'Nebulyasi,' sara maji yiwaasa' Sigunyavi yinikengina yihithiwija' gara dilimwagyideihilaka! ¹³ Sigunyavina yilaawakei a'mwei pwai kwai mika. Sigunyavi A'mweraavine Kaimiraayai mwaalaka savidaa'nyi sai gavei walaaba'."

¹⁴ Kigaa' a'mwamaayaba Ne Mozizai kwaari'makamaalya' yisavaki pwiyaaka daakuna

yaa'. Kamaalyari makilyaakabaabi' yisavaki tamakya'na A'mweraavine Kaimiraayari sara makibi'delyira. ¹⁵ Sahwai "Gazaizai nyilimwagarori gaala yuyagaa'nebwi maarana!" kadozi sara makibi'delyira. ¹⁶ Sare' dare'nesi. Kwaaka davakiyainaavina Gotiyari kale naanga kwia' Gotiyai neminyina Gawaalivaanga gaveri nejaavakelyi. "Gazaizai sahwar wilmwagaroji myiwawanna! Aawa. Gaala yuyagaa'nebwi maarana!" daka nejaavakelyi. ¹⁷ Sare' dare'nanyi. Gotiyai dina "Nyibwaalivaangei a'mweraavi koti'ya'na maryawibwaradela!" daka myasaabya'. Aawa. "Nyibwaalivaangeri a'mweraavina padaihasamaata yima!" daka kwaaka davaki yasaabina ya' Gotiyai.

¹⁸ Gawaalivaangerina limwagaza pwari Gotiyai koti'ya' maryawibwa'dei mi'. Malimwagyaza pwai koti'ya' mena yawibwa'nikelyi. Gotiyare Gawaalivaanga gaverina gamire yayavinaji malimwagaryaja'na koti'ya' mena dinikesi. ¹⁹ Koti'ya'na dara dini' "Nemire kwaaka davaki pwai nebulya' nejiwaakake'na Baakei walaabina yaka kiri' a'mwera kayaa'nanya yadivisara kayaa'nanyabwi jihinyaburina wivu'nakere. Baakerina wivu'nakara mi'. Sare' dare'nesi. Kumi yadivisa kayaa'nanyangira," sare'na dinikesi. ²⁰ Sare' dare'nesi. Gazaizai kayaa'nanya yadei Baakerina simlika wimanikei Baakeryawinna mabi yivani'. "Baakeryaba pwara nimire kayaa'nanyabwi nanyangabika!" daka mabyivani'. ²¹ Sara yada kiri' pwai nebulya'na tewaanna yadei

Baakeryawinna nayaa bivan'i. "Baakeryabanna kwawa'muji pwara yawita'na 'Gotiyari yuya sa tewaanna jivanka!' " daka kaanna bivanikelyi.

Jizaazalyi Jonji saraar'nesi.

²² Sangi d'idaa'nyi Kwaaka Juthiya sawi Jizaazalyi gamirerari kaanna. Mi'na kaanna yaka saba kumji mwaalaka bavitaaziya' aalya yina. ²³ Bavitaaziya' yadaa'nyi nabaai aalya naange' wa'di'nyi'na Joni Kwaaka Y'noni Anga Selimi pimagina wawaka bavitaaziya' yina. Bavitaaziya' yina yada gaminyawinna a'mwera a'mwe samilika badaapi kuminyi bavitaaziya' yina ya'. ²⁴ Sare' dare'nesi. Sagaa' tewaanna mwaalaka kalavuza mumwaaihyagaa' Jonimi.

²⁵ Sagaa' Juyai yawi'na "Aalya yinya'nebwi yiniga wi'na daaka? Be bavitaaziya'vaka nawi'nya'?" Dina yaka Jonimireraavi yagaala naanga widina kya' maanga dinyina. ²⁶ Mi'na dinyina kye' Jonimyawinna gamirera bina yeva widina "Wijiwaakyaigi, kigaa' Aalya Jothani pimagi pihiri mwaalagina a'mwe pwalyi mwaalagina sarina nejalikurakaginyalyi. Yithaa, dahaa' sai bavitaaziya' yivanke' gaminyawinna yuyara wivaniga'."

²⁷ Joni ma'maa'na "Sarina simunya kwalaalya myawipinera! Sigunyavidaa'nyi Gotiyai a'mweri mujaayi yaja' aane piri' kiri' mamaari yannelyi. Gotiyai dina 'A'mwe pwai naangelyi. Pwai maalikelyi,' sana sana yina yadelyi Gotiyai. ²⁸ Sarimi sahwaihi nimire yagaala kadika nyu'nesaihiylyi. Dara

yîhîthe. Gotiyai dînika Kîraazîtiyainyi mîka! Aawa. Gotiyai nîmînyîdaasi nyîdaasakeinyî. Dîvi sahwai bathelyî, sara yîhîthe. Ke'ba'na yîhîthîma! ²⁹ Migînyai taaya' maa'mwakelyî. Mudîkangegaa' migînyaryawîna taaya' wîna. Wîna kyîwa' migînyai yîlaaya yîna yaka wîdîna. Wîdîna kyîwa' gya'mwei mwaalaka gamîre maanguraayavî kadîka wî'nyîna yaka yîlaaya naanna yîna. Taaya' gya'mweryawî mwaalike'na yîlaaya yîna yîwa'. Sa'bîsa'na a'mwera Jîzaazaryawîna wîna yîvanîgasa'na yîlaaya yuna yîvanîge. ³⁰ Gamî naangei nyavîlavîkelyî. Nîmî naangeinyî myîma'nîwîneinyî. Nîmî maalikéinyî yîma'nîdeinyî,” wîdîna ya' Jonî.

³¹ Munyabadaasi dîragînyai walaabakei yuyainaavî nevîlavîkelyî. Kwaakevakîdaasi pwaina Kwaakevakîyaina kwaakevakîyabwi wîdîna, kwaasi kwaasi yagaala wîdîna yadaanyaine. Sigunyavîdaasai yuyainaavî nevîlavîkelyî. ³² Sai Gotiyaryaba tewaanyabwi tîna wanganakengî kadîka wî'nakengî sangîna jalîkurakîna. Sare jalîkurakîna kya' kîrî' aane pwai kwai kadîka wî'naka gamîre yagaalya' mu'nya'. Aawa. ³³ Pwai gamîre jalîkurakya' daapîna yake' yi, “Gotiyai nebulya'nanyai!” dîragîna dîna ya'. ³⁴ Sare' dare'nesî. Sahwarî Gotiyai yasaabîna kya' Gotiyare yagaalyangî wîjîwaakîna. Sare' dare'nesî. Gotiyai sahwarîna gamîre Kuryarî wîjaavîna ya'. Gotiyai gamîre Kuryarî maali'na wîjaavakarîna mî'. Naanga yuyabwi wîjaavakerîna. Gotiyai gamîre Kuryarî yînahu wîjaavake'na sai Gotiyare yagaalya'

nayaa wi'dina neya'. ³⁵ Gawaalivaangerina Ganimaangeri tewaanya wivu'nada yilaaya yada diraginyaji yuyaji mwangina yada wi'dina "Yuya dimaremwaala!" widakerina. ³⁶ Gawaalivaangeri nayaa limwaga'dei gaala yuyagaa' yuyagaa'nebwi kin'innakelyi. Kwai Gawaalivaangeri malimwagaryadei gaalyabwi tinna mwanganyi. Aawa. Gotiyari sinna tika widayabwi sahwaru kuna wiwarikelyi.

4

Jizaazalyi Kwaaka Sameriya mwaalyasi sawaar'nesi.

¹ A'mwe Periziyara dara wi'nesa' "Ai, a'mwe kwalaalyara Jizaazarera yima'nyina yeva a'mwe pwai pwai Jonimirera yima'nyina. Jizaazai a'mwe kwala naangevi bavitaaziya' jivanika!"

² Sara wi'neta kwaraavi Jizaazai bavitaaziya' mya'. Aawa. Gamirera gavera bavitaaziya' yina ye'. ³ Periziyara sara didaapi sarevidaa'nyi Jizaazai sa'na wi'naka Kwaaka Juthiya ya'ma'na yaka "Kwaaka Galilina ayina wima!" daka ⁴ Kwaaka Sameriya lotaya'nei kaanna wina ya'.

⁵ Wawakegaa' Kwaaka Sameriya Anga Saaika wo'nikebanna yi'mavaawina. Kigaakuna Ne Jaikopi gawaalivaanga Jozepiyarine kwaake' wijayaakeba anga sa' mannikebe. ⁶ Nabaai saba Ne Jaikopi aalikavi'ninnya' likyaakeba kavi'ninnya' kuna di'na'disiyaba. Jizaazai kaanna kaanna wodaa'nyi maa'na naanga wiadaa'nyi sirigwajahaa' aalikavi'ninna sayabanna yi'mavaawina yaka walamwaaina ya'.

⁷ Aalya yirya'ne' Kwaaka Sameriya mwaalya' bina yina kya' Jizaazai widina “Aalya' dinyiryaama!” ⁸ Sare' dare'nanyi. Gamirera “Wapaaya mubaana!” deva anga savina wilaawina yesai gavei sara widina ya'.

⁹ Sarevida'ny'i a'mwe sa' widina “Gimi Juyaigi, nimi a'mwe'ny'i Sameriya mwaalya'ny'i aalya'na nyiwaral'mwaanya'na githiwa.” Sare' dare'nesi. Sameriya mwaalyara gwarewak'i aalya' nyina yadivi' Juyara gwarewak'ina “Aala!” dadivisa'na widina ya' a'mwe'.

¹⁰ Jizaazai ja'nawidina “ ‘Gotiyare sihumale' nyijaavana!’ yawi'diza' a'mwe sai githiwaka sa' ‘Aalya' dinyiryaama!’ gimi widizi kwaji sai aalya' a'mwera gaala mwaajibine' kagizaavadika!”

¹¹ A'mwe' wida' “A'mwe naangeigi, aalikavi'ninna da' saaminaange' warike' keban' aalya' di'ni'. Aaligware' maayaiginyi. Aalya' a'mwera gaala mwaajibide' gawi dimaa'jiwaa?

¹² Nemire Ne Jaikopi aalikavi'ninna da' neminyine' kalikyaa' aalya kuna nadaanyanneri. Gami'ji gawaalivaangerari gamire jilikyaawaryarari aalya da' nyina yaa' aalikavi'ninna tewaanya davi. Sarei nemire Nei a'mwe naangelyi aalya naanga nejayaakei. ‘Aalya tewaanya naange' gizaavima!’ dahina gaminyi wavila'mwaanyaigi daa?”

¹³ Jizaazai ja'nawidina “A'mwe yuyara aalya da' nadivi' divi mijika ayina wiade' kiri'

¹⁴ a'mwe dai aalya' wijaavide' noji yuyagaa' mijika mwi yadelyi. Arikewi. Aalya' wijaavide' gamire munyiki wilaroji nabaai yiminya'

yima'nadelyi. Yiminyavidaasi aalya naw'i'nya' bilyiri'na yada a'mwe savi yuyagaa' yuyagaa'ne' gaala wimwaaihadelyi."

¹⁵ A'mwe' wi'dina "A'mwe naangeigi, aalya sa' nyijaama! 'Na'muri mijika ayina manyoji danna mabi ya'muji aalya' myiri yide'nyi,' dena githiwa."

¹⁶ Sai wi'dina "Ginnya a'mwerina duzima'naawa!" ¹⁷ Wi'dina kya' a'mwe' ja'nawidina "A'mwamaaya'nyi." Jizaazai wi'dina "Naange' nyidiwaana 'A'mwamaaya'nyi.'" ¹⁸ Sare' dare'nanyi. Kigaa' a'mwe atilyaraavi maa'nagina kigaa' pigaa' yuyaraavi byenidakwawagi. Dahaa' a'mwe mwaaihiyai gimireina mika! Nebulya' sara nyidiwaa."

¹⁹ A'mwe' wi'dina "A'mwe naangeigi, giminyina dara wangamwe! 'O, a'mwe dai Gotiyari wi'nawijiwaakadei daaka!' ²⁰ Mugunya davi nimire Ne sinnawinyara Sameriya mwaalyara Gotiyari yilaaya yina. Sara yina kyaa' kiri' Juyaihi sahwaihi wi'dina 'Aawa, Gotiyari yilaaya Jeruzaalemi yipi'deva.' Sara nedivaniga'."

²¹ Jizaazai wi'dina "A'mwe'gi, githide'na du'nana! Divi pigaa' yima'nadehaa' mugunya davi a'mwera Nimwari yilaaya mi yipi'de' Anga Jeruzaalemi yilaaya mi yipi'dehaaki. Aawa, yawita sabwi. ²² Kwaaka Sameriya mwaalyaihi siduta maalika' yadivi' Gotiyari yilaaya kwaasi kwaasi yadivisaihiyi. Juyainaavidaasi dakinikei biwaka, a'mweraavi padaihasamaa'de'na Gotiyari nayaa yawi'na

yadaa yilaaya tewaanna yadaanyaine Juyaina.
²³ Sare' kiri' sagaa' yima'nadehaa' githiwegaa',
 dahaa' mi'na yima'niwakegaa' a'mwera, a'mwe
 Nimwari yilaaya nebwinā yipi'dera. Kumire
 kuryara yilaaya yipi'de' nabaai, nebulya'na
 yilaaya yipi'dera. Sare' dare'nesi. Sara yilaaya
 yipi'deraavina Gotiyai dina 'Sahwara yilaaya
 nyipika!' dadelyi. ²⁴ Gotiyai Kuryalyi. A'mwei
 mika. Sare'na a'mwera kumire kuryaraaviji
 nebulyaburiji yilaaya yipinerera. Yaasiwa'na
 yilaaya mipina!"

²⁵ A'mwe sa' wi'dina "Dara yawi'mwa. Divi
 Mezaayai yaya pir'i Kiraazitiyai wo'nikei
 bathelyi. Sai bazai yuyabwi, yuyangi
 nedathelyi."

²⁶ Jizaazai wi'dina "Dahaa' githivanige dainyi
 nimi sahwayini."

²⁷ Sagaasagaa' Jizaazarera yagalaawina yeva
 dara wangesa' "Ai, a'mwevi wi'divanikei
 daaka!" Deva atika maru'na'na yeva kiri'
 kumijiya aane pwai kwai savi muji'na "Baa'na
 bahineka?" sari myiwaarayina "A'mwe savi
 baa'na wi'divanigina?" Sara muji, navika
 mwaalina ye'.

²⁸ Sarevidaa'nyi a'mwe' gannya aaligware'
 wakina yaka gannya angebanna ayina
 wilaawina yaka a'mwe anga sabanyaraavi
 wi'dina ²⁹ "Ai, a'mweihi kaajila! A'mwe pvari
 danganyila! Yuya yadinyanna nyidiwakelyi.
 Gotiyai dahilakyaakei Mezaayai dingaka?"
³⁰ Sara wi'dina kya' anga saba ya'ma'na yeva
 sahwayawinna wina ye'.

³¹ Angebanna a'mwe' wodaa'nyi gamirera Jizaazari widina “Nejiwaakadinyaigi, wapaa dimaranana!” ³² Sara widina kye' kiri' wida' “Aala, wapaa pinijiyainyi sarimi mwanganya.” ³³ Mi'na widina wiyakevidaa'nyi gamirera yiwaara'nyina “Pwai wapaaya dhamakabiwaka?”

³⁴ Jizaazai widina “Nimire wapaaya pirisi. Da'na yihithivanige. Nyidasaabakei sara nyidivanikebwi gamire simunyabwi sara yivanige'na nimire wapaayasi. Gamire wawinya' mi'na yimwannya'ne' nimire wapaayasi.” ³⁵ Sarimi wawinya tinna wangadivi' dara didivi' midaaka! ‘Lawe dikaai dikaai kwavilavoji wapaaya milaadera.’ Yihithiwa. Dahaa' sa' madipina! Yithaanyi! Wawinya keiningi nayaa danganyila! Kigaa' pwara burinna yeva witizila yawaka yinikabaaibi' a'mwera niminyina yarai nyu'nipi'derera. ³⁶ Pwai wapaaya miloji miloji kave yovirawakade' gamire tivikita mena maa'mani'. Yi witizila yuyagaa' yuyagaa'ne gaalyabwine mena yovirawakivani'. Sila piraihirakadelyi wapaaya yovirawakadelyi ‘Witizila mena warike'na yilaaya yaka!’ dahila sara yovirawakivani'. Sa'na pwai Gotiyare yagaalya' wiijiwaakina yadelyi pwai a'mwera Gotiyareraavi wimwaaihina yadelyi saraai sare'na yilaaya yikaderaalyi. ³⁷ Sare' dare'nesi. Darevi' nebulya' didivi' ‘A'mwe pwai burinna yadelyi. A'mwe pwai midelyi.’ Yi sa' nebulyasi. ³⁸ Wawinya pirivi sarimi myesavina ‘Wapaaya dimaaryila!’ yihithiwe. Wawinya savi pwara

miraagiki'na kye' sarimi kumire wapaaya dimaaryidengi. Sinnawi pwara a'mweraavi Gotiyare yagaala wijiwaakina yadivi' dahaa' sarimi yagaala tewaanya' kudapiji a'mwera nimirera yima'nipi'derera," widina ya'.

³⁹ Anga saba mwaalyara Kwaaka Sameriya mwaalya kwalaalyara a'mwevire jalikurakya' kadika wi'nyina "Yuya yadinyanna nyidiwakelyi." Sara kadika wi'nyina yeva Jizaazari limwanna yadivi' "Mezaayai Kiraazitiyalyi. Gotiyai dahilakyaakelyi," dina.

⁴⁰ Sarev'idaa'nyi Kwaaka Sameriya mwaalyara gaminyawinna wina yeva diraginna widina "Neminyawi se da'mwaka!" Widina kye' savi yirika daryaai mwaalina. ⁴¹ Mwaalina yada gamire yagaala widina yake'na pwara kwalaalyara gaminyi limwanna yeva dina "Mezaayalyi. Gotiyai dahilakakelyi!" ⁴² Dina yeva a'mwevi widina "Nabaai, dahaa' gaminyi limwamanigo. Nediwaanya'na mika! Sare' dare'nesi. Nemi sahwaina kadika wi'nona dara yawi'manigo' 'O, nebulya', Kwaaka davaki mwaalyaraavina Naangei padaihasamaaradei daaka!' Sara dona gaminyi limwamanigo."

Jizaazai kaimiraayarina nabalya' marasi'nake'nesi.

⁴³ Anga saba sawita daryaai Jizaazai wa'mwaraka saba ya'ma'na yaka Kwaaka Galilina wina. ⁴⁴ Jizaazai sahwai widake' "Gannyaba mwaalyara a'mwe piropetiayi Gotiyari wi'nawijiwaakaderi muji 'A'mwe naangeiginyi,' muji yadivisalyi." Widake'na

Galilina wina. ⁴⁵ Mi'na wina kya' saba mwaalyara gaminyina maarina. Anga Jeruzaalemi Pari'ma'munne'na kaanna yeva munnegaa' Jizaazai yuyangi tewaanna yadaa'nyiyangi tinna wanganeva “Tewaanyasi,” desa'na gaminyina yilaaya yina ye'.

⁴⁶ Kwaaka Galili Anga Kena mannikebanna Jizaazai ayina wina. Saba kigaa' diraginna kya' aangaalya' wa'di'nyi aalya waainiya' yima'nikebe. Anga piba Kaapaniyami kingiyare a'mwe naangei mwaalina yadi'nyi gamire kaimiraayai nabalinakei warina ya'. ⁴⁷ Jizaazai Anga Kenana ayina wina kya' kingiyare sai dara wi'nake! “Galilina Juthiyadaa'nyai Jizaazai damwaali'!” Mi'na daka gaminyawinna wina yaka yidaangana! “Nimire kaimiraayai yarai balade'na nimiji wawa'gizi nabalya sa' dimarasi'nana! Yarala!” ⁴⁸ Jizaazai widina “Sarimire yawi'divisabwi yawi'mwa. Nimire yijiwaainyaji diraginyaji sarimi tinna mwanganyipija' nimini manyilimwagyi jideihilyi.”

⁴⁹ Kingiyarei kave widina “A'mwe naangeigi, ninnya kaimalei nabaladika! Naarimi yarai wawaka!”

⁵⁰ Jizaazai widina “Ginnya angevina kaanna diwona! Ginnya kaimalei mabalyai mwaali'. Nabalya' maayai mwaali'.”

Jizaazai widake' a'mwe sai limwanna yaka dina yada “Nebulyasi,” kaanna wina. ⁵¹ Gannya angevina kuna kaanna wina yadaa'nyi gamire yaasiwa'wawinyara wijimaa'nyina yeva widina “Gimire kaimiraayai tewaanya

mwaali'. Nabalya' aawa.” ⁵² Sarevida'nyĩ sai yiwaara'na “Nĩmĩre kaimĩraayarĩna gathingaa' yiwĩwaka?” Sara yiwaara'na kya' wĩdĩna “Wona sirigwajahaa' waanĩ kilokiyagaa' kĩlaaka dĩa menanyĩra.” ⁵³ Sarevida'nyĩ ganĩmaangei yawĩna “Yo, sagaasagaa' Jizaazai nyĩjawaali' ‘Gĩnnya kaimalei tewaanyai mwaali’.” Sara yawĩna yaka kĩnĩdaka sahwarĩ lĩmwanna yesanĩdakeru.

⁵⁴ Kwaaka Juthiyadaasi Kwaaka Galĩlina yi'mavaawĩna yaka Kwaaka Galĩli yijĩwaaĩnya' kaimalerĩna yake' dĩragĩnya pĩrĩwaalya' ya'.

5

Aalĩbunya Bethezĩtha Jizaazai a'mwe nalaavĩnakerĩ yidĩkaavake'nesi.

¹ Sare mena kyĩma'na' Juyara Gotĩyarĩna tĩka munne' nadĩvĩsagaa' kyĩma'na' Anga Jeruzaalemĩna Jizaazai kaanna wĩna ya'.

² Jeruzaalemi saba Sipĩzipĩtikurya' wo'nĩkevi pĩmagĩnyavi aalĩbunya' dĩ'na'na ya'. Aalĩbumaangevi yĩhulĩvĩliya ati manĩ'. Aalĩbunya sa' “Bethezĩtha,” Yivĩrũyagaala wo'nĩkesi.

³ Yĩhulĩvĩliyangĩ nalaavĩnaka kwala naanga mwaalĩna ye'. Nalaavĩnakera pwara tĩbĩnyara, pwara sivĩla nadĩya yĩnĩkera, pwara kĩlaaka bainĩkera mwaalĩna ye'. Savĩ yuyara aalya' kwaayakwaaya'na yemwaaina.

⁴ Pĩgaa', pĩgaa' aalyavi Sĩgunyavĩdaasai Naangere mamaayai ejeliyai walaabĩna yaka aalya' gĩnyĩwanna. Sara gĩnyĩwanna kya' sagaa' sĩnnawĩnyai nalaavĩnakei aalya

sinaapwipulyavi yarai walaawina, yithaa, maam+daryai yima'nakelyi. ⁵ Yemwaaina yadivi' nabaai, a'mwe akwai yemwaaina yada kwarama naanga naanga (kwarama 38) wavila'daa'nyai nalaav+nakei mwaalina. ⁶ Sai mwaalina yadi'nyi Jizaazai bina yaka yawi'na "We', a'mwe sai nalaav+nakei kwarama kwalaalya mwaaidelyi," yawi'na yaka widina "Gimire simunya 'Maam+daryainyi yima'nima! yawi'dinyaigi daaka?"

⁷ Nalaav+nakei ja'nawidina "A'mwe naangeigi, aalya' kwaaya yadaa'nyiyagaa' 'Aalibunyavi nyimarapaihana!' dena a'mwe bewai yanneka? Walaawina yadaazi sinnawi pwai yarai wavila'na nyada aalyavi paihinyina yadelyi."

⁸ Jizaazai widina "Daava'gizi nalabwarya' pwala'gizi kaanya dimakwo!" ⁹ Sara kuda' yime'nya'bi' a'mwei maam+daryai yima'naka gannya nalabwarya' pwalaka kaanna wina ya'.

Sagaa' Juyaraavire Kwazaakegaa'. ¹⁰ Sarevidaa'nyi Juyara naangera nalaav+nakei tewaanyai yima'nakeri widina "Juyainaavire Kwazaakegaaki. Nemire kiwinya' dini' 'Kwazaakegaa' nalabwarya' mamakunnera! Sara dinikegaa' be'na makuvanigina?"

¹¹ Sai widina "A'mwei maam+darya nyidikaa'mwakei nyidiwa' 'Ginnya nalabwarya' pwala'gizi kaanya dimakwo!' Sara kanyidiwakira."

¹² Kumi yiwaara'na " 'Ginnya nalabwarya' pwala'gizi dimakwo!' githiwakei aaihwakala?"

¹³ Yiwaara'na kye' kiri' tewaanya yima'nakei

myawirina. Sare' dare'nesi. Aalibunyavi kwala naanga mwaaidapi Jizaazai kave wina kya' sai sahwarina wida' "Aaihwai dingaka?"

¹⁴ Divi sagaa' Gotiyare Angevi Jizaazai gaminyi biramaaraka widina "Yithaa, dahaa' maamidaryaigi mwaihi. Kayaa'nanyabwi minna! Kigaa' nabalya kayaaka gihaideiginyi. Aya kayaa'nanaanga gyade'bita naanga pir'i nagyathika! Gimire kayaa'nanya minna!"

¹⁵ A'mwei Jizaazari kadika wi'nyina yakegaa' Juyara naangeraayawinna widaawina "A'mwei maamidarya nyidikaamwakei Jizaazalyi."

¹⁶ Sarevidaa'nyi naangera dara yawiresa' "Niwaava, Juyainaavire Kwazaakegaa' kayaaka'na a'mwe sai sabwi yadei daaka!" Sara deva Jizaazaryawinna kaanna yeva sagaa' Kwazaakegaa' sara yake'na "Balana!" deva maanga gaai widina. ¹⁷ Maanga gaai widina yadivi' Jizaazai widina "Dahaa'na ninnya Nimwai yivanikegaa'nanyi. Nabaai nimiti yivanigeinyi."

¹⁸ Sarevidaa'nyi Jizaazai sara widaakegaa' Juya naangera dinyina "Nemire kiwinya' Kwazaakegaa'na kayaaka yiwa'. Sa' kayaa'nanyasi. Kayaa'nanya' kiri' nediwa' 'Gotiyai ninnya Nimwalyi,' sa' kayaa'nanaangesi. Yarei balana!" Jizaazai widina "Gotiyai ninnya Nimwalyi," yaka "Nimiti Gotiyari avaalyainyi," dinike'na dinyina ye' Juyara.

Jizaazare diraginya'nesi.

¹⁹ Juya naangera dinyina yesagaa' Jizaazai gaminyina wida' "Naanga nebulya'na

yihithivanige. Gawaalivaangei gamire simunyavidaa'nyi aane piri' kiri' yannei mi'. Aawa. Nimwai yadaawori wanganajanna yadelyi. Sare' dare'nesi. Yuya Nimwai yade Gawaali' yivanike sahiningi. ²⁰ Sare' dare'nesi. Nimwari Gawaalivaangerina wivu'nade'na Nimwai sahwai wawinya yivanika yuya sa yibwaridaakwadelyi. Gawaali' nabalinker tewaanya yaka wawinya maalikesi. 'Sari' atika maru'na'na jila!' daka Nimwai wawinya naange wibwaridaakwoji Gawaali' sana yadelyi. ²¹ Sare' dare'nesi. Nimwai bainikeraavi yidika' da gaala wijaavadevaabi' Gawaali' ' "Sahwaraavi yidikaavima!" da'muji wimwaahima!' dozi gaalyabwi wijaavadelyi. ²² Sare' dare'nesi. Nimwai aane pwari kwari koti'ya' mujadelyi. Aawa. Wawinya savina diraginya' Gawaalivaangeri kujaawa' sai koti'ya yuyanna widathelyi. ²³ Sarevi 'A'mwe yuyara Nimwainyine yaya' munyabanna makimanigatabaabi' Nyibwaalivine yaya' makibika!' daka wijaawakelyi. Gawaalivaangerine yaya' munyaba mamakilyadei yi sai Nimwai widasaabakerine yaya' mamakilyadelyi.

²⁴ Naanga nebulya'na yihithivanige. A'mwei yagaalyavi kadika nyu'najai Gotiyai nyidasaabakeri limwaga'na yoji sagaasagaa' yuyagaa' yuyagaa'ne gaalyabwi kininnakelyi. Sai koti'ya' jidaya'neba wilaabathei mi'. Aawa. Sahwai balyaburidaa'nyi gaalyaburina mena ga'ma'na yiwakelyi. ²⁵ Naanga nebulya'na yihithivanige. Pigaa' yima'nya'negaa' dahaa'

bainikera balyabwi yadivisara Gotiyare
 Gawaalivaangere maanguraaya' kadika
 mena wi'napiji nabaai, kadika wi'nipijara
 gaala mwaabidere. ²⁶ Sare' dare'nesi.
 Nimwai diraginna mwaalikei gami sahwai
 gaalyabwine aaya kaavilyai mwaalikabaaibi'
 Gotiyai Gawaalivaangerina dina kya'
 Gawaalivaangei gami sahwai gaalyabwine
 aaya kaavilyalyira. ²⁷ Sahwai, A'mweraavine
 Kaimiraayai mwaalike'na Gotiyai wida'
 'Diraginya' kagizaawa a'mweraavina
 kotiya' jawibwa'deiginyi.' ²⁸ Sara widaka
 sa' atika mamaru'napina! Divi pigaa'
 yima'najahaa' wakadivisangidaa'nyi baryara
 gamire maanguraayavi wi'napiri ²⁹ kunnya
 wakinkeba yagalya'ma'na, walyaabina
 yipi'dere. Pwara mwaalyagaa' tewaanna
 mwaabizara dikaavapiji gaalyabwi maapi'dere.
 Pwara mwaalyagaa' kayaa'na mwaabizara
 kadikaavapiji kotiya' jidasabwi maapi'dere.

³⁰ Nimire simunyavidaa'nyi aane piri' kiri' mi
 yiwineinyi. Yagaala Nimware wi'nwebaabi'
 maryawibwa'manige a'mweraavi kotiya'na.
 Nimire simunyavi mabiramaarivanige. Aawa.
 Nyidasaabaka sare simunya' maa'manige'na
 nimire yawibwata sa' yida'maraangesi.

³¹ Sahwainyi gaveinyi 'Naangeinyi,'
 jalikurakimuji kwaji pwara 'Nebulya'
 mika! kadipidika! ³² Niminyina nayaa
 jalikurakadei pwai mwaali'. Yagaala
 sara yihizalikirakivanike' 'Jalikirakya sa'
 nebulyasi,' yawi'mwa. ³³ Jonimyawinna sarimi
 a'mweraavi kudaase' Joni nebulyaburina

yihizalikiraka'. ³⁴ Sare'na a'mwe gaveraavi niminyina jalikurakyabwina mamaaryadinyainyi. Aawa. 'Sariminyi nayaa yihivadaihasaamaama!' dena yihithivanige. Joni yihithake'na ³⁵ Joni di'baakelyi. Di'baaka sai naka a'mweraavina wanyina yakelyi. Joni mwaalaka gannya baake' sariminyina wanyina yake', maalikégaa' baaka savina gamire yagaalyavina yilaaya yesaihilyi. Joni niminyina nayaa yihithakelyi. ³⁶ Nabaai, niminyina jalikurakya pini warike Jonimire yagaalyavi wavila'na yaka dinikengi. Sare' dare'nesi. Yuya yivanige Nimwai 'Sana ja!' nyidade wawinya sa yivanige tinna wanganeva dara yawi'mwaasa' 'O, Jizaazai sara yade'na Ganimaangei widaaabakei daaka!' Jalikurakya sahirisi. ³⁷ Nimire wawinya sa niminyina yihithivanika nabaai, Nimwai nyidasaabakei niminyina nayaa jalikurakiwakelyi. Sare'na sarimi gamire maanguraaya' kadika mu'nyadivi' gamire sinnya' tinna mwanganyadivisaihilyi. Arikawi. ³⁸ Sarimire sidusangi gamire yagaalya' mwaribainyi'. Sahwai nyidasaabakeinyi dainyi manyilimwagyadivisa'na gamire yagaalya' mwaribainyina. ³⁹ Sarimi yawi'na 'Yuyagaa' yuyagaa'ne gaalyabwi kininnakeinyi mwaalima!' yawi'na yadivisa'na Gotiyare bukuya' kave birina birina yadivisaihilyi. Gotiyare bukuya' dinike sahini niminyina jalikurakinikeinyira. ⁴⁰ Niminyina dinike'na kiri' sarimi 'Gaalyabwi kininnakeinyi mwaalima!' deva niminyawinna divide' sarinnya simunyangi myawirivaniga'.

41 Nîmînyîna ‘Yîlaaya yaadeina daaka!’ dipîja’ sarîmîresi. A’mweraavi byaannya’ mamarivanîge. 42 Aawa. Sarîmînyîna yawî’mwa. Sarîmînyî Gotîyarîna tewaanya yîhîvu’nadevwi mwari’. Sare’ yawî’mwa. 43 Nîmware dîragînya’ maarena gamînyîne yayavi biwa. Kabîwa kîrî’ sarîmî nîmînyî mamaari. Pwai gannya dîragînya’ maarojî gannya yayavi bazai, yî sahwarî dîmaaryideihîlyî. 44 Sahwaihi sarîmînyîna ‘A’mwe tewaanyalyî,’ deva yîlaaya marivanîgasa’ byaannya’ wîjaavanîgasa’na ‘Gotîyai gavei yîlaaya neyana!’ majaihiyî. Sarîmî sara yadîvi’ nîmînyîna gara dînyîlimwagyideihîlaka? ‘Naangeigînyî,’ gara dîzideihîlaka? 45 Sare’na myawîri yadîvi’ dîvi sarîmî dînyîna yîpî’de ‘Ganîmaangerî nemînyîna kotîya’ jîna yadei daaka!’ Sara myawîpîna! Aawa, nîmî kotîya’ jîna myîwîna! Sarîmî Ne Mozîzarîna dînyîna ‘Sai nevadaihasamaaradelyî,’ dînyîna yadîvi’ kîrî’ Ne Mozîzai sarîmînyîna kotîya’ jîna yîhyathelyî. 46 Sare’ dare’nesî. Mozîzai nîmînyîna bukuya’ yîda’nîke’na sarîmî Ne Mozîzarî nayaa lîmwanna yîpîjî kwajî kanyîlimwabîthîka! 47 Kwaasî yadîvi’ Mozîzai yîda’nîke malîmwagi yeva yagaala yîhîthîwe gara dînyîlimwagyideihîlaka?”

6

Jîzaazai a’mwe kwalaalyaraavi (5,000) wapaaya wîjaavake’nesî.

(Matîyui 14:13-21; Maakî 6:30-44; Lukî 9:10-

17)

¹ Sare mena kyima'na' Aalibunya Galili (yaya piri' Aalibunya Taaiviriyaazavi) Jizaazai sipiyavi walamwaaina kya' pimagina makuna. ² Makuna kya' kwala bwa'naanya' midinna. Yijiwaainya naange Jizaazai nalaavinakera tewaanyaraavi wimwaaihina yake tinna wanganna yesa'na Jizaazari midinna yeva gaminyawinna bina. ³ Mi'na bina kye' mugunyavi yilaawina yaka saba gamirerari walamwaaina. ⁴ Sagaa' Juyaraavire Pari'ma'munne'negaa' aya kigaa' yima'nakegaaki. ⁵ Walamwaaina yaka Jizaazai wanganaasina yaka tinna dara wanganake! "Niminyawinna kwala naanga davi'vanga!" Sara dake'na Pilipimi widina " 'A'mwe dara wapaaya nipi'ka!' dona girikula yuyaraavine gawi mubaaziwona?" ⁶ Jizaazai Pilipimina dina "Gara nyidazihyiwaka? Yaamiji widima!" Sare' dare'nesi. "Sara yideinyi," mena yakei.

⁷ Pilipi ja'nawidina "We!, 'Gazaizai maalike' maarana!' dona kinaaya 200 (tu aadireti) wapaaya biretiyanne mubaazi kwaji wi'na yima'nade' mi'."

⁸ Gamire pwai Ediruyai Saaimoni Pitare gahwaalaangei Jizaazari widina ⁹ "Dava kaimale pwai yisila baali biretiya atilyaji jawinya piriwaalyi sa kininnakei mwaali'. Sare kiri' a'mwe kwalaalya darera tika nya'ne wapaaya sa beningaka!"

¹⁰ Jizaazai widina "A'mweraavi a'mwengi duzila! 'Dalamwaalyila!' " Saba kuridarya naangebe. Sarevidaa'nyi a'mwera a'mwe

walamwaaina. A'mwera gavera kwalaalyara (5,000) mwaalina yeva walamwaaina. ¹¹ Yuya, a'mwera a'mwe walamwaaina kye' Jizaazai biretiya sa maarina yaka Gotiyari "Su! Su!" wida'ina kya' biretiya naanga yima'nadaa'nyi a'mwe walamwaaina yadapiyangina yanga wijaavina. Wijaavina yaka biretiya wijaavakabaaina jawinyawaai wijaavina kya' "Sare' nima!" yawi'divi' sara nyina kye' munya wina'. ¹² Munya kwina' sai gamireraavi wida' "Nagihwaasa yaasiwa' warya nyadika! Wapaaya wa'mwaka yuya dimaaryi!" ¹³ Sarevidaa'nyi gamirera sara yeva soigilya atiraai sivi'lyiridaa'nyi pri'waalyangi mihina mihina kye' maanga yeku'nyina. A'mwera a'mwe yisibaalibiretiya nagihesa soigilya sangi maanga yeku'nyina ya'.

¹⁴ Sarevidaa'nyi a'mwera Jizaazai yijiwaainya sa' yake' tinna wanganna yeva dinyina "Gotiyai wijaaka 'Kwaakevaki nyu'nawijiwaakadei bathelyira,' wijaakei sahwałyi. Nebulyasira. Sahwałyi." ¹⁵ Sarevidaa'nyi Jizaazai dara wanganake' " 'Kingiyai nemaremwaaladei yima'nana!' dapi yarai galalimwannan nyip'i' dera daaka!" Sara daka mugunyavi ayina yilaawina ya' gavei.

Aalibunyavi Jizaazai ga'nigoke'nesi.

(Matyui 14:22,23; Maaki 6:45-52)

¹⁶ Sawitirinyagaa' aalibumaangebaarina gamirera walaawina yeva ¹⁷ sipiyavi yilamwaaina kye' aalibunyavi Anga Kaapaniyamina makuna. Sawisa' kajinna'

kuminyawinna Jizaazai kuna mabya'. ¹⁸ Sipiya' makuna yadaa'nyi yihuta naange' yaka aalimavajinaaka naanga yina yadaa'nyi' ¹⁹ naangeba (5 kilomitaaya pin, 6 kilomitaaya kin) gamirera sipiya' yisaji aalyavi maarimaarya yina. Sarevidaa'nyi aalyavi a'ba Jizaazai ga'niguna yaka sipiyavi aya kibanna yi'ma'na yakeri tinna wanganna yeva lika naanga yina. ²⁰ Lika naanga yina kye' sai widina "Niminyira. Lika mipinera!" ²¹ Sara widina kya' gamirera dina "Sipiyavi yilamwaalana!" Dina kye' sahwai yilamwaaina kya' sagaa' "Sabanna yi'mavawaana!" desabanna sipiya' yarai yima'naabina ya'.

A'mwera Jizaazarina biresa'nesi.

²² Mwanyavi aalibunya pimagi kwala bwa'naanya' kuna mwaalina yeva dara yawiresa' "O, wona sipiya pin mwari kyawa'di' gave' yila'mwa'dike' daaka!" Nabaai, dara yawiresa' "Sipiya' gannyaraji Jizaazai milamwaalyi yawaali'. Aawa. Sahwari ya'ma'na kyawaaiha' sipiya' gavera damakwiawaalika!" ²³ Dadaapi Anga Taaiviriyaazidaa'nyi aalibumaanga sabaarina sipiya pin bina. Naangei Gotiyari "Su! Su!" widina kya' kwala bwa'naanya' biretiya nesaba samwinebanna sipiya sa bina. ²⁴ Sarevidaa'nyi kwala bwa'naanya' dara wanganesa' "O, Jizaazai pwai midaaka! Jizaazarera pwara midaaka!" Mena deva sipiya sangi yilamwaaina yeva "Jizaazarina biraana!" deva Anga Kaapaniyamina wina ye'.

*“Jizaazai Sîgunyavîne Wapaayalyî,”
dînikê'nesî.*

²⁵ Aalîbunyavî a'mwera ga'ma'na yeva Jizaazarîna birîna birîna yeva bîramaa'na yeva yîwaara'na “Wîjîwaakyaigî, dava gathingaa' bîwaa?”

²⁶ Jizaazai ja'nawîdîna “Naanga nebulya'na yîhîthîvanîge. Nîmî diragînna yadînyangîna yîjîwaainyangîna sîdusa' nayaa myawîryadîvî' nyîbî'manîga'. Aawa. Bîretîya neva munya yîhînyawaalîke'na nyîbî'manîga'. ²⁷ Wapaaya bwia bu'denna wawînya' minna! Aawa. Yuyagaa' yuyagaa'ne gaalya'ne wapaaya ge waragwode sanna wawînya' jî! Wapaaya sa A'mweraavîne Kaimîraayai gîzaavadengî. Sare' dare'nesî. Gotîyai Ganîmaangei gannya diragînya' kujaava' baavanaka sahwai sara yadelyîra.”

²⁸ Sarevîdaa'nyî kumî wîdîna “‘Nemî Gotîyare wawînyanna yaana!’ dona gara yawaajî yaadeînaavaka?”

²⁹ Jizaazai ja'nawîdîna “Gotîyare wawînya sa'na daresî. Sahwai wîdasaabakerîna diragînna dîlîmwagarîla!”

³⁰ Sarevîdaa'nyî kumî wîdîna “Nabaai, ‘Nemî tînna wanganawaajî gîlîmwagaana!’ dawaajî yîjîwaainya' garîvî dîneyîdevaka? Berî' jîzîwaana? ³¹ A'mwamaayaba Ne sînnawînyara sîgunyavîdaa'nya wapaaya manaaya nyaasare. Gotîyare bukuya' dînikabaabîsasi. Sîgunyavîdaasi wapaaya tîka nya'ne wîjaava'. Sara dînikesi.”

³² Sarevîdaa'nyî Jizaazai wîdîna “Nebulya'na yîhîthîvanîge. Mozîzai Sîgunyavîdaa'nya wapaaya' mena yîhîzayaakei mîka! Aawa. Nîmaamaangei yuyagaa' Sîgunyavîdaa'nya Wapaaya Nebulyarî yîhîzaavadelyî.

³³ Sare' dare'nesî. Gotîyare Wapaayai Sîgunyavîdaa'nyai Kwaakevakî mwaal-yaraavîna gaalyabwî wîjaavadelyî yuyagaa'.”

³⁴ Sarevîdaa'nyî kumî wîdîna “A'mwe naangeigî, yuyagaa' wapaaya nedîwaanya' dînejaadeigînyî.”

³⁵ Jizaazai wîdîna “Gaalyabwine wapaaya sai sahwainyî. A'mwera aawapaaya tîka nyîna yadîvî' ayawî mijîka yîna. Aalya nyîna yadîvî' ayawî mijîka yadîvîtara. Pwai nîmînyawînna wîlaabozî gannya kuryai mijîka mwi. Arîkewî. Sai nyîlimwagozî aalya'na mwinyî yadelyî. Arîkawî. ³⁶ Aawa. Nabaai, pîrîwaaina dara yîhîthîwa. Tînna nyangamwaasainyî. Manyîlimwagyîvanîgasaihîlyî. ³⁷ Nîmwai

nyîjaavajara yuyara nîmînyawînna bipî'deinyî. Nîmînyawînna sara boziyarî mwasîmagînna marasî'nîdei mîka. Arîkewî. ³⁸ Nîmî 'Nîmîre sîmunyabwî miwîna! Aawa. Nyîdasaabakere sîmunyabwî yîma!' dena Sîgunyavîdaa'nyî walaabeinyî. ³⁹ Nyîdasaabakere sîmunyabwî darestî. Nîmînyîna yuyaraavî nyîjaavake aane pwârî kwârî myagalya'mayainyî. Aawa. Yîrîka Aayagaa' sahwârî tewaanna yîdîkaavîdelyî. ⁴⁰ Sare' dare'nesî. Nîmaamaangere sîmunyabwî dara yawî'manîkesî. Gazaizai Nyîbwaalîvî wanganojî sahwârî limwagarojî yuyagaa'

yuyagaa'ne gaalyabwi maarana! Sara kanyida' Yirika Aayagaa' sahwarì yidikaavidelyì.”

⁴¹ Jizaazai widina “Sigunyavidaa'nyì Wapaayainyì walaabeinyì.” Widina yake'na Juyara pwara jikurya yeva kinimyagaala dina.

⁴² Sarevidaa'nyì dinyina “Baa'na nediwa'? A'mwe dai Jizaazai Jozepiyare gawaalivaangei daaka! Ganimaangerinajì ganaangevinajì yawi'mwo. ‘Sigunyavidaa'nyì walaabeinyì,’ gara nediwakelaka!”

⁴³ Jizaazai ja'nawidina “Jikurya yeva kinimyagaala dimanigasa'na mipinera!

⁴⁴ Nimwai nyidasaabakei niminyawinna aane pwari kwari mamwagi'nya yaja' sai nimirei yima'nya'nei mabyì yannelyì. Nimwai sahwarì mwagi'nyì yajari Yirika Aayagaa' tewaanna mwaalade'na yidikaavideinyì.

⁴⁵ Gotiyari wi'nawijiwaakyara yidayaasangì dara dinikesì. Gotiyai a'mwe yuyaraavi wijiwaakadelyì. Sara dinike' gazaizai Nimwari kadika wi'nyina yoji gamire wijiwaakya' maarina yada sawhai niminyawinna bathelyì.

⁴⁶ A'mwe pwai kwai Nimwari mwanganyadei mi'. Gotiyaryawidaasai dazahwai gaveina wangana' Nimwari. ⁴⁷ Naanga nebulya'na yithithivanige. A'mwe nyilimwagarajai yuyagaa' yuyagaa'ne gaalyabwi kininnakelyì.

⁴⁸ Sahwainyì gaalyabwine Wapaayainyì.

⁴⁹ A'mwamaayaba sarimire Ne sinnawinyara wapaaya manaaya' nyaata kwara balina.

⁵⁰ Balina yaasa' Sigunyavidaa'nyì Wapaayai walaabina yake' daresi. Pwai kwai Wapaaya

sari maranajai mabalyi yadelyi. ⁵¹ Wapaaya sai Sigunyavidaa'nyi walaabeneinyi sahwayi. A'mwe pwai kwai Wapaaya sanyi nyinajai yuyagaa' yuyagaa' tewaanya mwaaladelyi. Wapaaya nimi wijaaviwija' nimire miwisaji'na nabaai Kwaakevaki mwaalyaraavina miwita saj' muba'muji Kwaakevaki mwaalyaraavi gaalyabwi wi maaridezikira.”

⁵² Sara widakevidaa'nyi Juyara maanga naanga dinyina yeva yiwaara'nyi na “A'mwe dai gannya miwisaji' nya'ne' gara nejaavannelaka!”

⁵³ Sarevidaa'nyi Jizaazai wi dina “Naanga nebulya'na yithithivanige. A'mweraavine Kaimiraayare miwisajisi gamire tawesi manyi yija' sahwaiginyi gaalyabwi kininnakeigi mi'. ⁵⁴ A'mwei nimire miwisaji' nyina, nimire tawe' najai yuyagaa' yuyagaa'ne gaalyabwi kininnakelyi. Yirika Aayagaa' sai baryari yidikaavidelyi. ⁵⁵ Sare' dare'nesti. Nimire miwisaji' wapaaya nebulyasi. Nimire tawe' aalya nyinya'ne nebulyasi. ⁵⁶ A'mwei nimire miwisaji' nyina, nimire tawe' najai ninyi wilamwaaina nyadelyi. Sari wilamwaaina yidelyi. ⁵⁷ Nimmwai yuyagaa' gaala mwaaida mwaalikei nyidasaabakeinyi Nimmware diraginya'na mwaaihevaabi' a'mwei nyinajai nimire diraginya'na mwaaladelyi. ⁵⁸ Sigunyavidaa'nyi Wapaaya sai walaabakelyi. Ne sinnawinyara wapaaya manaaya' neva balyaasa' wapaaya sabaai bita' mika! A'mwei Wapaaya sai najai yuyagaa' yuyagaa' gaala mwaaladelyi.”

⁵⁹ Anga Kaapaniyami Juyaraavire lotuangevi wijiwaakina yada yuya sa sara wida'.

A'mwera tewaanya mwaalyabwina dinikesi.

⁶⁰ Sarevidaa'nyi widake' gamirera kwalaal-yara kadika wi'nyina yeva dinyina “Yagaala sa taangesi. Aai wi'noji daapadevaka!”

⁶¹ Jizaazai gannya simunyavi dara yawirake' “Nimire mididivisara savina kinimyagaala yivanigasara daaka!” Sara daka wida'na “Yihithiwe'na sarimire simunyaburi navika galayigala jhyiwaka! Niminyi dinyasi'nyideihi daaka?”

⁶² Sarevidaa'nyi sinnawi A'mweraavine Kaimiraayai mwaalakewinna ayina yilaawina kyoji sarimi wangabiza' sagaa' garevaka!

⁶³ Yuyagaa'ne gaala sabwi Gotiyare Kuryai yihizaavadelyi. A'mweraavire miwisajiki

dimaaryidevwina mi'. Yagaala sa niminyina yihithivanige sa Gotiyare Kuryaina yihithivanige. Yagaala sa gaalyabwinenna yihithivanige.

⁶⁴ Sare kiri' sarimi pwaihi manyilimwagyivanigasaihi mwaaiha'.” Sare' dare'nesi. Aayawidaasi Jizaazai malimwagy yipijaraavina mena yawirake' nabaai sinnawi “Yinagaawai yikamaangeraavi niminyina wibwaridaakwadei daaka!” mena yawirakelyi.

⁶⁵ Sai widaka wida'na “Sarevi dara yihithiwa. Nimwai aane pware kware sidusavi ‘Jizaazari dimidina!’ yawita mwaki yaja' niminyawinna a'mwe sai mabi yannelyi.”

⁶⁶ Sarevi gamirera kwalaalyara gaminyi yagalya'maveva ayina wina. Yuyagaa' gamiji ayina myamari ye'.

⁶⁷ Sarevidaa'nyi

Jizaazai gamirera sivilyiraai ata puridaa'nyi pwaraalyaraavi widina “Nabaai, sahwaihi dinya'mayideihi daaka?”

⁶⁸ Saaimoni Pitai ja'nawidina “Naangeigi, aaryawinna wawaadeinaavaka! Aawa, yuyagaa' yuyagaa'ne gaalyabwine yagaalya kininnakeiginyi. ⁶⁹ Gilmwaga'manigo. Giminyina dara yawi'mwo. Gotiyare Tewaanaangeiginyi. Girika maayaiginyi. Sara yawi'mwo.”

⁷⁰ Jizaazai ja'nawidina “Sivilyiraai ata puridaa'nyi pwaraalyaihiri dahlakeihi daaka! Yo, sare' sariminyidaa'nya pwai yimakeyi.”

⁷¹ Saaimoni Yizikeriyotiyari gawaali' Juthaazarina widina ya'. Sare' dare'nesi. Jizaazarei a'mwe atiraai sivila puridaa'nyi pwaraalyai Juthaazai kwalyi mwaaleva kiri' divi maalikégaa' yikamaangeraavina Jizaazari wibwaridaakwadelyi.

7

Jizaazalyi gya'mwerari kidarakaav'nesi.

¹ Sare mena kyima'na' Kwaaka Galili saba Jizaazai kaanya yamarina. Sare' dare'nesi. Juya naangera dinyina “Jizaazari tamakaana!” dinyina yesa'na gamire simunyavi “Kwaaka Juthiya kaanya myamari yidera.” ² Sagaa' Juyara “Aya kigaa' Tika Munne Siminange' munne' naadesi,” desagaaki. ³ Sarevida'nyi gamire gya'mwera gaminyina mu'nyadivi' widina “Nimi naangeinyi daakaji, dava ya'mava'giri Kwaaka Juthiya diwodera. ‘Naange

yivanigenna nimirera tinna wangabika!
da'gizɪ dɪwodera. ⁴ Sare' dare'nesi. Aane
pwai kwai yawi'na 'Yuyara nyangabika!
daka yinike' lika myulyarivanɪ'. Sara yija
kwaaka yuyavaki ku'maayaba sara jithera,"
wide'. ⁵ Sare' dare'nesi. Pwara gaminyina
"Naangelyi," malimwagyesa' nabaai, gya'mwera
malimwagyese.

⁶ Sarevidaa'nyi Jizaazai widina "Nyidiwaasa'
niminyine tewaanyagaa' myima'nyiwa'.
Yuyagaa' sariminyine tewaanyagaa' warɪ'.

⁷ Kwaakevaki mwaalyara sariminyina
sinna tika mudayi yipineihɪyi. Kiri' nɪmi
'Sarimire yadivisabwi kayaa'nanaangebulyi,'
wɪjalikurakivanige'na a'mweraavi niminyina
sinna tika davina yivanikere. ⁸ Tika munne'
nɪpi'dewi jilaawila! Dahaa' Munne savi
milaawiwina! Nɪmire tewaanyagaa' yuna
myima'nyiwa'." ⁹ Sara widina yaka Kwaaka
Galili pizɪ'gwa mwaalina ya'.

*Ne sinnawinyara siminya yamwalyaasaviya
Munnevi Jizaazai mwaalake'nesi.*

¹⁰ Munnevi gya'mwera mena wawesagaa'
Jizaazai mwaalina yaka savina kave wina.
A'mwe kwala naangeraji mwiyi. Aawa. Dɪvi
kima'nyikaanyabi' kave wina. ¹¹ Sarevidaa'nyi
Munnevi Juyara yaamiji birina yeva
yiwaara'nyiina "Gava mwaalika?"

¹² Kwala bwa'naanyavi a'mwera gaminyina
a'mabyahaala dinyina dinyina. Pwara widina
"A'mwe nawɪ'nyalyi." Pwara widina "Sare'
mi'. Aawa, a'mweraavi kwaasi widadelyi."

13 A'mabyahaala dînyîna yeve' kirî' Juya naangeraavîna lîka yesa'na ku'maayaba aane pwai kwai muji ya'.

14 Munnevi tinnyagaa' Gotiyare Angevi Jizaazai wîlaawîna yaka wijiwaakîna.

15 Wijiwaakîna yadaa'nyi Juya naangera atîka maru'na'na yadivi' dînyîna “Nemîre sikuliyangi myake' sîduta naange' gara yawîramaaarakalaka?”

16 Sarevidaa'nyi Jizaazai ja'nawîdîna “Wijiwaakadînya' nîmîre wijiwaakya' mîka! Aawa. Wijiwaakya sa' Nyîdasaabakeresi.

17 Pwai kwai gannya sîdusavî dîna ‘Gotiyai sara kanedozi sara nebwîna yîma!’ Dîna yaja' yawîta kirî' dathelyi ‘Gotiyai Jizaazari wijiwaakya' kujaava' Jizaazai sara nejiwaakîvanîkelyi.’ Nabaai yawîta pirî' dathelyi ‘Jizaazai gavei yawîraka yaasiwa'na nejiwaakîvanîkelyi.’

Yi Gotiyare simunyavi mîdînajai sîdusavî diraginna dara yawî'na yade' ‘Ai, Jizaazare nejiwaakade' Gotiyarîdaa'nya' daaka!’

18 A'mwei gannya sîdusavidaa'nyi gannyabwi a'mweraavi wîdada ‘Nîmînyîna a'mwera dînipîka! “A'mwe sai naangelyi,” sara dînipîka!’ yawî'delyi. Sara yada kirî' pwai yawî'na ‘A'mwera nyîdasaabakerîna dînipîka! “Gotiyai naangelyi. Byaannakelyi,”

’ yawî'na yada nebulyabwi dadelyi. Sai nadiyabwi gamînyi mwari’.

19 Ne Mozîzai Kîwînya' yîhîzayaakei daaka! Yîhîzayaaka kirî' sarîmîjiya aane pwai kwai Kîwînya' dînîkebwi myadelyi. Nîmînyîna dînyîna ‘Sarî tamakaana!’ Sa'na baa'na dîmanîgataihîlaka?”

20 Kwala bwa'naanya sa' ja'nawîdîna “Yîmakei

gimwaalikeigi! Aai giramakajiwaka!”

21 Jizaazai ja'nawidina “Kwazaakegaa' diraginya pir'i' kye yuyaihi atika maru'na'na yesaihilyi. 22 Ne Mozizai din'i' 'Sawita ati ata puridaa'nyi' pir'waalyi' kajinnoji' ginnya kaimiraayare kilaakeji' dithako!' Dinike'na pigaa' Kwazaakegaa' kaimaleri' davesaihilyi. Sara yadivi' 'Tewaanyasi,' dadiviki. Sabwi sinnawi Mozizai yakebwi mi'. Aawa. Sinnawi kigaa' waryaakebulyi. 23 Sarimi dinyina 'Kilaaka daya'na Mozizare Kiwinya kayaaka nyigalaadika! Kwazaakegaa'na yawita myaanna! Kwazaakegaa' kaimaleri' kilaakeji' davaadeinera.' Sara dinyina yadivi' Kwazaakegaa' nabalnakeri' maamidarya yinahu yidikaaveinyina sinna tika be'na yitha'mwaka! 24 Sare'na sarimi mwasimaginya' tinna wanganna yadivi' mipina! Aawa. Yawibwata yida'maraangebwi nayaa jila!”

“Kiraazitiyai daaka?” dinesa'nesi.

25 Sarevida'nyi' Anga Jeruzaalemi' mwaalya pwara dinyina “Sarina 'Tamakaana!' dīmanigasai daaka! 26 Yithaa, ku'maayaba a'mweraayaba widivanikelyi. Maiyagaala aane pir'i' kiri' yuyara mujivaniga'. Niwaava, a'mwe naangera mena dinyina 'Sai Kiraazitiyalyi. Gotiyai dahilakyaakelyi,' nayaa dinyina yivanigasara midingaka! 27 Sare'na kiri' Kiraazitiyai kabozī aane pwai kwai gaminyina dinyina 'Gawidaasi biwakalaka! Aawa,

myawiriyadaanyaine.' A'mwe dai bakewinna yuyaina yawi'mwo."

²⁸ Sarevidaa'nyi Gotiyare Angevi Jizaazai wijiwaakakegaa' sagaa' naangave'na widina "Niminyina tivi yawi'mwaasainyi daaka! Nimi bahewinna jawi'manigava! Nimi sainyi sidusa' yawirena mabye. Aawa. Nebulyai nyidasaabakei sahwarì myawiranganyadivisalyi. ²⁹ Kiri' sai kanyidasaaba' gaminyawidaa'nyi bahe'na sari yawi'manige."

³⁰ Sarevidaa'nyi a'mwe naangera dina "Jizaazari wila pwiyawaa'ji kalavuzavi wakaana!" dina yeva yaamiji yina yina yeva Jizaazare balya'negaa' kuna mima'nyi yake'na aane pwai kwai magalalimwagi ye'. ³¹ Kwala bwa'naanyavi a'mwe kwalaalyara gaminyi limwanna yeva dinyina "Kiraazitiya kwai bozi dahware yijiwaainya yivanike wavila'na yadei daaka! Aawa."

Jizaazarì wila pwiya'na damera wawesa'nesi.

³² Kwala bwa'naanya' sangi Jizaazarina a'mabyahaala didaapi A'mwe Periziyara kadika wi'nyina yeva "Sahwarì wila yipika!" deva sahwaraji Gotiyarine tamira'divita naangeraji sara Gotiyare Angevi dameraavi widaasina.

³³ Sarevidaa'nyi Jizaazai kwala bwa'naanya' widina "Pizi'gwa sariminyaba mwaala'muji divi nyidasaabakeryawinna kaanya wideinyi.

³⁴ Niminyina 'Tinna wanganaana!' dizide' kiri' mabiramaari dinyideihilyi. Sagaa' mwaaimujawinna mwiyi jideihilyi."

³⁵ Sarevɪdaa'nyɪ Juyara naangera dɪnyɪna
 “Mabɪramaari yaanne'na gawɪnnelaka?
 A'mwe Gɪrikɪyaraavɪre angengɪ Juyara
 mwaaɪdɪvɪsangɪna wawojɪ Gɪrikɪyaraavɪ
 wɪjɪwaakadei daaka? ³⁶ Nediwa' 'Nimɪnyɪna
 “Tɪnna wanganaana!” dɪzide' kɪrɪ'
 mabɪranyɪmaari dɪnyidera. Mwaaɪmujawɪnna
 mwɪyɪ jideihɪlyɪ.' Sara nediwake' be yagaala
 nediwaka?”

*Aalya nawɪ'nya walyuna yadenna gaalyab-
 winengɪnesɪ.*

³⁷ Munnevi aayagaa' sagaa' naangegaaki.
 Sagaa' Jizaazai daavɪna yaka naangave'na
 wɪdɪna “Pwai kwai aalya'na mɪjɪka wɪajai
 nɪmɪnyawɪnna bozɪ nadelyɪra. ³⁸ Gotɪyare
 bukuya' nɪmɪnyɪna dɪnɪkabaaiɪ' 'Pwai
 lɪmwanna nyada gamɪre munyavɪdaa'nyɪ aalya
 gaalya'ne walaawɪna yadengɪra.’ ” ³⁹ Jizaazai
 nabaai Gotɪyare Kuryarɪna wɪdɪna. A'mwera
 Jizaazarɪ lɪmwanna yadɪvɪ' maalikɛgaa' kumɪre
 munyangɪ Kuryai maapi'delyɪ. Sare' dare'nesɪ.
 Sagaa' Jizaazai mabalyɪ yaka madɪkaayɪ yaka
 Nawɪ'nyaba byaannakei kuna myɪma'nyake'na
 Kuryaregaa' mɪ'. Dɪvi Jizaazai yɪlaawɪna kya'
 Kuryarɪ wɪjaayagaa' yɪma'nakegaakɪra.

A'mweraavɪre yawɪta jaapainanya'nesɪ.

⁴⁰ Kwala bwa'naanyavɪ a'mwe pwara yagaala
 sa kadɪka wɪ'nyɪna yeva wɪdɪna “Nebulyasɪ.
 Gotɪyarɪ wɪ'nawɪjɪwaakadei pɪropetɪya kwarɪna
 yemwaaɪmanɪgolyɪ.”

⁴¹ Pwara wɪdɪna “Sai Gotɪyai dahɪlakyaakei
 Kɪraazɪtiyalyɪ.”

Widina yesa' kiri' pwara widina “Niwaava, Kiraazitiyai Galilidaa'nyai daaka! ⁴² Gotiyare bukuya' dini' ‘Kiraazitiyai Ne Devitimire yisavaakidaa'nyalyi. Nabaai, Deviti mwalyaakeba anga Betilemi saba Kiraazitiyari ganaange' maaradelyi.’ Sara dinike' daaka!” ⁴³ Sarevida'nyai kwala bwa'naanyavi jaapalya' yima'nyina. Pwara Jizaazarina yilaaya yadaapi pwara yilaaya mi. ⁴⁴ Pwara yawi'na “Kalavuzangevi wimwaihaana!” yawi'na yeve' kiri' aane pwai kwai ata magalalimwagi ye'.

Juya naangera Jizaazar+ mu'nyesa'nesi.

⁴⁵ Sarevida'nyai Gotiyarina mubithika yira'divita naangeraji A'mwe Periziyaraji widaaseta saraayawinna damera ayina wina kye' sawara yiwaara'na “Gaminyi mamakabyi be'na yiwaava?”

⁴⁶ Damera ja'nawidina “Pwara manjesare da-haa' a'mwe nedivanikabaai!”

⁴⁷ Sarevida'nyai Periziyara ja'nawidina “Gamire kwaasi yagaalya'na ‘Nebulyasi,’ dathiwaa!” ⁴⁸ A'mwe naangeraji Periziyainaji sainaavidaasai pwai kwai gaminyi limwamanikei daaka! ⁴⁹ Aawa. Kwala bwa'naanya da' Ne Mozizare Kiwinya' myawiryeva gaminyi yaasiwa'na limwamanigasa'na Gotiyai Dikeyi sawaraavi marasi'naderera.”

⁵⁰ Nikothimaazai kumijiyai mwaalina. Sinnawi Jizaazaryawi sai angyiri'maata yakelyi. Sai mwaalina yada ⁵¹ widina “Nabaai, ‘Yaasiwa'na kotiya' ja!’ madinyika nemire

kîwînya'. Dara dîni' 'A'mwere yagaalya nayaa wi'nyîna ya'gîzî gamîrebwîna nayaa yawîra'gîzî dîvî sagaa' kotîya'na "Kayaa'nanyaigî," dîzîda'deigînyî," wîda'.

⁵² Kumi' ja'nawîdîna "Nabaai, Galîlîdaasaigî daaka! Gotîyarîna yîda'nîkengî nayaa wangana'gîzî dara jawî'de' 'Pîropetîya pwara Galîlîdaa'nyara yîma'nîpî'dera daa!' "

⁵³ Sagaa' wîna. Gazaizai gannya angebannelyî.

8

A'mwe ata lîmwagakevînesî.

¹ Kunnya angengîna wîna kye' Mugunya Wolivna Jîzaazai yîlaawîna. ² Yîlaawîna yaka yuna mwanyavî yîrike' purakegaa' Gotîyare Angevîna ayîna wîna. Ayîna wîna kya' gamînyawîna a'mwe yuyara yî'bwa'na yîna kye' Jîzaazai walamwaaina yîna yaka wîjîwaakîna. ³ Wîjîwaakîna yadaa'nyî Juyaraavîre Kîwîjarari Perîzîyarari sara a'mwevî makulaabîna. A'mwe sa' pwari' ata lîmwadaa'nyî galalîmwanna yesasî. A'mwevî makulaabîna yeva a'mwe yuyaraayaba tînniyaba wîmwaaihîna. ⁴ Mi'na wîmwaaihîna yeva Jîzaazari wîdîna "Wîjîwaakyaigî, a'mwe da' ata lîmwagyawaalîkevi' pwara galalîmwagyawaaiha'. ⁵ Nemîre Kîwînyavî Ne Mozîzai dakînike' 'A'mwe' ata lîmwagaza' tamakya'na sîlyajî dîlîwakyidesî.' Sarevîdaa'nyî gîmî gara dadînyaigînaka?" ⁶ Kumi' yawî'na "Jîzaazari yaamîjî yîjîwalaana! 'Sai kayaa'na wîdîna kyojî kotîya' jîna yaana!' dara wîdaana!"

yawi'na yeva wi'dina. Wi'dina kye' kiri' Jizaazai walaruta'nyina yaka kwaakevi gannya asilyi pikarya yida'na. ⁷ Pikarya yida'na yadaa'nyi kumi kwara daavina yeva kuna yiwaara'na kye' sai daavina yaka wi'dina “Sarimijiyai pwai dina ‘Kayaa'nanyasi,’ dina yoji yuyagaa'na kayaa'nanya myade sai sahwaidda'nyi silya' liwakadelyi.” ⁸ Wi'dina yaka ayina walaruta'nyina yaka kwaakevi pikarya yida'na. ⁹ Pikarya yida'na yadaa'nyi wi'dakevi kadika wi'nyina yeva kunnya kayaa'nanya yawireva yuyara ya'ma'na. Pwai wina, pwai wina, sara ya'ma'na. Sinnawi a'mwe naangera wina, divi a'mwera wina, divi miginyara wina. Yuyara ya'ma'na kye' Jizaazai gavei mwaalina. A'mwe' tinnyaba daavina yadi'nyiyasi Jizaazai gavei mwaalina. ¹⁰ Gavei mwaalina yaka daavina yaka a'mwevi wi'dina “A'mwe'gi, gawi mwaaiha! Yuyara ‘A'mwe kayaa'nanyasira,’ gizardaveva sila magiliwakiwaatara daa!” ¹¹ A'mwe' wi'dina “Naangeigi, aawa, aane pwai kwai mika!”

Jizaazai wi'dina “Nabaai, sara yiwaasa' nimiji sara magizida'muna! Wawa'gizi kiri' da-haa'daasi kayaa'nanyabwi ayina minna!”

Kwaakevakina Jizaazai di'baaker'nesi.

¹² Sarevidaa'nyi Gotiyare Angevi kwala bwa'naanya' mwaaidapiyaraavi Jizaazai ayina wi'dina “Kwaakevaki mwaalyaraavire Baakeinyi. Pwai nyimidinaaboz jihinnyavi kaanya myamari yadelyi. Arikewi. Aawa. Sahwai Gaalya'ne Baakei kininnakei mwaaladelyi.”

13 Sarevida'a'nyi a'mwe Perizi'ya'ra wi'di'na "Gi'mi sahwaiginyi'na nejalikuraki'waanya' yaasi'wa'na nedi'waa. Sabwi gaveigi' dadinyaigire jalikurakya' nebula' mi'."

14 Jizaazai ja'nawidi'na "Aawa, nini'nyina yihizalikiraki'wija' kiri' nini're yihithadinyi' nebulyasi. Kaanya bahevida'a'nya' yawi'mwe' kaanya widewinnya' yawi'mwe'na nebulyasi nini're yagaalya'. Kaanya bevida'a'nya' sarimi myawiriwaasa' kaanya widewinnya' myawiriwaasa'nanyi. 15 Sarimi a'mweraavirebwi kilaakejisiyabwi yawi'divi' yawibwa'divisaihi'lyi. Dahaa' aane pwar' kwari kotiya' myawibwarivanige. 16 Kiri' yawibwa'muja' nini're yawibwata sa' nebulyasi. Gaveinyi mi'ka. Aawa. Nimi'ji nyidasaabakelyi' sainaai widakade'na nebulya' widadinyainyi' nini'. 17 Nabaai sarini're Kiwinya' dara dinikesi. A'mweraare jalikurakya' nebulyasi. 18 Sara dinike'na nini'nyina yihizalikirakivanige', nabaai, nyidasaabakei Nimwai nini'nyina nayaa yihizalikirakivanikelyi."

19 Sarevida'a'nyi kumi yi'waara'na "Gi'maamaangei gawi mwaalika?" Wi'di'na kye' Jizaazai ja'nawidi'na "Sarimi nini'ny' myawiriwaa'. Ni'maamaangeri myawiriwaa'. Nini'nyina yawipija' Nimwarina kyawipidika!"

20 Gotiyare Angevi ku'dika Gotiyarina nigwibukusa wa'di'nyiyaba Jizaazai wijiwaakada yagaala yuya sa wi'di'na. Sara widakeri aane pwai kwai kalavuzana magalalimwagi. Gamiregaa' balya'negaa' mima'nyi yake'na magalalimwagi ye'.

*“Nimi wiwijawinna diwideihi mi’,”
widake'nesi.*

²¹ Sarevīdaa'nyi Jizaazai ayina wiđina “Kaanna kwawa'muri sarimi yaasiwa'na birina nyapiji kiri' sarimire kayaa'nanyaburi divalyideihilyi. Nimi wiwijawinna sarimi mabyi yipineihilyi.”

²² Sarevīdaa'nyi Juyara naangera dinyina “Neminyi ‘Nimi wiwijawinna sarimi mabyi yipineihilyi,’ wiđina neyiwake'na gaminyi tamakinadei daaka? Gara nediwaka?”

²³ Sara dinyina kye' sai wiđina “Sarimi dava kwaakewinyangīdaa'nyaihilyi. Nimi Munyabadaa'nyainyi. Kwaaka davakīdaa'nyaihilyi. Kwaaka davakīdaa'nyainyi mi'. ²⁴ Sarevīdaa'nyi dara yihithiwe. Sarimire kayaa'nanyangi divalyideihilyi. Sare' dare'nesi. ‘Mwaaiheinyi niminyira,’ yihithivanige' malimwagyi yipijaihi sarimire kayaa'nanyangi divalyideihilyi.”

²⁵ Sarevīdaa'nyi kumi wiđina “Be-waiginaka?” Sara wiđina kye' Jizaazai wiđina “Aayawīdaa'nyi yihithadinyainyi.

²⁶ Yagaala kwalaalya yihithiwijaihilyi. Yadiwita kwalaalyangina yihithiwijainyi. Sarengina yihyawibwa'mujainyi. Sare' kiri' nyīdasaabakei nebulyalyi. Nyīdiwake yagaala sa kadika wī'nadi kwaakevaki mwaalyaraavi widadinyainyi.”

²⁷ Ganīmaangerina widake' sidusa myawirina.

²⁸ Sarevīdaa'nyi Jizaazai wiđina “A'mweraavine Kaimiraayari makilarimwapiji dara jawiride' ‘O, Jizaazai neda' “Mwaaiheinyi niminyira,” nedake' nebulya' daaka!’ Nabaai ‘O, gaminyi

simunyavi aane pir+i' kir+i' mij+vanika!' Aawa. Nimwai sara nyij+waaki+wakabaaibi' nayaa sare yihithivanige. ²⁹ Nyidasaabakei nimiji mwaaidelyi. Nyidasaabakei yilaaya yade yuyagaa' sara yad+nya'na nimi gaveinyi manya'mayiwakelyi."

³⁰ Yagaala sa Jizaazai widake a'mwe kwalaal-yara kadika wi'nyina yeva gam+nyi limwanna yesalyi.

*Yaasiwa'waw+nyaraav+naji a'mwe
dirag+nyaraav+naji'ya'nesi.*

³¹ Sarevidaa'nyi Juyara Jizaazari limwanna yesaraavi Jizaazai wid+na "Nimire yagaalyavi sara mwaaibizaihi nimireihi nebulyaihi dimwaalyideihilyi. Sara yapiji nayaa d+nyim+d+nyideihilyi. ³² Nimire nebulyabwi yipijaihi nebulyabwina sarimire yaasiwa'waw+nya yih+marasi'nadengira."

³³ Kumi wid+na "Ne Eviraamimire yisilyaina. Gamire kaimiraayainera. Yuyagaa' yaasiwa'waw+nya myadaa mwaihoinera. 'Sarimire yaasiwa'waw+nya' yih+marasi'nadengira,' nediwaanya be yagaalavaka?"

³⁴ Jizaazai ja'nawid+na "Naanga nebulya'na yihithivanige. Gazaizai kayaa'nanyabwi yada kayaa'nanyabwine'na yaasiwa'waw+nyalyi.

³⁵ Yaasiwa'waw+nya kwai yuyagaa' yuyagaa' angevi mamwaalyadelyi. Gawaali' yuyagaa' yuyagaa' angevi mwaaidelyi. ³⁶ Sarevidaa'nyi Gotiyari Gawaali' sarinnya yaasiwa'waw+nya kyihpalasi'noji dirag+nyaihi nebwin

dīmwaalyideihilyi. ³⁷ Sarinnya kilaakejikana 'Eviraamimire yisilyaihilyi,' yawi'mwa. Sa'na kiri' niminyina dina 'Nemire sidusangi gamire yagaalya' mulannera!' dina yadivisa'na 'Sari tamakaana!' dinyina yivanigasaihilyi. ³⁸ Nimwaryaba yawirangane sara yihithivanige. Sarevidaa'nyi sirinimaangeri wi'neva sara yivanigasaihilyira."

³⁹ Kumi ja'nawidina "Aawa, Ne Eviraami nenimaangelyi. Sahwalyi." Widina kye' Jizaazai widina "Eviraamimireihi mwaabizi kwaji Eviraami yaake avaalyabwi kypidika! ⁴⁰ Yuyagaa' Gotiyari kadika wi'nena nebulya' sara yihithadinyainyi. Sara yadi kiri' niminyina dinyina 'Sari tamakaana!' Sabwi Eviraami myina. ⁴¹ Sirinimaangei yadevwi yivanigasaihilyi." Sara widina kya' kumi yarai widina "A'mwe yaasiwa' maryawakidivi' nemwaaihinkeina mi'. Nenimaanga gavei kininnakeine Gotiyai."

⁴² Jizaazai widina "Gotiyai sirinimaangei neb-wina mwaalaji kwaji niminyina kyihivu'nadika! Sare' dare'nesi. Gotiyaridaa'nyainyi walaabina yena dava mwaihe. Sare' dare'nesi. Simunya nimirevidaa'nyi bina yeinyina mi'. Aawa. Gotiyai sahwai nidasabakeinyi."

⁴³ Yagaalya' yihithivanige' myawiramaari baa'na yivanga'? Nimire yagaalya'na sarimi mu'nyi yipineihilyi. Sarimi dinyina 'Kadika mu'naannera!' ⁴⁴ Sirinimaangei Kotiya' Jadereihilyi. Sirinimaangere yawisaji gamirebulyi sangina dinyina 'Sabwi yaana! Nevu'nivanikebulyi.' Sahwai sinnawidaa'nyi

a'mweraavi tamakadelyi. Gamire sidusavi
 nebulya' maaya kunesi. Sare'na yuyagaa'
 nebulyaburi madaayadelyi. Sare'na yuyagaa'
 nebulya'na sinna tika wida'delyi. Kwaasi
 yagaalya' dadei gami sahwarebwi yadelyi.
 Kwaasi yagaalyaburi gyakwalaangelyi.
 Sare'na kwaasi yagaalya' dada gannyangi
 dadelyi. ⁴⁵ Nebulya' yihithadinya'na
 manyilimwagyadivita gamireihilyi.
⁴⁶ Niminyina nebwin aai widiwaka
 'Kayaa'nanyabulyiyalyi!' Aawa. Nebulya'
 yihithadi malimwagy baana nyadivitaihilaka?
⁴⁷ Gotiyaridaa'nyai Gotiyare yagaalya kadika
 wi'nadelyi. Sarevi sarimi Gotiyaridaa'nyaihi
 Gotiyareih mamwaalyigasa'na yagaala sa
 mu'nyivanigasaihilyira."

Jizaazalyi Ne Eviiraamiji saraarines.

⁴⁸ Juyara Jizaazari ja'nawidina "Giminyina
 'Sai kayaa'nanyai Kwaaka Sameriya mwaalyalyi.
 Yimakei kininnakelyi,' nebwin sara dinoina
 daaka!"

⁴⁹ Jizaazai ja'nawidina "Yimakei maayainyi.
 Aawa. Nimaamaangerine yaya' munyaba
 makidinyainyi. Sara makidinya kiri' niminyine
 yaya' marulawakadivisaihilyi. ⁵⁰ 'Nimi
 a'mwe naangeinyi, byaannakeinyi,' majadi
 mabirivanige a'mweraavina. Aawa. Pwai
 niminyina 'A'mwe naangei byaannakelyi,' dada
 niminyina 'Nebwin dadelyi,' jawibwa'delyi.
⁵¹ Naanga nebulya'na yihithivanige. Pwai kwai
 nimore yagaalya' midinajai yuyagaa' yuyagaa'
 balyabwi mwanganyi yadelyi. Arikawi."

52 Juyara wiđina “Sare'na giminyina ‘Sarei yimakei kin+nnakelyi,’ diraginna yawi'mwo. Ne Eviraami balina yaa'. Gotiyari wi'nawijiwaakyara piropetiya balina yaa'. Sare' kiri' nediwaa ‘Pwai kwai nimire yagaalya' midinajai yuyagaa' yuyagaa' balyabwi myagaangany+ yadelyi. Arikawi.’

53 Neyakwalaanga Eviraami balyaakerina, ‘Eviraami maalikelyi. Nimi naangeinyi,’ sara danediwaa! Nabaai, piropetiya balina yaasa' gimi sahwaiginyina yawi'dinyaigi bewaiginaka!”

54 Jizaazai ja'nawidina “Nimi gaveinyi wiđina ‘A'mwe naangeinyi, byaannakeinyi,’ sara wiđina yiwija' ninnya byaannya' yaasiwa'na yima'nadesi. Sa' kunesi. Nimiinyina ‘Sai byaannakelyi,’ wiđina yade Nimaamaangelyi. Nimiwai sahwarina sarimi dinyina ‘Nimire Gotiyalyi,’ dinyina yadivita sahwałyi. Sare'na nimiinyina avaina kadipidikeihilyi. 55 Yuyagaa' gaminyi myawiramaarivanigasa' kiri' gaminyi yawiramaa'manige. ‘Sari myawirivanige,’ yihithiwiji kwaji kwaasi dadinyainyi sarimibisainyi kyima'niwidika! Sare'na gaminyina yawi'manige' gamire yagaalya' sara mididinayainyi. 56 Sirinimaanga Eviraami nimiinyina dina ‘ “Gotiyai dahilakakeregaa' wanganima!” da'muji yilaaya yiwijainyi.’ Dina yaka sare' tinna wanganaka yilaaya yina yaa'.”

57 Sarevdaa'nyi Juyara wiđina “Neigi daaka! Kwarama pwaraare sivilatiraai pware atiraalya gwavilavakeigi daaka! Ne sinnawinya Eviraamimi tinna danganye!” 58 Jizaazai

widina “Naanga nebulya'na yihithivanige. Sinnawi Ne Eviraami mima'nyagaa'daa'nyi sahwainyi niminyira.” ⁵⁹ Sarev+daa'nyi kumi “Sila liwakaana!” deva livina kye' kiri' Jizaazai yulya'na yaka Gotiyare Angevina ya'ma'na yina ya'.

9

Jizaazai tibinyari tewaanya tinnakeri yavada'galake'nesi.

¹ Jizaazai kaanya yamaryada a'mwe pware tinna wangamabina. A'mwe sari mudangegaa'daa'nyi tibinyai mwaala'.

² Tinna wangamabina kya' gamirera yiwara'na “Nejiwaakadinyaigi, tibinyarina kayaa'nanyabwi aai yake'na yima'nakalaka mudangegaa'? Sahwai kayaa'nanyabwi yakei dingaka? Gaminyi ganimaangeyoi kayaa'nanyabwi yagilyayoi dingaka?”

³ Jizaazai ja'nawidina “Tibinyai mwaalike'na gamire kayaa'nanyaji ganimaangeyore kayaa'nanyaji sangina mika. Aawa. Tibinyai mwaalike'na Gotiyai ‘Gaminyina nimire wawinyanna wijiwaainima!’ daka sara ya'nesi. ⁴ Yirike' pu'daa'nyi nyimaryasaabakere wawinya kuna yaanneinera. Divi aane pwai kwai wawinya mi yannegaa' jinnadesi.

⁵ Kwaakevaki mwaaidi kwaakevaki mwaalyaraavine Baakeinyi.”

⁶ Jizaazai mena widina yakegaa' kwaake' maaraka kwaakevi maagwala wiraa'mavaka maagwalyasi kwaakesi yamwaaihaka a'mwere

tinnyaraari araka marayepuraka ⁷ widina
 “Aalibunya Silowamiyawinna wawa'giri ginnya
 sinnya' aalya jinana!” widina. Yaya' Silowami
 “Maryasaawinikevi,” dinikesi. Sarevidaa'nyi
 a'mwei wawaka gannya sinnya' aalya yinaka
 tinna nayaa wangada ayina bina ya'.

⁸ Sarevidaa'nyi gamire ange' avaalyaba
 mwaalyaraji sinnawi sai “Nigwia nyijaama!”
 widadaa'nyiyari tinna wangesaraji
 yiwaara'nyina “Walamwaaina yada a'mweraavi
 'Nigwia nyijaama' widadei midaaka?”

⁹ Pwara widina “Sahwalyi,” widina yesa' kiri'
 pwara widina “Aawa, sai mika! Saibisalyi.”
 Sara dinyina yadaapi a'mwe sai widina
 “Sahwainyira.”

¹⁰ Sarevidaa'nyi kumi
 yiwaara'na “Ginnya tinnyaraai tewaanyaraai
 wa'di'nyi gara yima'niwaka?”

¹¹ Gami
 ja'nawidina “A'mwe Jizaazai wo'nikei araka
 yamwaaihaka ninnya tinnyaraari maranyiraka
 nyidiwa' ‘Silowamiyawinna wawa'gizi

ginnya sinnya' aalya jinana! Sarevidaa'nyi
 kaanya wina yena yiniwegaa' sagaa' tinna
 yarai wangamweinyi.”

¹² Sara widina kya'
 kumi yiwaara'na “Gawi mwaalika?” Gami
 widina “Aawa, sarina myawiriwa. Gawi
 dhamwaalika?”

Periziyara tibinyari kave yiwaaravesa'nesi.

¹³ A'mwe Periziyaraayawinna a'mwera kigaa'
 tibinyai mwaalakeri yibwaramakuna. ¹⁴ Jizaazai
 araka yamwaaihaka gamire tinnyaraai
 “Yenana!” dakegaa' Juyaraavire Kwazaakegaaki.

¹⁵ Sarevidaa'nyi Kwazaakegaa'na Periziyara

yíwaara'na “Tinna tewaanna wangamaniginya' gara yaginaka?” Yíwaara'na kye' sai widina “Nimire tinnyaraari araka piri' kamaranyi'mwa' ninnya sinnya' aalya yinena, yithaa, tinna tewaanna wangamanige.”

¹⁶ Sarevidaa'nyi Periziya pwara widina “Kiwinya Kwazaakegaa' myade'na a'mwe sari Gotiyai maryasaabakei mika. Tewaanyai mika!” Widina kye' kiri' pwara widina “Sabwi yijiwaainya yakebwi a'mwe kayaa'nanyai gara yannelaka! Tewaanyai dingaka?” Sara dinyina yeva kuminyi jaapainyina yadivi' maanga dinyina ye'.

¹⁷ Sarevidaa'nyi pigaa' Periziyara a'mweri ayina yíwaara'na “Nediwaa 'Nimire tinnyaraai tewaanyaraai wakiwa'.' Nabaai, nediwaanya' sarina beriva nedivanigi?” A'mwei widina “Gotiyari wi'nawijiwaakyai piropetiyalyi.”

¹⁸ Sarevidaa'nyi Juyara naangera siduta ge' ge' yawi'na yeva dara mu'nyi yesa' “Ai, sinnawi tibinyai mwaalaka dahaa' tinna nayaa wangamanikei daaka!” Mujevegaa'na pwaraavi widina “A'mwe dari ganimaangeyorina dimaraawila!”

¹⁹ Sawinna bina kyagi a'mwe naangera yíwaara'na “A'mwe dai kiribwaalivaangei daaka? Mudangegaa' 'Tibinyai daaka!' dathahi? Sarevidaa'nyi dahaa' tinnya' gara yaka wangamanika?”

²⁰ Sarevidaa'nyi neyoi ja'nawidina “ ‘Sahwai nehiri' bwaalivaangelyi. Mudangegaa' tibinyai maarolyai daaka!' yawi'manigoi. ²¹ Sare'na dahaa' tinna wangamanike'na myawirivanigoi. 'Tinna jena!' widiwakeri mwanganya'naalyira.

Gaminyi jiwaarayila! Nehiribwaalivaangei a'mwelyi. Sahwai gaminyina yihithathelyi."

²² Juya naangeraavina lika yadisa'na neyoi sara widina. Sare' dare'nesi. Juya naangera mena dinyina "Yo, pwai kwai widina 'Sahwai Kiraazitiyalyi. Gotiyai dahilakyaakelyi,' widina neyajai nemi widina yaanneinera 'Nemire lotuangengi muidinna! Maaveiginyi.' " ²³ Mena dinyina yesavidaa'nyi lika yagila sara widina. Neyoi widina "A'mwelyi. Gaminyi jiwaarayila!"

²⁴ Sarevidaa'nyi pigasaai a'mwei mudangegaa' tibinyai yima'nakerina ayina jaka widina yeva gaminyi widina "Gotiyai gwanga-manikerina 'Byaannakelyi,' duthana! Sare'na nedana! A'mwe sari nediwaanyai 'A'mwe kayaa'nanyalyi,' nayaa sara yawi'manigo."

²⁵ Sarevidaa'nyi a'mwe sai ja'nawidina "A'mwei nawi'nyai dingaka? Kayaa'nanyai dingaka?" Sare' myawirivanige. Gave pirina yawi'mwa 'Kigaa' tibinyainyi mwaale. Dahaa' tinnakeinyi tinna wangamanigeinyi.' Sara yawi'mwa."

²⁶ Sarevidaa'nyi kumi yiwaara'na "Giminyi gara gyaka? Gara yaka 'Tinna jena!' githiwake'?" ²⁷ A'mwei ja'nawidina

"Mena yihithiwa. Sara yihithiwe' kadika mu'nyiwaataihi daa! 'Savi kadika wi'naana!' ayina baa'na nyidiwaa'. Sarimire simunyavi 'Gamireina yima'naana!' dimanigasaihi daaka!"

²⁸ Sara widina kya' kumi sari birala widina yeva widina "A'mwe sahwareiginyi. Nemi Ne Mozizareinera. Sari mididaanyaina.

²⁹ Gotiyai Mozizari wijaake'na yawi'mwo. 'A'mwe pwai gawidaa'nyai dingaka!' nemi

myaw+iriwo.”

³⁰ A'mwei ja'nawidina “Sara nyidiwaasa'na atika maru'na'manige. Sawidaa'nyai bake'na myaw+rivanigasai ‘Tinna jena!’ nyidiwakelyi. ³¹ A'mwera kayaa'nanyabwi yadivisaraavi Gotiyai kadika mu'nyi yivanike' yawi'mwo. Aawa. Pwai kwai Gotiyarina dina ‘Naangelyi. Lika yadinyalyi. Sara nyidathe' gamire simunyavi sara yideinyi,’ daderi Gotiyai kadika nayaa wi'nyina yivanikelyi.

³² Sinnawi Kwaakevaki wakyaakegaa'daasi yuyagaa' kadika dara mu'nyadaanya' ‘O, pwai mudangegaa' tibinyai yima'nakeri “Tinna jena!” dathaka!’ Sara mu'nyadaanyainera.

³³ Gotiyaryawidaa'nyi mabi yajai Gotiyare diraginya aane piri' kiri' kyadika' mika.”

³⁴ Kumi widina “Mudangegaa' yuna kayaa'nanyaiginyi. Divi kuna kayaa'nanyabwi yadinyaiginyi. Sareigi danej+wak+waana!” Sara widina yeva lotuangevi gaminyi marasi'nyina ye'.

Simunya kayaa'na yinike'nesi.

³⁵ Jizaazai kadika dara wi'nake' “Lotuangevi a'mwerina dasi'niwaa!” Mena daka a'mweri biraama'na yaka widina “A'mweraavine Kaimiraayari dalimwaga'manigina?” ³⁶ Widina kya' a'mwei widina “A'mwe naangeigi, a'mwela divaniginyarina ‘Sahwari midinima!’ dena dinyibwaridaakwia!” ³⁷ Jizaazai widina “Gami sahwari tinna mena wangamwaa. Sai dahaa' githivanikei sahwałyi.” ³⁸ A'mwei widina “Naangeigi, gilimwaga'manigena.” Widina yaka

Jizaazaryaba kwadaai gilina yaka lotuya yina ya'.

³⁹ Jizaazai yuyaraavi widina “Kwaaka davaki nimi a'mweraavi yawibwata'na bina ye. ‘Tibinyara bi'manigasara, nabaai sara wangabika!’ dena bina. ‘Tinnakera “Nemi tewaanyainera,” dadivitar, nabaai, tibinyara yima'nipika!’ dena bina ye.”

⁴⁰ Periziya pwara gaminyi mwaalesara Jizaazai widake' kadika wi'neva yiwaara'na “Neminyina dathiwaana? ‘Tibinyaihi Gotiyarina sidusa' myawirivaniga!’ sara dathiwaana?” ⁴¹ Jizaazai widina “Tibinyaihi bi'manigasaihi mwaabizi kwaji kayaa'nanyaihi kuna mamwaalyi kyipidika! Sa'na ‘Tinna nayaa wangamanigo tewaanyaina,’ dadivi' kayaa'nanya kininnakeihi mwaaiha'.”

10

Sipizipiyaraavine kurisa'nesi.

¹ Jizaazai wida' “Naanga nebulya'na yihihivanige. Sipizipikurisavi tikuryavi mulyi yaja' kiri' kukidaa'nyi dikwosi'na yajai yi sai kukelyi. Nabaai, kuka yipalamaa'delyi.

² Tikuryavina a'mwe pwai wilaabina yajai sai sipizipiyaraavi maremwaaidelyi. ³ Sahwarina kaanyavi maremwaaidei kaanya basadaawori sipizipiyaraavi maremwaaide sai gannya sipizipiyaraavi ‘Yinagaawai! Yinagaavaiha!’ jaka widina yadaa'nyi sipizipiyara gaminyi maanguraaya' kadika wi'nyina yadaapi mwasilaanna yibwaramakwalyuna yadelyi.

4 Mwasilaa gannya yuyaraavi mena yibwaramakwalyuna yada sinnawi waanyina yadaa'nyi gaminyi midinna yadivi' gamire maanguraaya' wi'namaa'na yadivisa'na mididiviki. 5 A'mwe mudikeri mididivi' mi'. Arikawi. Aawa. Mudikerina likaanya wina. Mudikeraavire maanguraaya' yadivisa'na likaanya wina yadivisarera.”

6 Jizaazai yagaala ke'ba'nanya sa' kuda' kiri' kumi dinyina “Nediwaka sa' be yagaalavaka? Myawiriwona.”

Jizaazai sipizipiyaraavi maremwaaide tewaanyarinesi.

7 Sarevidaa'nyi Jizaazai ayina wina “Naanga nebulya'na yihithivanige. Nimi sainyi sipizipiyaraavine kaadihsainyi. 8 Yuya pwara sinnawi kukera kuka yipalamaa'divisarera. Nimi mabyahaa' kwaasiyara yihithesa' kiri' sipizipiyara nimirera kadika mu'nyi ye'.

9 Kaadihsainyi niminyira. Niminyawinna a'mwe pwai bazai kusawinna wilajai Gotiyai wivadaihasamaaradelyi. Sipizipikurisavi

sai wilaamwaaina yada mwasilaa wapaaya bwalyamaa'na yada yawinna wilina yadelyi.

10 Kukei ‘Kuka maarima! Saraavi tamima! Saraavi kayaaka yigalakima!’ dada badelyi. Nimi ‘Saraavi gaalyabwi maapika! Yi gaalyabwi naanga naanga maapika! Munya winana!’ dena baheinyi.

11 Sipizipiyaraavi maremwaaide tewaanyai niminyira. Sipizipiyaraavi maremwaaide tewaanyai dina ‘Nimirera mwaaibika! Nimi

balîma! Nîmîrera nabaibîthîka! dada gamîre gaalyabwi walakîna yadelyîra.

¹² Nîgwîwawînyai kavîjîlikei boziyarî tînna wanganojî sipîzipîyaraavî ya'ma'na yojî lîkaanya wîna. Nîgwîwawînyai sipîzipîyaraavî maremwaadei mîka. Gannyaraavî gyakwai mîka. Savîdaa'nyî sai lîkaanya wîna. Lîkaanya wîna kyojî kavîjîlikei sipîzipîyaraavî tîka davîna kyojî pwara pîwînna pîwînna lîkaanya wîna yapîjî yîwînadaa'na yîpî'derera.

¹³ Nîgwîwawînyai gannya nîgwiannajî gannya kîlaakejî'najî gavenna yawî'na yada myawîrina 'Sipîzipîyaraavîna yîlaaya yîma! Tewaanna maremwaaimujainyî,' sara myawîryori nîgwîwawînyai lîkaanya wîna yadelyî. ¹⁴⁻¹⁵ Sipîzipîyaraavî maremwaadei tewaanyai nîmînyîra. Nîmwai nîmînyî nyawî'da nîmî Nîmwarî yawî'dînyabaaibî' nîmî nîmîreraavî yawî'dî kumî nîmînyî nyawî'dîvîsainyî. Kumînyî yawî'dî kumînyîna nîmîre gaalyabwi walakîna yadî baimujainyî.

¹⁶ Sipîzipîya pwara nîmîrera mwaalîna yadîvî' sipîzipîkurîta davi mamwaalyî yadîvîsarera. Sahwaraavîjî makabîna yîdere. Nîmîre maanguraaya' kadîka nyu'napîri dahaa' nîmîre sipîzipîyara mwaihasarajî mudîkera nîmîrerajî sipîzipîkwala gave' yîma'nîpî'desîra. Yuyaraavî maremwaaladei gavei mwaalîkelyîra.

¹⁷ Savîdaa'nyî nîmî dîna ‘ “Nîmîre gaalyabwi ayîna maarîma!” da'mujî nîmîreraavîna sabwi walakîdeinyî,' dadînya'na Nîmwai nîmînyîna kurya nyukadelyî. ¹⁸ Aane pwai kwai nîmîre gaalyabwi mamaaryîwa'. Aawa. Nîmî sainyî

kave walakîna yîdeinyî. Nîmî navîka mwaalîna kya'muri pwara nyîramakîpî'de' mî'. Aawa, nîmî sainyî dîna 'Pwara nyîramakîpîka!' dîna kya'muri nyîramakîpî'deinyî. Sahwainyî diragînyainyî dîna 'Pwaraavîna balîma!' nabaai Nîmwai sara nyîdakakeinyî diragînya' nyîjaavake' dîvi sara yîdeinyîra."

¹⁹ Jizaazare yagaala sanna kadîka wi'nyîna yeva Juyara maanga dînyîna yeva ayîna jaapainyîna. ²⁰ Kwalaalyara dînyîna "Yîmakei kînnakelyî. Aa'nelyî. Yîmakyagaala dîvanîkelyîra. Gamînyî kadîka baa'na wi'nîwaava!" ²¹ Sara dînyîna yadaapi pwara wi'dîna "Yagaala sa yîmakei wîlamwaaidere yagaala mîka. Aa'nei a'mwe tîbînyarî 'Tînna jena!' gara wi'dîwaka?" wi'dîna ye' Juyara.

Juyara Jizaazarî malîmwagyesa'nesî.

²² Pîgaa' Anga Jeruzaalemi Juyara yawî'dîvî' "Gotîyare Ange' tewaanya' ayîna yîma'nyaake'na tîka munne naana! Gotîyarî yîlaaya yaana!" Dînyîna yesagaa' yîrîlyagaa' burîkegaakî. ²³ Munne sagaa' Gotîyare Angevî Ne Solomonîmîne yîhukangevî Jizaazai kaanya yamarina. ²⁴ Sarevîdaa'nyî gamînyawînna Juyara yîkabîna, dakwamwada'na yeva wi'dîna "Nemî 'Sahwai dîngaka? Pwai dîngaka?' kuna yawî'manîgo'na nayaa gathîngaa' dînedathevaka? Aangyagaala nebwinna kavena dînedana! Kîraazîtiyaigî Gotîyai gîthahîlakakeigî mwaaidîza' naange'nanya' dînedana!"

25 Jizaazai ja'naw+di+na “Mena yi+hithena kiri' n+im+ny+ mal+mwagy+ yi+waava. Ni+maamaangere di+rag+nyasi+ tewaanna yi+vanige waw+nyanna nayaa ny+jal+kurakyaka kiri' sar+mi+ many+il+mwagy+van+ga! 26 Ni+mi+re sip+zip+iyaihi mwaaib+zi kwaji kany+il+mwab+th+ika! Ni+mi+re sip+zip+iyaihi+ri+na mi!. Sare'na many+il+mwagy+van+ga! 27 Ni+mi+re sip+zip+iyara ni+mi+re maanguraaya' kad+ka wi'nadivi' ni+mi+ yaw+'manige sarera ny+im+di+di+visare. 28 Yuyagaa' yuyagaa'ne gaalyabwi wijaavadi yuyagaa' yuyagaa' my+wi+yi yi+pi+'dere. Ari+kaw+. Ni+mi+reeraavi a'mwe pwai kwai ni+mi+re asiri' my+palasi+'ny+ nyapiji+ kayaa'na my+ yi+pi+'dere. 29 Ni+maamaangei sahwaravi ny+jaavakei di+rag+naangely+. Yuyara pwara di+rag+maayare. Ni+maamaangei maremwaa+iman+ikeraavi aane pwai kwai Ni+mware asiri' mipalasi+'ny+ yannere. 30 Ni+mi+ji Ni+mwaly+ san+da+inaai avaalyainaaly+,” wi+di+na ya' Jizaazai.

31 Sagaa' Juyara “Tamakya'na silaange liwakaana!” deva sila ay+na maar+na. 32 Ay+na maar+na kye' Jizaazai ja'naw+di+na “Ni+mwai ny+ida' ‘Di+rag+nyaji+ tewaanyaji+ ja!’ Sara kany+ida' sar+mi+nyaw+ kwalaalya sara yi+wa. Ni+mi+re waw+nya gar+'na yaw+'div+' ‘Li+wakaana!’ dadivi' yi+vanigava sil+yaji?”

33 Juyara ja'naw+di+na “Gi+mi waw+nya tewaanyav+na ‘Sila liwakaana!’ di+vanigo'na mi!. Aawa. Got+yari+na birala yi+vanig+ny+na sa'na yaw+'daa ‘Sila liwakaana!’ di+vanigo'na. Gi+mi sahwaigi+ a'mweigi+ kwaigi+ kiri' nedi+wa

‘Nimi Gotiyainyi,’ sara nediwaa’na birala yivaniginyaiginyi a’mwe kwaigi.”

³⁴ Jizaazai ja’nawidina “Sarimire yagaaiwinya’ dini’ ‘Gotiyai widina “Sarimi gotiyaihilyi.”

³⁵ Sara dinike’ nabaai, ‘Yuyagaa’ Gotiyare bukuyavi yagaalya’ dinike’ waragothesi,’ yawi’daanyainera. A’mwe saraavi Gotiyai widina ‘Sarimi gotiyaihilyi,’ widina yaake’nanyi. ³⁶ Sare’

Nimwai gamire wawinya’na nayaa yide’na tewaanyainyi nyidahilakaka Kwaakevakina maryasaabina kanya’ sareinyi ‘Gotiyari Gawaalivaangeinyi,’ yihithiwe’na ‘Sahwai Gotiyari birala yiwaka,’ gara dimaniga’!

³⁷ Yithaa, Nimwai yivanikabaaibi’ gamire wawinyanna myiwiji kwaji malimwagyi dinyideihilyi. Sarebwi tewaanyabulyi. ³⁸ Sare’

kiri’ Nimwai yivanikabaaibi’ nimi sara yivanige’na dinyilimwagyla! Nimi yagaala yihithiwe’na malimwagyi nyipija’ wawinya sanna yivanigevwi wanganapiri dilimwagyla! Sara yapiri “O, Nimwai Jizaazari wilamwaalikei daaka! Jizaazai Nimwari wilamwaaidei daaka!” yawiraana! Kuna sara yawiraana! dapiri wawinya sanna dilimwagyla.”

³⁹ Sarevidaa’nyi kumi yagaalya’na jikurya yeva ayina yawi’na “Kalavuzana wila pwiyaana!” Sara deva yesa’. Jizaazai kuminyabadaa’nyi kaanna wodaa’nyi tinna wanganeva wanganakina ye’.

⁴⁰ Aalya Jothaniyavi Jizaazai ayina ga’ma’na yaka sinnawi sagaa’ Joni aalyavi bavitaaziya’ yakewi wina yaka saba mwaalina. Saba

mwaalina yadi'nyi⁴¹ gaminyawinna a'mwe kwalaalyara bina. “Joni sahwai atika maru'nata aane pir'i' kiri' myi ya'. Yuya a'mwe darina nedakabaaibisa nebulyangi,” dinyina yeva bina.⁴² Bina kye' saba a'mwe kwalaalyara gaminyi limwaga'na ye'.

11

A'mwe Lazaarazai balake'nesi.

¹ A'mwe pwai Lazaarazai wo'nikei Anga Betaani mwaalyai nabalinakei yima'nyina. Anga Betaani savi Maariyaasi ganaanaanga Maathasi sanadaai mwaalagilyabanyi.² Maariyaa sa' Naangere sivilyaraari welivananya wabatirinya' dingina yaka gannya mijasasi yiwaipiwanna yake' gaminyi gathaakaanga Lazaarazai nabalinakei mwaalakesi.³ Nabalinakei yima'nyina yakevidaa'nyi kinadaai Jizaazari yagaalya' widaasina “Naangeigi, ginnya ja'mwei nalaavinakelyi,” widaasina yagi.

⁴ Jizaazai kirimire yagaalya' widaasagilya' kadika wi'nyina yaka gamireraavi widina “Nabalya sa' yuna balyabwine'na mika. Aawa. Nabalya sa' yima'niwa'dike'na a'mwera dinyina ‘Gotiyai Naangelyi. Gotiyai byaanna diraginya' kininnakelyi.’ Sare'nesi. Nabaai niminyina ‘Gotiyare Gawaalivaangei Naangelyi. Byaannakelyi,’ daka nabalya sa' yima'niwa'di’.”

⁵ Jizaazai Maathaviji gamire ganyaabulaangeviji Lazaarazariji saginyirakaavina wivu'nakelyira.

⁶ Sarevidaa'nyi “Nabalinakei mwaali’,” widaasagilya' Jizaazai kadika wi'nyina yaka saba mwaalakeba yirika piryaari kuna

mwaalina. ⁷ Mena kuna mwaalina yaka gamireraavi widina “Kwaaka Juthiyanna Lazaarazare angewinna ayina wawaana!”

⁸ Gamirera widina “Akai, nejiwaakadinyaigi kigaa' maalikegaa' Juyara dinyina ‘Jizaazari silaangeji liwakaana!’ Sare'na Juthiyanna ayina jitheigi daaka!”

⁹ Jizaazai ja'nawidina “Nimiregaa' mi'na daaka! Yithaa, yirikegaa' nyilyai dadehaa' (12 aawaaya) midaaka! Kwaaka davaki yirike' pu'daasiyagaa' a'mwe pwai yirikevi kaanna yamarina yajai kwaaka davakiya baake' tinna wangade'na mala myamaari yadelyi. ¹⁰ Sare' kiri' sawisavi sai kaanna yamarina yajai baake' gaminyi mularike'na mala yamaaradelyi. Dahaa' yirike'bisagaa' wawaana!” ¹¹ Sa widina yaka pirî' widina “Neya'mwei Lazaarazai se wa'mwaka kiri' kaanna wawa'muri yidikaavideinyi.”

¹² Sarevidaanyî gamirera widina “Naangeigi, se wa'manike' tewaanyabulyi. Divi nalaaya' mena yadelyi. Sare'na mawaanna!”

¹³ Jizaazai gamire balya'nebwina widakesi. “Lazaarazai mena baimwaka.” Gamirera yawi'na “‘Se wa'mwaka,’ nediwakesi.” ¹⁴ Sara yawi'na yesavidaanyî Jizaazai aangyagaala kave widina “Lazaarazai baimwakelyi. ¹⁵ Savidaasi kiri' gaminyaba mamwaalyiwe'na ‘Nimirera nyilimwagapika!’ dena yilaaya yivanige. Sare' gaminyawinna kaanya wawaana!”

¹⁶ Sarevidaanyî A'mwe Tomaazai Jizaazare pwaraavi widina “Wikira. ‘Gamiji balaana!’

dawaaji yuyainaji wawaana!” wida'. Tomaazai gira'miraala maarakei mwaalaka kunnya ya-gaala “Dithimaazai,” wo'nikelyi.

Jizaazai a'mweraavi wimwaaihya'nej̃i bar-yaraavi yidikaaya'nej̃iya'nesi.

¹⁷ Sarevɪdaa'nyi Jizaazai kaanna wiina yina yaka savina yi'ma'na yakegaa' dara wi'nake' “Lazaarazai kabaimwa'di' yirika daryaai daryaalyavi simaangevi wakɪnikelyira.” ¹⁸ Anga Betaani sa' Anga Jeruzaalemɪdaa'nyi esabera. Jeruzaalemɪdaa'nyi kilomitaaya dawaai dasaba mannikebanyi Anga Betaani. ¹⁹ Juyara “Betaani esabera,” diina yeva kwalaalyara Maathaviji Maariyaaviji sanadaarina angyiri'maata yina. “Kirya'mwerina kale'na wigaimwagaana! ‘Kale nyiwaka,’ widaana!” deva angyiri'maata yina.

²⁰ Maatha' kadika dara wi'nake' “Ai, Jizaazai davi'vanika!” Sara dakevɪdaa'nyi mwasawinna walyawiji'ma'naawina kya' gannya angevi Maariyaa' mwaalina. ²¹ Maariyaa' mwaalina yadi'nyi Maatha' Jizaazari wijimaa'nyina yaka widina “Naangeigi, dava mwaaidizi kwaji nyidaakaangei mabalyi kyadika! ²² Savina kiri' yawi'na ‘Nabaai dahaa' sagaa' gim̃i Gotiyari jiwaara'de'na Gotiyai sara wijaavadelyira.’ Sara yawi'mwe'nyi.” ²³ Jizaazai widina “Jithaakaangei mwaaladei dikaavadera.” ²⁴ Sara widina kya' a'mwe' widina “Niimi yawi'na ‘Aayagaa' Kwaaka dava' aaya' yima'nadehaa' dikaasagaa' ayina mwaaladelyi. Dikaavadelyi,’ sara yawi'mwana.” ²⁵ Jizaazai widina “Niimi a'mweraavi a'mwengi yidikaadinyainyi

niminyira. Dikaasabwi niminyira. Nimi a'mweraavi a'mwengi wimwaaihadinyainyi. Gaalyabwi niminyira. Pwai nyilimwagazai balajai mwaaladelyira. ²⁶ Gazaizai tewaanna mwaaida nyilimwada yuyagaa' mabalyi yadelyira. Arikawi. Sabwina dalimwamanigi?"

²⁷ A'mwe' widina "Yo, Naangeigi, giminyina dara limwamanige 'Gimi Kiraazitiyaigi Gotiyari Gawaalivaangei Kwaaka davakina bahinyaiginyira.' Sara yawi'na yiwe'nyi."

Jizaazai kinna dake'nesi.

²⁸ Sa' Maatha' widakegaa' ayina wina yaka ganyaabulaanga Maariyaavi kave danganna yaka kuku'nya widina "Dava Nejiwaakadei bamwaalaka githathelyi." ²⁹ Widina kya' a'mwe sa' wi'nyina, daavina yaka wijimaa'nya'ne' yarai walyuna. ³⁰ Sagaa' anga saba Jizaazai mwilaabyi. Aawa. Maatha' wijimaa'nakeba kuna mwaalina yakelyi. ³¹ Yarai walyuna kya' angevi Maariyaayaba Juyara wilamwaaina yeva kale wiakera tinna dara wangesa' "O, Maariyaa' daavina yaka yarai walyuvanike' daaka!" Sara devevidaa'nyi midinaabina. Juyara yawi'na "Gilaayari wakinikeba kinnya'na walyuvanika," yawi'na yeva midinaabina ye'.

³² Jizaazaryawinna Maariyaa' yi'ma'na yaka tinna wangadevidaa'nyi gamire sivilyaraari wala'na yaka avaa'ina widina "Naangeigi, dava mwaa'idizi kwaji nyidaakaangei mabalyi kyadika!"

³³ Maariyaa' kinna dadaasi Jizaazai tinna wanganna. Nabaai gamiji Juyara besara kinna dadaapi Jizaazai tinna wanganna. Tinna wanganna yakevidaany'i kale naanga wiadaasi gamire kuryari simuyiwaala yawi'na, a'mwera barya'na simunya kwalaalya yawi'na. ³⁴ Simunya kwalaalya yawi'na yaka yiwaara'na "Sariimi gawi wakiwa'daava?" Kumi widina "Naangeigi, bwanganna ja!" ³⁵ Widina kye' Jizaazari kidaraalya walaabina. ³⁶ Kinna dina yadaanyiya'na Juyara dinyina "Yithaa, Lazaarazarina tewaanya wivu'nakerinesi." ³⁷ Dinyina kye' kiri' pwara dinyina "Tibinyari 'Tinna jena!' wida'. Sa'na daaka! Sarebaaibi' gami widina 'Lazaarazai mabaidinna!' widazi kwaji sawai mabalyi kyadikei daaka!" dinyina ye'.

Balakeriyidikaavakerinesi.

³⁸ Sarevidaany'i Jizaazai kale naanga ayina wiadaasi gaminyi simuyiwaala ayina yawi'na yada gilaayai wakini kewinna wina. Gilaaya wakini ke sa' simaangesi. Simaangevi tikuryavi silaangeva' tihini kesi. ³⁹ Gilaayai wakini kewinna mena wina yaka widina "Silaanga da' divaasila!" Sara kuda' Maatha' gilaayari ganyaabulaange' widina "Aawa, Naangeigi, butirinya' wilarika. Sare' dare'nesi. Yirika daryaa daryaalyariki dahaa!"

⁴⁰ Jizaazai widina " 'Gimi nyilimwaga'gizi Gotiyare byaanna diraginyabwi tinna dangade'ginyi,' githiweinyi midaaka!" ⁴¹ Sara widina yakevidaany'i silaange' baasina.

Mena baasîna kye' Jizaazai maranganna yaka widîna “Nîmwai, ‘Su! Su!’ gîthîwa. Kadîka nyu'nîwaanya'na ‘Su,’ gîthîwa. ⁴² Yuyagaa' kadîka nyu'nadînyaigînyîne'na yawî'mwe' kîrî' dava kwala naanga mwaaihasaraavîna sara gîthîwa. ‘ “Gotîyai Jizaazari yasaabakeva,” limwabîka!’ dena sara gîthîwa.” ⁴³ Sa mi'na widîna yaka maanguraaya naangeva'na jaka widîna “Lazaarazaigî, dalyaama!” ⁴⁴ Sara widîna kya' baryai walyaabîna. Baryare asîraalyî sivîlyîraalyî kwaabîhannya' gwavaaihî'nîke!, gamîre sinnya' kwaabîyîvîsa' gwavaaihî'nîkelyî. Sare kîrî' baryai walyaabîna kya' Jizaazai a'mweraavî widîna “Kaanya wawode'na jî'daalyîla!” wîda'. Kuda' sara ye'.

Juya naangera “Jizaazai baladelyî,” dînesa'nesî.

(Matîyui 26:1-5; Maaki 14:1,2; Lukî 22:1,2)

⁴⁵ Sarevîdaa'nyî Juyara Maariyaa' angîyîrî'maata yeta kwalaalyara Jizaazai yake' tînna wanganeva Jizaazari limwannâ yadîvî' “Kîraazîtiya sahwalî,” dîna. ⁴⁶ Sara dîna kye' kîrî' pwara A'mwe Perîziyaraayawînna wîna yeva Jizaazai yake'na widîna. ⁴⁷ Mi'na widîna yesavîdaa'nyî Perîziyarajî Gotîyarîna yîra'dîvîta naangerajî Juyaraavîre Kaajolîyarajî yî'bwa'na yeva dînyîna “ ‘Gara yaadevaka?’ A'mwe dai yîjîwaainya kwalaalya yîvanîkele! ⁴⁸ Nemî mujîna ‘Sabwi minnera!’ mujî yaaja' yuyara gamînyî limwabî'delyî. Sara kyapîjî A'mwe Romîya naangera yaasîna kyapîjî aawîlasara bîna yapi Gotîyare Angevî

kayaaka yigalapi yita davaakiya Juyainaavi neramakipi'de'nanyi.”

⁴⁹ Kumijiya pwai Kaayapaazai wo'nikei sagaa' Gotiyarina Mubithika Yira'de Naangei mwaalina yaka widina “Siduta maayaihiyi. Aane piri' kiri' myawiriwaava. ⁵⁰ ‘Pwai a'mweraavina balana! Gave pwai balaja' nemire yisavaakiya yuyaraavi kayaaka myigalakipina!’ dawaaji sa' tewaanyasi. Sara myawirivanigasaihi daaka!” ⁵¹ Sare' widina yake' sai gavei sara mujakelyi. Aawa. Kwaram sagaa' Gotiyarina Yira'de Naangei mwaainikerine' Gotiyare yagaala wida' “Juya yisavaakiyara mabaibina! Jizaazai sahwaravina baladelyi.” ⁵² Sara dake yisavaakiya sahwar gavera mi'. “Pwara piwinna piwinna kigaakuna yosinigasara Gotiyarera yima'nipika!” dozi yuyara Gotiyare avaalyaraavi maryi'bwaramwaaihade'na Jizaazai baladelyi.

⁵³ Sarevidaany'i sagaa'daasi Juya naangera “Sahwari tamakaana!” deva dinyina “Davwina tamakaana! Pibwi dingaka? Gevwi dingaka?”

⁵⁴ Mi'na jamungajakina yesavidaany'i Kwaaka Juthiya a'mweraayaba ku'maayaba Jizaazai kaanya myamari ya'. Aawa. Ya'ma'na yaka a'mwamaayaba pimaginna kaanna wina Anga Yipireminei. Saba gannyarari mwaalina yakelyi.

⁵⁵ Juyara yawi'na “Gotiyai yikamaangeraavi tamakyaake' Ne sinnawinyaraavi maramaki yaka kave pari'mayaake'nanyi.” Sara yawi'divi' “Pari'ma'munne' tika naana!” dadivi' yi'bwa'nemwaaina yesasira. Munne sa' aya

kigaa' kyima'na' wawinyangidaa'nyî Anga Jeruzaalemînera yîlaawîna. “Nemî Munne' naadeinaavîne' kîwînya' sara dînike' aalya' yînaana! Kwaabîhannyajî baazî'ma'nyajî aalya' yaana!” deva yîlaawîna. ⁵⁶ Yîlaawîna yesavîdaa'nyî dîna “Jizaazai damwaalîka?” dîna yeva Gotiyare Angevî yîkabîna yeva dînyîna “Berî' dîvanîgîna? Munnevîna sai mabi yadei daaka?” ⁵⁷ Gotiyarîna yîra'dîvîta naangerajî Perîziyarajî yagaala wîdîna “Sarîmî yawî'na ‘Saba sahwai mwaalî,’ yawî'na yîpîja' sare' yarai dînejîla!” Kumî “Jizaazarî wîla pwîyaana!” dîna yeva sara wîdîna yesare.

12

Anga Betaani Jizaazarî welivananya' dîngake'nesî.

(Matîyui 26:6-13; Maakî 14:3-9)

¹ Juyara dînyîna “Sawîta dawaai dawaai kajînnojî Pari'ma'munne' naadera.” Dînyîna yadaapi “Wîla pwîyaana!” desavîdaa'nyî Anga Betaanîna Jizaazai wîna. Anga saba Jizaazai a'mwe baryarî yîdîkaavakei Lazaarazai mwaalakebe. ² Anga Betaanî sabanna wîna yakevîdaa'nyî gamînyîne wapaaya yîdîka kye' Maatha' wapaaya wîmaarina. Nabaai wapewakya tevolîyavî gamîjî walamwaaina yesarajîya pwai Lazaarazalyî. ³ Sarevîdaa'nyî yuyara nyîna nyîna yadaapi Maariyaa' Lazaarazarî ganyaabulaange' welivanadalya' maarîna yaka Jizaazarî sîvîlyaraarî dîngîna yaka gannya mîjata saamînyasî yaalîka

yimwanna. Welivananya sa' wabatirinya naange' yinike' purirya naathiyangidaa'nyi welivananya nawinya' yavikaryadivisa' Maariyaa' nigwia naanga mubakesi. Dingina kya' anga yuneba wabatirinya' winnyina.⁴⁻⁵ Wabatirinya' winnyina yinike' gamire pwai Yizikeriyotiyai Juthaazai wida'na “Welivananya naange' kinaaya naanga naanga (yirika 300 wawinya'ne nigwia) mamubi be'na yiwaka! Nigwia sa nigwimaayaraavina yanga kujaavadikengira.” Sai divi maalikegaa' Jizaazare yikamaangeraavina Jizaazarⁱ yibwaridaakwadelyira.⁶ Juthaazai sai nigwimaayaraavina kale wina yake'na muji ya'. Aawa. Sai kukelyi. Sai kumire nigwigilya' maremwaaidei, pigaa', pigaa' nigwia gaminyine maa'delyira.

⁷ Sara widakevadaa'nyi Jizaazai wida'na “Madinna! A'mwe' sara yana! Divi maalikegaa' nyirakipi'dehaa' a'mwe sa' 'Nimi welivananya yovirawakinike dingima!' daka nyiwake'nesi.⁸ Sare' dare'nesi. Gazagaasagaa' sariminyaba nigwimaayara mwaaibi'de' kiri' gazagaasagaa' nimi sariminyaba mamwaalyi yideinyira.”

“Lazarazarⁱ tamakaana!” widesa'nesi.

⁹ Juyara kwala naangera kadika dara wi'nesa' “Anga Betaani savi damwaalika!” Sara devevadaa'nyi sawinna kaanna wina. Jizaazai gaverina kaanya' mi'. Aawa. Nabaai Jizaazai Lazarazarⁱ baryari yidika'na yakerina “Tinna wanganaana!” deva kaanna wina ye'.¹⁰⁻¹¹ Juya kwalaalyara Lazarazarⁱ yidikaavake'na

yawi'na yeva Juya naangeraavirebwi ya'ma'na yeva Jizaazari limwanna ye'. Sare'na Gotiyari'na mubithika yira'divita naangera “Lazaarazariji tamakaana!” deva sara jamungajakina ye'.

Jeruzaalem! Jizaazai Kingiyai wila'nesi.

(Matiyui 21:1-11; Maak 11:1-11; Luk 19:28-40)

¹² Mwanyavi Pari'ma'munne'na kwala naange' besara kadika dara wi'nesa' “Ai, Anga Jeruzaalem'na Jizaazai davanika!” ¹³ Sara deva Jizaazari yilaaya'na aaburyabisangire kiwasa maarina yeva gaminyi wijimaa'nya'na wina yeva jaka dina dina “Gotiyaigi, giminyi yilaaya yivanigo. Naangeigire yayavinei widasaabahinyari tewaanna diwio! Gotiyai Yizireliyainaavire maremwaideri tewaanna wiano!”

¹⁴ Jizaazai dogiya diwinyari birina yaka yilamwaaina. Gotiyare bukuya' dinika

¹⁵ “Anga Saayoni mwaalyaihi lika mipina!

Sariminyi maremwaaina yadei dogiya diwinyari

Yilamwaaina yaka, yithaa, bina yivanikelyi.”

¹⁶ Sara dinike' sagaa' sinnawi gamirera sare'na myawiri ye'. Aawa. Jizaazai byaannakei ayina yima'nyina yakegaa' kumi dara yawi'na “Gotiyare bukuya' sara dinike' Jizaazari sara yawalyaadosi,” yawi'na yina ye'.

¹⁷ Sinnawi Jizaazai baryari wilakyawidaa'nyai Lazaarazari jaka widaka baryari yidikaavakeryaba kwala bwa'naanya' mwaalina yeva tinna wanganna yevevida'ny sa'ne'

pwaraavi wijalikurakina. ¹⁸ Sarevi kwala bwa'naanya naange' Jizaazai yij+waa'inya' yake'na kadika wi'nyina yeva sahwarì wijimaa'nyina ye'. ¹⁹ Sarevidaa'nyi A'mwe Periziyara dinyina “Danganyila! Sahwaraavina nemirebwine aane pirì' kirì' negaimwagyade' mika! Ya'ma'na neyivanigava. Yithaa, Kwaaka davaki mwaalyara yuyara a'mwe sarì midinaawina yivanigava.”

Maavera Girikiyara Jizaazarina biresa'nesi.

²⁰ Anga Jeruzaalemina wawesarajiya pwara Menya Girikiyara “Nemi Munnevi Gotiyari yilaaya yaana!” deva mwaalina. ²¹ Sarevidaa'nyi Pilipi Kwaaka Galili Anga Betizaaita mwaalyaryawinna sahwarà bina yeva yiwaara'na “A'mwe naangeigi, 'Jizaazari tinna wanganaana!' sara yawi'manigo.”

²² Pilipi kadika wi'naka kaanna yaka Ediruyari sara widina ya'. Ediruyalyi Pilipiji saraai Jizaazarina widaawina. ²³ Mena widaawina kyagi Jizaazai ja'nawidina “Nimiregaa' yima'n'wakegaaki. Dahaa' A'mweraavine Kaimiraayai byaannya' kininnakei yima'nadelyi. ²⁴ Nebulya'na yithithivanige. Witizila pwai kwaakevina walaawina yori mabalyi yajai gavei kuna waradelyi. Sai kwalaalyara mima'nyi yadelyi. Kwaakevi witizilyai balajai kayaaka yajai yi, yirivadehaa' witizila naanga naangera maarina yadelyi. ²⁵ Pwai gannya gaalyabwina Kwaaka davakina yuna wivu'nadei gannya kuryai yigaladelyi. Pwai gannya gaalyabwina Kwaaka

davaki similika yuna widei yuyagaa' yuyagaa' gannya kuryai maremwaaladelyi. ²⁶ A'mwe pwai kwai 'Jizaazar+ widaay+ma!' dina yajai nyim+dinaabana! Nyidaayadei sara yoj+ nim+ mwaaimujava sah+ba mwaaladelyi. Pwai kwai nyidaayajai sahwari Nimaamaangei gaminyine yaya' makiladelyira."

Gannya balyagaa'ne' Jizaazai widake'nesi.

²⁷ Jizaazai widina "Dahaa' simuy+waala naanga yawi+manige. Sare' beri' widijiwana? 'Nimwai, dahaa'ne savi dinyivadaihasamaaka! Sara widijiwa! Aawa. Sahiri'na biweinyi. Daanga sagaa'na nyade'na biweinyi. ²⁸ Nimwai, gimire yaya' byaannake' diraginna yima'nana!" Sara kuda' Sigunyavidaa'nyi maanguraaya' widina "Sa' byaannake' mi'na wakesira. Nabaai byaannake' ayina wakidesi."

²⁹ Sarevidaa'nyi kwala bwa'naanya' daaveva maanguraaya' kadika wi'nyina yeva dinyina "Ai, yi'munya' pimwaka!" Pwara dinyina "Gotiyarine mamaayai ejeliyai widiwaka." ³⁰ Sara dinyina kye' Jizaazai ja'nawidina "Maanguraaya' diwake' niminyine'na mi'. Aawa. Sariminyine'nanyira.

³¹ Dahaa' Kwaaka yuyavaki mwaal-yaraavine maryawibwasabwi yima'niwaka. Gotiyai kotiya' maryawibwaradelyi. Dahaa' Kwaakevaki mwaalyaraavi maremwaaideri (Kamaalyari) Gotiyai marasi'na yadelyi. ³² Kwaakevidaa'nyi munyaba yilamaranyakipijainyawinna yuyaraavi mwagi'nideinyira. Kwalaalyara nimirera

yima'nipi'dere.” 33 Sara widake' gamire balyabwina wiñwaaina'. Dara widinikesi. Yisaviri niliya kanyiramapiji balideinyi.

34 Sarevdaa'nyi kwala bwa'naanya' Jizaazarì ja'nawidina “Nemire Kiwinyavi nedini' ‘Kiraazitiyai yuyagaa' yuyagaa' mwaalagothelyi.’ Sara nedinike'na ‘A'mweraavine Kaimiraayai yilamarakipi'delyi,’ be'na nediwaa? A'mweraavine Kaimiraayai aaihwala?” 35 Sara widina yesavidaa'nyi Jizaazai widina “Maalikegaa' sarimijiyaba Baakei kuna mwaaladelyira. Baakei kininnakeihi mwaaidivitabaaibi' kaanya jamaideihilyi. ‘Jihinya' nanebwakalimwagaradika!’ dapi sara jila! Jihinyavi pwai kaanya yamaryada tinna mwanganyi yada ‘Gawinneinyaka?’ dada yaasiwa'na kayaa'na wivanikelyi. 36 Baakei mwaaidozi baakeri dilimwagarila! ‘Nemi baakevine kaimiraayaina yima'naana!’ dapi sahwarì dilimwagarila!”

Juyara Jizaazarì mu'nyesa'nesi.

Sa Jizaazai widakegaa' kaanna wina yaka “Sahwara nanyangabithika!” daka lika yulya'na. 37 Gamire yijiwaainya naanga naanga wilimwabine tinna wangadaapiji kiri' kumi malimwagyna. 38 Ne piropetiyai Azaayai dinike' nebulya' yune'na yima'nya'ne'na malimwagyi ye'. Azaayai sai dara dinike' “Naangeigi, gimire yagaala dithaakwo' aai limwagaka! “Naangeigi, gimire aangasa' wijiwaainaginya' aai banganaraka!”

³⁹ Sarevⁱ malimwagyⁱ yesa'na Aazaayai yagaala piri' dⁱnike'

⁴⁰ “ ‘Kumire tinnyaji nangabithika!’ daka
 ‘Kumire simunyaji nyawipidika!’ daka
 ‘Kumire tinnyangi pida'na yakere.
 ‘Kumire simunyangi silya'bⁱ’ yiwagakaka.
 ‘Tewaanyabwi maapijaraavi kwaji tewaanyaraavi kumwaaihiwidika!’”

⁴¹ Ne Aazaayai Jizaazare byaannya' tinna wanganaka gaminyina dake'na sara dⁱnikesi.

⁴² Sare kiri' Juya naangera kwala naangera malimwagyⁱ kye' kiri' Juya naangera kwalaalyara gaminyi limwanna. Limwanna yevera a'mwe Periziyaraavina lika yina yeva dina “Juyainaavire Lotuangevi nanyasi'nipika!” dina yeva a'mweraayaba nayaa mujalikurakyi ye'. ⁴³ Sare' dare'nesi. Sahwara yilaaya'na dina “A'mweraavire tinna byaannakeinyi yima'nya'ne' tewaanyasi. Niminyina ‘Tewaanyalyi,’ dinipika!” Sahwara maji “Gotiyai gavei niminyina ‘Tewaanyalyi,’ dana!” maji yeva a'mweraayaba Jizaazarina lika yulyakina ye'.

Jizaazare yagaalya' a'mweraavi kotiya' wijathe'nesi.

⁴⁴ Jizaazai jaka naangave'na widina “A'mwe pwai nyilimwagazai nimi gaveinyi nyilimwagathe miika! Aawa. Nyidasaabakeriji limwagathelyi. ⁴⁵ Sahwai nyanganajai sagaa' nyidasaabakeri wanganadelyi. ⁴⁶ Kwaaka davakina Baakeinyi baheinyi ‘Gazaizai niminyi nyilimwagazai jihinyavi kuna namwaaladika!’

dena baheinyira. ⁴⁷ A'mwe pwai kwai nimire yagaalya' kadika wi'noji savi mamidinyi yajai sahwari kotiya' yawibwarya'neinyi beinyi mi'. Sare' dare'nesi. 'Kwaaka davaki mwaalyaraavi kotiya'na yawibwarima!' dena baheinyi mi'. Aawa. 'Kwaaka davaki mwaalyaraavi padaihasamaarima!' dena baheinyira.

⁴⁸ A'mwe pwai bule' nyijaavoji nimire yagaalya' mamaaryajai kotiya' wijathe' kininnakelyi. Yirika Aayagaa' nimire yagaalya' sa' sahwari kotiya' wijathesi.

⁴⁹ Yayo, nimire yagaala gave' nimi gaveinyi mihizivanige. Aawa. Nimwai nyidasaabakei kiwinya' nyijaavaka yuya yagaala sare nyidake yihithivanige. ⁵⁰ Nimi nayaa yawi'mwa 'Gotiyare kiwinya sa' yuyagaa' yuyagaa'ne gaalyabulyira.' Sarevidaa'nyi nimi sara yihithivanigenna Nimwai nyidakabaabi' sara yihithivanigengira."

13

Jizaazai gannyaraavire siviila aalya'yake'nesi.

¹ Juyara dinyina "Mwanyagaa' Pari'ma'munne' naadera," dinesagaa' sahigaaki. Jizaazai dara yawirake' "Dahaa' Kwaaka davaki ya'mava'muji Nimwaryawinna yilaawidehaa' daaka!" Sinnawi, kusagaa' Kwaaka davaki gamirera mwaalesaraavina Jizaazaru' tewaanya wivu'nada aayagaa' kuminyi ya'masagaa' tewaanya kuna wivu'nakelyira. ² Sawisavi Jizaazalyi gamirerari wapaaya nyina. Sagaa' Kotiya'

Jadei Saaimoni Yizikeriyoti-yari gawaalivaangei Juthaazari “Jizaazaryawinna yikamaangeraavi jivwaridaakwia!” widaka sahware simunyavi mena wakakegaaki. ³ Sagaa' Jizaazai dara yawi'na “Nimwai nimire asiraari'na diraginiya yuya nyijaavakengira. Gotiyaryawidaa'nyainyi walaabe. Gotiyaryawinna ayina wideinyira.” ⁴ Sara yawi'da “Tewaanya' yima!” daka wape-wakya'nevidaa'nyi Jizaazai daavina gannya baazi'ma'nya' wakaka munnaanyaba taawiliya' marayewaa'bwa'nyina. ⁵ Marayewaa'bwa'nyina yaka aalimaa'gulyavi aalya' dingikina yaka gannyaraavi sivila aalya gaai yaka taawiliya' yewaa'bwa'nyina yakesi yaalika yimwanna. ⁶ Sarevidaa'nyi Saaimoni Pitaryawinna bina kya' Pitai widina “Naangeigi, nimire sivilyiraari aalya jiziwaana!” ⁷ Jizaazai ja'nawidina “Dahaa' yivanige'na myawiriwaanya' kiri' divi jawi'deiginyi.” ⁸ Pitai widina “Yuyagaa' yuyagaa' nimire sivilyiraari aalya myi jitheigi. Arikawi.” Jizaazai ja'nawidina “Gimire sivilyiraari aalya mi yiwija' nimiji dimwaaideigi mika!” ⁹ Sara widina kya' Saaimoni Pitai widina “Naangeigi, sara nyidiwaanya' nimire sivila gaveraari aalya mi. Nimire asiraariji nimire minyaginyaviji aalya ja!” ¹⁰ Jizaazai widina “Pwai aalya yimwakei gamire kilaakeji' yuyaji' aalya ya'ne' mwigainyadelyi. Aawa. Sahwai kaanya wivanikei gamire sivila kwaa'naka gaviraari aalya ya'nelyira. Sarimi tewaanyaihi girika maayaihiyi. Kiri' yuyaihirina mika!” ¹¹ Sare' dare'nesi. Gamire yikamaangeraavina wibwaridaakunanyarina Jizaazai mena

yawirake'na widina “Yuyaihi girika maayaihi mika.”

¹² Sarevida'nyî Jizaazai kumîre sivîla aalya mi'na yakegaa' gannya baazi'ma'nya' yivisa' ayaba marakîna yaka tevoliyavi ayîna walamwaaina. Ayîna walamwaaina yaka gamîreraavi yiwaara'na “Sarîminyî mi'na yîhyîwebwi jawî'mwaava?

¹³ Nîminyîna ‘Nejiwaakadînyaigî, Naangeigî,’ nyîdivanîgasana tewaanna divanîgasaihîlyî. Sare' dare'nesî. Sasareinyîra. ¹⁴ Sarîmîre Naangeinyîra. Sarîmîre wîjîwaakyainyî mwaaîhe. Sahwainyî mwaalena sarîmîre

sivîla aalya kyîhyîwa sarîmîre sivîla aalya yîbîzaihi. Pwaigî pware sivîlyîraarî aalya yîjaigî. Sana sana yuyaihi jideihîlyî. ¹⁵ Sare' dare'nesî. Nîmî tewaanyabwi yîhîziwaainîwa. ‘Sarîmî sarebwi yîhyîwebaai sara jîla!’ dena sara yîhîziwaainîwa. ¹⁶ Naanga nebulya'na yîhîthîvanîge. Yaasîwa'wawînyai maalîkelyî. Gamînyî maremwaaidei naangelyî. Nabaai a'mwerî wîdaasade a'mwe sai maalîkelyî. Pwai sarî wîdaasadei naangelyî. Sare'na nîmî yîwebwi sarîmî sara jideihîlyî maalîkeihî. ¹⁷ Dahaa' nebulya da' yawî'mwaasabwi sara yîpîja' yîlaaya naange' yadîvî' tewaanaanga yîhyînadeihîlyîra.

¹⁸ Yuyaihirîna myîhîzîvanîgeihîlyî. Aawa. Yîhîthahîlakeihîrîna yawî'mwa. ‘Gotîyare bukuya' dînîke' nebulya'na yîma'nana!’ kadozî sara yadelyî. Dara dînîke ‘Nîmîre wapaaya nadei nîmîre yîkamaangai yîma'nîwakelyî. Gamîre sivîlyasî nyîramadelyîra.’ ¹⁹ Sara

dinike' dahaa' sa' myîma'nyî yadehaa' sara yîhithîwa. Sara yîma'nadehaa' sarîmî 'Ai, Jizaazai neda' "Mwaaiheinyî nîmî sahwayinyî." "Nedake'na sahwarî wîlimwagaraana!" dîzide' yîhithîwa.' ²⁰ Sarei kayaa'na yade' kirî' naanga nebulya'na yîhithîvanîge. A'mwe pwai nîmî pwarî wîdaasiderî maarîna yada nîmînyî nyîmaaraadeinyî. Nabaai, sahwai nîmînyî maarîna nyada nyîdasaabakerî maarîna yadelyîra."

Yîkamaangeraavîna yîbwarîdaakwia'na Jizaazai wîdake'nesî.

(Matîyui 26:20-25; Maaki 14:17-21; Lukî 22:21-23)

²¹ Jizaazai wîdakegaa' gamîre kuryarî simuyîwaala yawî'da aangyagaala jalîkurakîna "Naanga nebulya'na yîhithîvanîge. Sarîmîjîya pwai nîmînyîna yîkamaangeraavî wîbwarîdaakwadelyî." ²² Sara wîdîna kya' gamîrera tinna wanganna yîneva yawî'na "Aarîna nediwaka?" ²³ Gamîre pwai Jizaazai yîlaaya wiakei Jizaazare kusîmagî walamwaaina. ²⁴ Sarevîdaa'nyî Saaimoniî Pitai tîdîragînya wanganna yaka kavena wîdîna "Nediwakerîna jîwaaraka! 'Aaihwakaka?"

²⁵ Sara wîdîna kya' Jizaazare kihîsavî yokîna'na yaka yîwaara'na "Naangeigî, aaihwakaka?"

²⁶ Sarevîdaa'nyî Jizaazai ja'nawîdîna "Gîrîkula maalîke' wape-aalyavî yaalî'bwa'na ya'mujî wîjaavîwîjai sahwayîra." Sarevîdaa'nyî gîrîkula maalîke' maarîna yaka yaalî'bwa'na yaka Saaimoniî Yîzîkerîyotîyare gawaalîvaangei

Juthaazari wijaavina. ²⁷ Wijaavina kya' Juthaazai maranyina yaka dina "Jizaazari kayaa'na yima!" dina kya' Saataani wilaamwaaina. ²⁸ Sarevidaany Jizaazai widina " 'Yarai yima!' diza' yarai ja!" Tevoliyavi nesara yuyarajiya aane pwai kwai Jizaazai sara widake'na myawiri. ²⁹ Sare' dare'nesi. Juthaazai nigwigilya' maremwaaidei mwaalake', gamirera pwarana dina "Jizaazai widina 'Munne'na nemi nyinya'ne wapaaya pini dimubya!' dahawidiwaka? 'Nigwimaayaraavina yanga dumaryaawa!' dahawidiwaka?" Gamirera yaasiwa'na dina yeva sarebwi myawiri ye'.

³⁰ Juthaazai girikulya' dapanyina yakevidaany yime'nya'bi' walyuna ya'. Sagaa' sawisasira.

Yagaaiwinya mudike'nesi.

³¹ Sarevidaany Juthaazai ya'ma'na yakegaa' Jizaazai widina "Dahaa' A'mweraavine Kaimiraayai byaannakei yima'niwaka. Dahaa' gaminyina Gotiyai byaannakei yima'niwaka. ³² Gaminyina Gotiyai byaannakei yima'najai A'mweraavine Kaimiraayai byaannakeri wimwaaihadelyi. Yime'nya'bi' byaannakeri wimwaaihadelyira. ³³ Ninnya kaimiraayaihi, divi maalikegaa' sariminyaba kuna mwaaiheinyi. Birina yapiji kiri' Juyaraavi widiwa'devaai'bi' dahaa' yihithivanige. Nimi wijiawinna diwideihi mi'. ³⁴ Yagaaiwinya mudike' yihizaavanige. Sirya'mweraavina tewaanya yihivu'nana! Niminyi sariminyina tewaanya nyivu'nadevaai'bi' sariminyi

sirya'mweraavina tewaanya yi'hu'vuna!
³⁵ Sarimi sara yinapiji saburidaasi a'mwe
 yuyara sariminyina yawi'na 'Sahwara
 Jizaazarerera.' Yi sariminyi wivu'nyabwi
 waraja' sara yawi'na yi'hyipi'deihyira."

*"Pitai niminyina 'Menyalyira,' widadheva,"
 Jizaazai widadhe'nesi.*

(Matiyui 26:31-35; Maaki 14:27-31; Luki 22:31-34)

³⁶ Saaimoni Pitai wida'na "Naangeigi,
 gawinneiginaka?" Jizaazai ja'nawida'na "Dahaa'
 wiwijawinna manyimidinya'gizi kiri' divi
 nyimidinaadeiginyi." ³⁷ Pitai wida'na "Naangeigi,
 dahaa' mamidinaabyi gyi'wineinyi be'na
 gideinyaka? Nimi're gaalyabwi ghaimwagya'na
 wakiwa. Gimiji balideinyira." ³⁸ Jizaazai
 ja'nawida'na "Niminyina gimire gaalyabwi
 dalakideigi daaka? Naanga nebulya'na
 githivanige. Sinnawi kukuraayai jaka majahaa'
 dahasaai dahaa' niminyina duthathe' 'Sari
 myawiriwa. Menyalyi.' Ya, duthathehaa'na!"

14

*Jizaazai Nimwaryawinna nemaki-
 laawade'nesi.*

¹ Jizaazai gamireraavi wida'na "Sarinnya
 simunyangi simuyiwaala myawipina! Gotiyari
 dilimwagyila! Nabaai niminyi dinyilimwagyila!
² Nimaamaangere angevi ku'dika tewaanya
 kwalaalya yarinikengi. Sangi sarimi
 dimwaalyide'na yovigalakaawideinyi. Sabwi
 mwarya' kwaji savina muji kyihwidika!"

3 Kaanna wîwîja' saba sarîmînyîna yovîgalakîwîja' ayîna ba'muri 'Nîmî mwaaimujawî sarîmî dîmwaalyîla!' da'mujî nîmînyîneihîrî yîhîmaardeinyî. ⁴ Sawînneneinyî wîwîja' tusa'na yawî'manîgasasîra."

⁵ Tomaazai, gamîrei wîdîna "Naangeigî, wîjawînna nemî myawîriwo. Sarevîdaasî tusa'na gara yawîraajîwona?" ⁶ Wîdîna kya' Jizaazai wîdîna "Sahwainyî tusa'neinyî. Nebulyainyî. Gaalyabwi aaya kaavîlyainyî. A'mwe aane pwai kwai tuta pîrîvî bwawojî Nîmwaryawînna yî'mavaabya'ne' tusa' pîrî' minyîka. Aawana, nîmînnanyîra. ⁷ Nîmînyîna nyawîpîjî kwajî Nîmaamaangerîjî kyawîpîdîka! Sare'na dahaa'daasî Nîmaamaangerî yawî'dîvî' tînna wangamwaasaihîlyî."

⁸ Pilipî wîdîna "Naangeigî, Nîmwarîna dîneyîbwarîdaakwia! Tînna wanganawaajî 'Wikîra!' dînaadeinera." ⁹ Mena wîdîna kya' Jizaazai wîdîna "Pilipî, naangegaa' sarîmînyaba mwaaidînyagaa' manyanganyadînyaigî daa! Pwai nîmînyî tînna nyangamwakei Nîmwarî tînna mena wangamwakelyî. Savîdaa'nyî be'na nyîdîwaa? 'Nîmwarîna dîneyîbwarîdaakwia!'

¹⁰ Pilipî, dare' malîmwagyîjîwaana? 'Jizaazai Nîmwarî wîlamwaalî'. Nabaai Nîmwai Jizaazarî wîlamwaalî'. Sara malîmwagyîjîwaana? Yagaalya yîhîthîwe nîmînyîdaa'nya mîka. Nîmwai nîmînyî wîlanyîmwaaidei nyîdadaa'nyî yîhîthîvanîge. Gamîre wawînya yîvanîkengîra.

¹¹ 'Nîmwarî wîlamwaaihe. Nîmwai nîmînyî wîlanyîmwaaalî', yîhîthîwe'na dînyîlîmwagyîla! Sare'na 'Aala!' dîna yîpîja' nîmî Nîmware

wawinya yadinyanna dinyilimwagyla!
¹² Naanga nebulya'na yihithivanige. Kwai
 nyilimwagori nimi nayaa yadinya sahwai nayaa
 sara yadelyi. Yayo, Nimwaryawinna wawa'muji
 diraginaange' nimireraavina wijaavide'na
 yadinyangi nimirera wawilapi'dengira.
¹³ 'Jizaazai sara sara dadevaabisa'na wida'ima!
 dapiji niminiy'na yaya'na kany'waaravapiji sara
 yidesira! 'Yi a'mwera tinna wanganapiji
 Gawaalivaangeiny'na a'mwera Gotiyar'ine yaya'
 munyaba makibika!' da'muji sara yidesira.
¹⁴ Niminiy'na yaya'na piri' kiri' kany'waaravapiri
 sa' sariminy'ine' yideinyira.

*"Divi Kuryai Tewaanyai walaabathelyi," Jiza-
 azai wida'nesi.*

¹⁵ Niminiy'na tewaanya yihivu'naja'
 niminiy'ine kiwinyanna sara jideihilyi. ¹⁶ Nimi
 Nimwar' yawaara'na kya'muri 'Maredaa'dei
 yi, Maredadei Pwai yuyagaa' yuyagaa' sarimiji
 mwaalana!' dozi yihizaavadelyira. ¹⁷ Sahwai
 nebulyabwine Kuryari Kwaakevaki mwaalyara
 mamaari yipinere. Sahwara Kurya sari tinna
 mwanganyi, siduta myawiri yadivisa'na ma-
 maari yipidelyi. Sarimi siduta yawi'maniga'.
 Sarimiji kuna mwaalaka divi sariminyi
 wila'yihimwaalade'na sahwari yawi'maniga'.
¹⁸ Sigiraayaihiri mihyagalya'mayi yideinyi.
 Sariminyawinna ayina bideinyi. ¹⁹ Divi
 maalikegaa' Kwaakevaki mwaalyara
 tinna mwanganyi nyipide' kiri' sarimi
 dinyanganyideihilyi. Nimi mwaaidinya'na
 sahwaihi dimwaalyideihilyi. ²⁰ Sagaa'

yîma'nadehaa' nîmî Nîmaamaangerînyî. Sarîmî nîmînyînyîra. Nîmî sarîmînyînyîra. Yî sagaa' sare' jawîryideihîlyîra.

²¹ Da pwai nîmîre yagaaiwînyî kinînnakei sa midîda sahwaî nîmînyîna tewaanya wîvu'nadelyî. Nabaai nîmînyîna tewaanya wîvu'nade sahwarîna Nîmaamaangerî tewaanya wîvu'nadelyî. Nîmî sainyî sahwarîna tewaanya nyîvu'nojî sahwarîna nîmî sainyî wîjîwaainîndelyîra.”

²² Gamîre pwai Juthaazai wo'nîkelyî. Sai Juthaazai Yîzîkerîyotîyai mîka! Juthaazai pwai mwaalakei wîdîna “Naangeigî, maalîkegaa' gîmîreinaavîna gîmînyî dînejîwaainade' Kwaakevaki mwaalyaraavîna mujîwaainyî jîthe'na be'nanaka?”

²³ Jîzaazai ja'nawîdîna “Pwai kwai nîmînyîna tewaanya wîvu'najai nîmîre yagaalya' midînna yadelyî. Sahwarîna Nîmaamaangerî tewaanya kuvu'nojî saryabanna naarîmîndînaai bîna yakwoihîjî saryaba ku'dîkevi mwaalakadelyî.

²⁴ Pwari nîmînyîna tewaanya mwîvu'nyîvanîkei nîmîre yagaalya mamîdînyîvanîkelyî. Sarîmî yagaalya' kadîka nyu'nîwaasa' nîmî gaveinyîre' mîka! Aawa. Nîmwai nyîdasaabakeresîra.

²⁵ Sarîmîjî kuna mwaaîdî sa yîhîthîwa.

²⁶ Nîmwai yawî'na ‘Jîzaazarebwi nayaa wîjîwaainana!’ yawî'na yojî nîmîre yayavi sarîmînyawînna Maredaderî yasaabathelyî. Maredade sai Kurya Tewaanyalyîra. Kuryai Tewaanyai yuyangi yîhîzîwaakojî, nabaai, yîhîthîwe yuya nayaa jawîryideihîrî yîhîmwaaîhadelyîra.

27 Dahaa' kaanyagaa' yihithima!
 'Tewaanna dimwaalyila!' Sareburidaa'nyi
 kwaamu'nanyabwi sariminyaba ya-
 galya'mavidesi. Yi ninnya kwaamu'nanyabwi
 yihizaavide'nanyi. Kwaakevaki mwaalyara
 yaasiwa'na dina 'Tewaanna dimwaalyila'
 yaasiwa'na dadivitabaai' ninnya
 kwaamu'nanyabwi mujaayi yihyide'nanyi.
 Nayaa yihizaavide'na sarimire simunya'
 simuyiwaala myawipina! Simunya gami sa' lika
 myanna! 28 Yihithiwa. 'Kaanya wawa'muji kiri'
 sariminyawinna ayina bideinyi,' diwe kadika
 nyu'niwaa'. Sarimi niminyina tewaanya nayaa
 yihivu'naji kwaji Nimwaryawinna wide'na
 yilaaya kyipidika! Nimwai naangelyi. Nimi
 maalikeinyira. Sare'na yihithiwa. 29 Dahaa'
 sa yihithiwa. Sa myima'nyagaa' yihithiwa.
 'Divi sara kyima'nori dinyilimwagyila!' dena
 sara yihithiwa. 30 Naangegaa' yagaala kwalaalya
 yihithideinyi mika. Sare' dare'nesi. Kwaakevaki
 mwaalyaraavi maremwaaidei 'Jizaazari
 kayaa'na yima!' daka bivani'. Sai niminyi aane
 piri' kiri' maayalyira. 31 Aawa. 'Kwaakevaki
 mwaalyara "O, Jizaazari Nimwarina tewaanya
 wivu'nadelyira," yawipika!' dena sara yivanige.
 Nimwai sara nyidakakabaaibi' yuya sara
 yivanigeinyira," wida'.

"Kaanyaana! Davidaa'nyi wawaana!"

15

Jizaazai giraipiwila nebulyarinesi.

1 Jizaazai gannyaraavi wiḁina “Nimi sahwainyi giriapiwila nebulyainyira. Nimaamaangei giriapiwawinya' nayaa maremwaaidelyi. 2 Sahwai niminyi taanya gazabaaizabaa siḁa myi'nyadevaai piḁalasi'na yadelyi. Nabaai gazabaaizabaa siḁa yi'nadevaai 'Sabaai siḁa piḁi yi'nana!' dada nayaa piḁaaina. Gamiḁa dina 'Taanya savi buwita yuya sedala waryaanya yuya piḁaalima! Taanya sa' tewaanya' yima'nana! Yisiḁa naanga yi'nadevaalyi.' Dina yaka nayaa piḁaaina yadelyi. 3 Yagaalya' yihiḁiwe' sarimire siḁusangi tewaanyaihi giriḁa maayaihiyira. 4 Nimiḁiḁi kuna dulanyiḁmwaalyiḁa! Sariminyi kuna wiḁayihimwaalima! Taanya piḁaai giriapiwila kaaviyaviḁi kuna mwari yajavaai yisiḁa gamiḁa sabaai myi'ny' yadevaaiḁi' niminyi kuna mulamwaalyi nyipijaihi yisiḁa myi'ny' jideihilyi.

5 Nimi sahwainyi giriapiwila kaaviyainyi. Sahwaihi giriapiwila taanyabaraavihilyi. Pwai kuna wiḁanyiḁmwaalajai gaminyi kuna wiḁamwaaimujai yisiḁa naanga yi'nadengi. Sariminyi mulamwaalyi yihiyiwijaihi aane piri' kiri' nayaa mi jide'nanyira. 6 Pwai niminyi mulamwaalyi nyajai taanyabaaiḁisari mwasilaḁa wasi'na ya'nelyi. Taanya sabara wasi'nikebara yawaka baihi'na yinikebara, sabara mari'bwarakina yinikebara dikevi marira'na ya'nengi. 7 Nimiḁiḁi kuna wiḁanyiḁmwaaiḁizaihi nabaai sariminyi nimire yagaalya yihwarajaihi yawi'na 'Sa'na maarima! yawi'na yapiji Gotiyari sara kyiwavaravapiji

sariminyina yima'nadesira. ⁸ Sarimi yisila yinipija'na a'mwera tinna yihwanganapiji dina 'A'mwe sara Jizaazarerera,' dipi'desi. Sarimi tewaanna sara yapijiya'na a'mwera Nimaamaangerina dinyina 'Byaannakelyi. Diraginyalyi,' dinyina yipi'de'nanyi. ⁹ Nimwari niminyina wivu'nadevaai' sariminyina sara nyivu'nadeinyi. Nimire wivu'nyaburi kuna dimwaalyila! ¹⁰ Nimire kiwinya kuna midibiza' nimire wivu'nyaburi yinahu dimwaalyideihilyi. Nimi sainya Nimaamaangere kiwinya midinena gamire wivu'nyaburi yinahu mwaaiheinyi. Sara yigevaai' sara dimwaalyideihilyira.

¹¹ Sa yihithiwa. 'Nimire wivu'nyabwi sariminyi yihwarana! Sarimire yilaayabwi yuneba yihyeku'nana!' dena sa yihithiwa.

¹² Nimire kiwinya da' yihithima! Niminyi giminyina tewaanya nyivu'niwakabaaibi' nimire pwaraavina tewaanya givu'nana!

¹³ A'mwe pware kware wivu'nyabwi gya'mweraavina wiadaa'nyi gamire gaalyabwi wakaja' naangebulyi. Naangebwi pibwi aane pwai kwari mwarika!

¹⁴ Kiwinya yihithivanigengi yipijaihi nya'mweihilyira. ¹⁵ Dahaa' myihizivanige. Yaasiwa'wawinyaihilyi. Maalikeihilyi.

Widaayadei gamire maremwaaidarina yawi'na 'Ber!' yadelaka? Nimi myawirivanigeinyi.' Sara yawi'na yade'na 'Nya'mweihilyi,' yihithiwa. Nimaamaangeri yuyanna wi'nena mena sara yihithiwa. Saburidaasi 'Nya'mweihi,' yihithivanigeihilyi. ¹⁶ Niminyi manyidahlakyesaihilyi. Aawa. Sariminyi

yihithahilakeinyi. Yihithahilakena dara yihithakiwa. Wawapiji giraipiwilyabaai sila naanga yadevaai' sarimi sara jila! Nabaai sila sa yuyagaa' kuna waragwona! Nimirebwi yawiramaa'na yadivi' nimire yayavina Nimwari yuya sara kyiwaaravapiji 'Nimwai yihizaavana!' dena yihithakiwa. ¹⁷ Sare' kiwinya' dara yihithivanige. Pwaigi pwarina givu'nana! Pwaigi pwarina givu'nana! Yuyaihi sara jila!

Kwaakevaki mwaalyara Jizaazareraavina sinna tika wida'de'nesi.

¹⁸ Kwaakevakiyara Gotiyari myawiryadivisara sariminyina similika kuloji atika maru'napina! Dara jawiryide' 'O, sinnawi sagaa' Jizaazarina similika dulaka!' ¹⁹ Kwaakevaki mwaalyaraavireihi mwaaibizi kwaji Kwaakevakiyara 'Nennya avaalyarera,' dipiji kwaji sariminyina tewaanya kuvu'nadika! Sarimi Kwaakevaki mwaalyaraji mamwaalyigasaihilyi. Aawa. Dahaa' nimi Kwaakevaki mwaalyaraavidaa'nyaihiri yihithahilakeihilyi. Sarevi Kwaakevaki mwaalyara sariminyina sinna tika wida'manikeihilyi. ²⁰ Kigaa' yagaalya' yihithe' jawirila! 'Yaasiwa'wawinyai maalikelyi. Gaminyi maremwaaidi naangelyi.' Sare'na yihimaremwaaidinyainyi niminyi kayaa'na nyevera, nabaai sariminyi kayaa'na yhipi'de'nanyi. A'mwera nimire yagaalyavi midinevera, nabaai sarimirevi yihimidibi'de'nanyi. ²¹ A'mwe sara nyidasaabakeri myawirivanigasa'na nabaai niminyina 'Gamire yaya' kininnakera daaka!'

dapiji yuya kayaa'na sara yihipi'derera.
²² Nimi kaanya mabyiwiji kwaji yagaalya' mujiwiji kwaji Gotiyai maji kyadi' 'Sidu'nakera kayaa'na yadivisare.' Sare'na mena wida'na ye'ne' sawara muji'na 'Nimi myawirya yaasiwa'na yiweinyi,' muji yipi'de'nanyi.
²³ Pwai niminyina sinna tika widavaka nabaai Nimaamaangerinaji sinna tika wida'manikelyi.
²⁴ Kuminyaba diraginna myiwiji kwaji sare tinna mwanganyipiji kwaji sawaraavina Gotiyai muji 'Kayaa'na yeverera.' Diraginna sara kye yuyagaa' yuyara sara myesabulyi. Sare'na kiri' nayaa kye kumi tinna wanganna nyeva kuna kayaa'na yadivi' niminyinaji Nimaamaangerinaji sanidainaarina sinna tika wida'manikerera. ²⁵ Sahiri' wari'. Kumire Kiwinya' Gotiyai wijaavake' dinike' yune'na nebulya'na yima'nadesi. Dara dini' 'Niminyina sinna tika yaasiwa'na widavakerera.'

²⁶ Maredadei Kuryai walaabathelyi. Sai nebulyabwi yadei Kuryai Nimwaridaa'nyai walaabathelyi. Nimwaridaa'nya Kuryai sariminyawinna yasaabideinyi. Mena kyasaaba'muji sai niminyina yihizalikurakadelyi. ²⁷ Nabaai, sarimi niminyina pwaraavi duzalikurakyideihilyi. Aayawidaa'nyi nimiji mwaidaanya'na pwaraavi duzalikurakyideihilyira niminyina.

16

¹ 'Nimirera niminyi nanyimarasi'nipidika!' dena yagaala sa kavena yihithiwa. ² A'mwera sariminyina similika kuloji kumi yihithipi'de

‘Nemîre Lotuangevîdaa'nyî yuna dalyula!
 Yîthaa, kayaa'nanyagaa' pîgaa' yîma'nadehaa'
 a'mwera sarîmînyî tamakîna yîhyapîjî
 kwaasî dîna ‘Yîwo' Gotiyare wawînya'
 wîdaayîvanîgoinera.’ ³ Nîmwarijî nîmînyîjî
 manehyawîriwaasa'na sarîmînyî kayaa'na
 sara yîhipî'dere. ⁴ Sagaa' sara yapîjîyagaa'
 ‘Sarîmî dara jawîrîla! “Ai, Jîzaazai sara nedake
 yîma'nîwakengî,” ” dena yagaala sa kavena
 yîhîthîweinyî.

*“Kuryai Tewaanyai yadevulyî,” wîdake'nesî
 Jîzaazai.*

Sînnawîdaa'nyî sarîmînyaba mwaale'na
 yagaala sa mujîna. ⁵ Muji yîhyena kirî'
 dahaa' divî nyîdasaabakeryawînna ayîna
 wîdeinyî yuya sa yîhîthîvanîgeinyî. ‘Ayîna
 wîdeinyî,’ kyîhîthîwa kirî' sarîmîjîya aane pwai
 kwai manyîdaanganyîwa' ‘Gawîinneigînaka?’
⁶ Sara kyîhîthîwa sarîmîre sîmunyangî
 kale naanga yuna yîhyîvanî'. Kale naanga
 kyîhyîvanî' kirî' ⁷ nebulya' yîhîthîvanîge.
 Sarîmînyîne nîmî kaanya wîde' tewaanyabulyî.
 Sare' dare'nesî. Nîmî kaanya mwîyî
 yîwîja' sarîmînyawînna Maredadei mabi
 yadelyîra. Arîkawî. Sare' nîmî kaanya
 wîna yîwîja' sarîmînyawî sarî yasaabîna.
⁸ Sarî yasaabîna kya'muji walaabîna yojî
 Kwaakevakî mwaalyaraavî mena wîjîwaainade
 ‘Sarîmî yuyaihi kayaa'nanyabwî yîvanîgava.
 Yîda'maraangeburîna nayaa myawîrivanîgava.
 Gotiyai kotîya' sarîmînyî yîhîzîdavadelyîra.’
⁹ Nîmînyî manyîlîmwagyîvanîgasa'na

kayaa'nanyabwi yivanigava. ¹⁰ Nimwaryawinna tewaanyainyi kwawa'mwi yuyagaa' sarimi tinna dinyanganyideinyi mi'. Sa'na Kurya Tewaanyai 'A'mwera Jizaazarina nayaa yawipika!' dozi yida'maraangebwi wijiwaainade. ¹¹ Kwaakevakî mwaalyaraavi maremwaaidei Saataanîmi koti'ya' mena wiji'davake'na Gotiyai yuyaraavi koti'ya' wijathelyi. Sana sana Kurya Tewaanyai Kwaakevakî mwaalyaraavi wijiwaainadelyi.

¹² Yagaala piniji myihiziwa. Aawa. Dahaa' yagaala sa nayaa mamaari jideihilyi. ¹³ Sa'na kirî' divi Kurya Tewaanyai nebulya' dadei sahwai walaabozi nebulya yuyangi nayaa yihibwaridaakwade. Sare' dare'nesi. Kuryai yawiroji gannya sidusa' muji yihyade. Aawa. Nimiji Nîmaamaangelyi widakaja' yihithathe. Divi yima'nya'ne yihithathelyira. ¹⁴ Sahwai niminyina dina 'Naangelyi,' yaka byaannakeinyi nyimwaaihadelyi. Nîmîre diwija' maarîna yoji sa' yihithathelyi. Sara yihithozi byaannakeinyi nyimwaaihadelyira. ¹⁵ Yuya Nîmware sa nîmîrengira. Yuya Nîmware yagaala sa widadinyangi. Sareburidaasi 'Nîmîre diwija' maarîna yoji sa' yihithathelyi,' yihithiwa.

Kale'nesi yilaaya'nesi sawaarînesira.

¹⁶ Divi maali'kegaa' tinna mwanganyî dinyidera. Sagaa'daasi maali'kegaa' kwavilavoji tinna dinyanganyideinyi."

¹⁷ Sarevîdaa'nyi gamîre pwara gamîre pwaraavi widîna "Nedîwake' be yagaalavaka? Nedîwa' 'Maali'kegaa' tinna mwanganyî dinyidera. Sagaa'daasi maali'kegaa' tinna

dinyanganyideinyi.' Nabaai nediwa'
 'Nimwaryawinna wide'nanyi.' ¹⁸ Sara nediwake
 yagaala 'Maalikegaa'na,' be yagaalavaka?
 Nediwanike' myawirivanigoina," widina ye'.

¹⁹ Jizaazai kumire yiwaarata wija'na
 yawirakei, widina "Yihithiwa. Maalikegaa'
 tinna mwanganyi dinyidera. Sagaa'daasi
 maalikegaa' tinna dinyanganyideinyi.
 Sa'ne sarimi sara jiwaara'nivanigava!

²⁰ Naanga nebulya'na yihithivanige. Sarimi
 kinna, kidaata dizide' kiri' Kwaakevaki
 mwaalyara yilaaya yipi'desi. Sariminyi kale
 yihyade' kiri' divi sarimire kale' yilaaya
 yima'nadesi. ²¹ Mudangegaa' a'mwe' gamiregaa'
 yima'nake'na bwaranyaryaba daanga wivida
 kale wiadesi. Nabaai mena maa'da gannya
 bwaranyai Kwaakevaki yima'nade'na yilaaya
 yina yadesi. Yilaaya yade'na gannya kale'na
 ayina myawiryadesi. ²² Sarevidaa'nyi a'mwe'
 sara yadevaai' sarimi sara jideihilyi. Dahaa'
 kale yihyivanike' kiri' tinna ayina wanganna
 kyihya'muji sarinnya kuryara yilaaya naanga
 yipi'deihilyi. Sarimire yilaaya sa' a'mwe aane
 pwai kwai kuka mipalamaari yadeihilyi.

²³ Yirika savi niminyi aane piri' kiri'
 miwaarayi dinyideinyi. Naanga nebulya'na
 yihithivanige. Niminyina nayaa yawi'divi'
 Nimwari sara yiwaarapija piri' kiri' Gotiyai
 niminyine yayavi sara yadelyi. ²⁴ Kigaa'
 niminyine yayavi myiwaarayi ye'. Dahaa'daasi
 sara yiwaaravapiji sa' daapina jideihilyi.
 'Nemire yilaaya' naanga yinahu neyeku'nana!
 dapiji dithaapyideihilyi.

*Jizaazarebwi Kwaakevakⁱ mwaal-
yaraavireburⁱ wavila'nike'nesi.*

²⁵ Yagaala da ke'ba'nanyangi yihithiwa. Sara yihithena aawaaya pigaa' yima'nadehaa' ke'ba'nanyangi kuna muji yihideinyi. Aawa. Sagaa' Nimwarina aangyagaalya' kave yihithideinyi.

²⁶ Yirika savi niminyine yayaviji yawi'divi' Gotiyari jiwaarayidelyi. 'Nimwari sariminyina yiwaaravima!' muji yihideinyi. ²⁷ Sare' dare'nesi. Nimwai sahwari sariminyina tewaanya wivu'nade'na kadika nayaa yihu'nadelyi. Niminyina tewaanya yihivu'nivanike'naji 'Jizaazai Gotiyaridaasalyi,' yawi'divi' nyilimwamanigasa'naji Nimwai sariminyina tewaanya wivu'nivanikelyi.

²⁸ Nimwaridaasainyi walaabena Kwaakevakina biweinyi. Nabaai dahaa' Kwaakevakidaasi ya'mava'mwi Nimwaryawinna ayina wideinyira."

²⁹ Sagaa' gamirera widina "Yithaa, dahaasagaa' aangyagaalya' kave nedivanigi. Ke'ba'nanya aane pirⁱ kirⁱ manejivanigi.

³⁰ Dahaa' dara yawi'mwo' 'Ai, Jizaazai yuya yawi'delyi.' Nemire yiwaarata magizwogaa' yuya sa nayaa yawi'di nayaa sara nedivanigi. Sarebwi yivaniginyavi dara gilimwamwo' 'Ai, sahwai Gotiyaridaasai daaka!'"

³¹ Jizaazai ja'nawidina "Dahaa' danyilimwamanigava! ³² Yithaa, aawaaya pigaa' yima'nadehaa' dahaaki. Dahaa' gazaigizaigi ginnya angevina likaanya wina jitheiginyi. Piwinna piwinna yiwinama'na yapiji nimi gaveinyi mwaalidewi dinyagalya'mayideihilyi.

Nimi gaveinyi mwaalya'na mi'. Nimwai nimiti mwaalade'na gaveinyi miika. ³³ Nimi dina 'Nimirera nimityi kwaamu'nanyabwi kininnakera mwaaibika!' dena yuya sa yithithiwa. Kwaakevaki daanga naanga kininnakeihili. Sare' kiri' kwaakevakia kayaa'nanya dathiwamwenna jivaimwannyila!"

17

Jizaazai gannyaraavina Gotiyari widake'nesi.

¹ Yagaala sa Jizaazai mena widakegaa' sagaa' Sigunyavi maranganna yaka Gotiyari widina "Nimwai, dahaa' naangegaa' yima'niwakegaaki. 'Nyibwaalivaangei byaannakeinyi nyimwaaihana!' da'gizi Jiwaalivaangei byaannakeri dumwaaihya! ² Kilaa'naka yuyaraavi nyijaavaginyaraavina gimidi 'Yuyagaa' yuyagaa'ne gaalyabwi wijaavana!' dahina sahwaravi maremwaalyabwi gaminyina wijaavaginyabaaibi' byaannakeri dumwaaihya! ³ Yuyagaa' yuyagaa'ne gaala sabwi daresiira. Gotiya Nebulyaigi Nawinya gaveiginyiji Jizaazai Kiraazitiyari widasaabahinyariji yawiramaata'nesiira. Sa' yuyagaa' yuyagaa'ne gaalyabulyiira. ⁴ Kwaaka davakiyavi a'mweraavi gimire byaannyabwi wijiwaaine. 'Diraginna sara sara ja!' kanyidahi mena sara yimwannyina yena wijiwaaine. ⁵ Kigaakuna Kwaakeva' myima'nyaakegaa' gimiji byaannyabwi kininnakeinyi. Nimwai, dahaa' byaanna sabwina gimidi sahwaiginyaba byaannakeinyi dinyimwaaihya!

6 Kwaakevaki mwaalyaraawyadaa'nyi pwaraavi wiijaavina nyaginya sahwaravi gimire sidusa'na gimire yaya'na wiijaawaina. A'mwe sara gimirera mwaale'. Gimirera mwaalesaravi nyijaavaginyarera. Gimire yagaalya' mena midimwaa'. 7 Mena midimwaasaraavine dahaa' githivanige. Yuya nyijawaanya sare giminyidaa'nyangira. Nabaai sare' mena yawi'manigasarera. 8 Yagaalya nyijaavaginya yagaala sa sahwaravina wiijaavina kye a'mwe sara daapina yeva nebwinada yawi'mwaasa' 'Yo, Gotiyaridaasai Jizaazai walaabakei daaka!' Nabaai dara limwamwaasa' 'Ya, Gotiyai Jizaazari jasaabaka!' Yi sare'na mena yawi'manigasarera.

9 Kuminyina Gotiyaiginyi gyiwaara'manige. Kwaakevakiyara gimirebwi myadivisare. Kwaakevaki mwaalyaraavina magyiwaarayivanige. Aawa. A'mwe nyijawaanyaraavinesi. Giminyinera mwaaihasa'na gyiwaara'manige sahwaravina. 10 Nimire yuya gimirengira. Gimire yuya nimirengira. Sare' sahwaravi byaannakeinyi yima'niwa. 11 Sare'na dahaa' giminyawinna bivanige. Kwaakevaki kuna mamwaalyi yidera. Kiri' Kwaaka davaki nimirera mwaaiibi'dera. Nimwai Tewaanyaigi girika maayaigi, ginnya diraginya' ginnya yaya' yawira'gizi saraavi tewaanna dimaredaaka! Gimire yaya sa' kanyijaavagi tewaanna mwaiihe. 'Nimiji gimiji avaalyainai mwaaiholabaabi' avaalyara mwaaiibika!' da'gizi kuminyi sara dimaredaaka! 12 Kuminyaba mwaiidi

sahwaraavi maredaave. Ginnya yaya' diraginya' kanyijaavagi nîmî diraginna maredaave. Dame diraginna maredaa'na yadi aane pwai kwari myagalya'mayi. Sara yadi kiri' gave pwai yagalya'masabwi kininnakei yagalya'mavadelyira. Sarerina kigaakuna gimire Bukuya' sara dinike'nanyi.

¹³ Diraginna maredaa'na yena dahaa' giminyawinna bivanigeinyi. 'Kuminyi yunebanna nîmire yilaayabwi yeku'nana!' dena Kwaakevaki yagaala sa sara githivanige.

¹⁴ Gimire yagaalya' nîmireraavina nayaa wijaawa. Kwaakevakiyaraavi sahwaravina sinna tika wida'mani'. Kwaakevakiyainyi mamwaalyigevaai' sahwa Kwaakevakiyara mamwaalyigasa'na sinna tika wida'mani'.

¹⁵ ' "Nîmireraavi kayaaka nyigaibithika!" dena kwaaka davakidaa'nyi dimakilaawa! magizivanige. Aawa. 'Kayaa'nanaangei Saataani kayaaka nyadika! Davaki nîmirera mwaaidapijiyaraavi dimaredaaka!' Sara gyiwaara'manige.

¹⁶ Kwaakevakiyainyi mamwaalyigevaai' sahwa Kwaakevakiyara mamwaalyigasarera. ¹⁷ Gimire wawinya'na nayaa yipi'de'na sahwa tewaanyara girika maayara nebulyaburi yima'nipika! Gimire yagaalya' nebulyasira. Yagaala sa' widiwesti.

¹⁸ Kwaakevakina nyidasaabahinyabaai Kwaakevaki mwaalyaraavi wijiwaakya'na widaase nîmireraavi. ¹⁹ 'Gimire wawinya'na nayaa yipi'de'na tewaanyara nebulyaburi yima'nipika!' dena gimire wawinya'na nayaa yide'na kuminyine'na tewaanyainyi girika

maayainyi wimwaalyige.

²⁰ Nimîrera sahwara gaveraavi Gotiyaiginyi magyiwaarayiwa. Aawa. Divi kumî pwaraavi niminyina wîdîna kyapiji kumîre yagaalyavi nyîlimwabî'dera kwaraavîna jî yawîrena gîthîwa. ²¹ Nimwai, 'Yuyara avaalyara mwaabîka!' dena gyîwaara'manîge. 'Gîmînyi wîlagîmwaaihe', nimînyi wîlanyîmwaaihinîyabaaibî' avaalyara mwaabîka!' dena gîthîwa. Nabaai, 'Kwaakevakî mwaalyara dara limwabî'de'na "O, Gotiyai Jizaazari wîdasaabakelyîra," sara limwabîka!' da'gîzî 'Naarîmînyi wîlanehinîmwaabîka!' dîthathe'na 'Avaalyara mwaabîka!' dena gyîwaara'manîge. ²² 'Naarîmî avaalyainai mwaaiholabaaibî' sahwara avaalyara mwaabîka!' dena byaannya' mena nyîjaavagînya sa' wîjaawa. ²³ 'Kumînyi wîlamwaalîma! Nimînyi kuna dulanyîmwaala!' gîthîwa. Gîmî nyîdasaabahî. Nabaai gîmînyi nimînyi na tewaanya gîvu'nadevaabî' kumînyi na gîvu'naderera. 'Yî Kwaakevakîyara sare' yawîpîka!' dapîjî 'Sahwara avaalyaraavi yune'na wîmwaaihaka!' dakwoihîjî kumînyi wîlamwaalîma! Nimînyi kuna dulanyîmwaala!

²⁴ Nimwai, nimîreraavi nyîjaavagînyaraavîna 'Nîmî mwaalîdeva nîmîjî mwaabîka!' da'mujî simunya sara yawî'manîge. Kwaaka dava' mwaki yagînegaa' nimînyi na tewaanya gîvu'nyaake'na byaanna dîragînya' nyîjaye. 'Byaanna sa' wangabîka!' da'mujî 'Sahwara nîmîjî mwaabîka!' gîthîwa.

²⁵ Nimwai, yîda'maraangebwi kînînnakeigî,

Kwaakevakiyara giminyi myawiryadivi' kiri' nimi sainyi giminyi yawi'dinyainyi. Nabaai gimini ninyi nyidasaabahinya'na a'mwe dara nimirera sara yawi'mwaa'. ²⁶ Giminyina gimire yayavina sahwaravi yibwaridaakwena nabaai, kuna yibwaridaakwideinyi. 'Giminyi ninyina tewaanya givu'nadevwi kuminyi warana! Nabaai kuminyi wilmwaalima! da'muji yibwaridaakwideinyi sahwaravi."

18

Aawilasara Jizaazari wila pwiyina yesa'nesi.

(Matiyui 26:47-56; Maak 14:43-50; Luki 22:47-53)

¹ Jizaazai sare mena widakegaa' gamirerari saba yagalya'maveva Aalya Kidironiyavi ga'ma'na ye'. Saba yiwawinya piji' wa'disiyaba. Aalya Kidironiyavi ga'ma'na yeva wawinya savi wilamwaaina. ² Kigaa' wawinya savi Jizaazalyi gamirerari yikabadivi' mwaalesa'na Juthaazai yikamaangeraavina Jizaazari wibwaridaakwakei wawinya savi yawi'nikei. ³ Sarevidaa'nyi sai wawinya sawinna wina. Nabaai aawilasaraji Gotiyare Angevine dameraji kwara kaanna wina ye'. Gotiyarina mubithika yira'divita naangeraji Periziyaraji sara aawilasaraaviji dameraaviji widasaawina. Widasaawina kye' kumire kwaari'masiraminya kilika maarina yeva laamuyaji yi'baaka livamakuna. Livamakuna yesaraavina Juthaazai Jizaazaryawinna yibwaramakuna. ⁴ Sarevidaa'nyi Jizaazai gaminyine yuyangi

yîma'nya'ne yawî'na yakei, badaapiyaraaya-banna bîna. Badaapiyaraayabanna bîna yaka wîdîna “Aarîna bî'manîgava?” ⁵ Kumi ja'nawîdîna “Naazaretî mwaalyai Jizaazarîna bîwoinera.” Jizaazai wîdîna “Sahwainyî nîmînyîra.” Sagaa' kumînyaba Juthaazai yîbwarîdaakwîai daavakelyî. ⁶ Jizaazai “Sahwainyî nîmînyîra,” wîdîna yakevîdaa'nyî kumî samwî yîgî'daa'na yeva kwaakewîna walakuna ye'. ⁷ Sarevîdaa'nyî sai ayîna yîwaara'na “Aarîna bî'manîga'?” Yîwaara'na kya' kumî sara wîdîna “Naazaretî mwaalyai Jizaazarîna bî'manîgo.” ⁸ Jizaazai ja'nawîdîna “Mena yîhîthîwa. Sahwainyî nîmînyîra. Nîmînyî bî'manîgasavîdaa'nyî a'mwe dara nîmîrera wîpîka!” ⁹ Mena wîdake' “Yune'na nebulya'na yîma'nana!” daka sara wîdîna ya'. Dara wîdakesî. A'mweraavi nyîjaavagînyarajîya aane pwai kwari myagalya'mayîwa.

¹⁰ Sarevîdaa'nyî munnaanyavi Saaimoni' Pitai kwaari'masîramînya' maruzaainyîna yakei. Kwaari'masîramînya sa' labwa'nyîna yaka pwari davîna. Gotîyarîna Yîra'de Naangere yaasîwa'wawînyai damerari bîna yaka daavîna. Sai daavîna kya' Pitai gamîre kadîki' aangasîmagînyî' yuna daku'na. A'mwe sarîne yaya' “Maalîkaazala.” ¹¹ Kadîki' yuna daku'na yakevîdaa'nyî Jizaazai Pitarî wîdîna “Gînnya kwaari'masîramînya' ayîna duzaainana! Gara yawî'manîgîna! Nîmaamaangei daanga naanga nyîvînade'ne kaapîya' nyîjaawaka sa' manyî yîdeinyî daa! Nîde'nanyî.”

A'mwe Anaazaryaba Jizaazai daavake'nesi.

¹² Sarevida'nyî aawîlasarajî kumîre maremwaaide naangelyî Juya damerajî sara Jizaazari galalîmwanna yeva gamîre asawaari wîla pwi'yîna yeva ¹³ sinnewî a'mwe Anaazaryawîna makuna. Sare' dare'nesi. Sagaa' Gotîyarîna Yîra'de Naangei Kaayapaazai mwaalakei. Kaayapaazari ganyaalîmaangei Anaazai mwaalakelyîra. ¹⁴ Nabaai Kaayapaazai sai Juyaraavi wîdîna “Gave pwai a'mweraavîna balaja' yî sa' tewaanyasîra.” Sara wîdîna yakelyî Kaayapaazai.

Pitai Jizaazarîna “Maavelyî,” wîdake'nesi.

(Matîyui 26:69,70; Maakî 14:66-68; Lukî 22:55-57)

¹⁵ Saaimonî Pitayî Jizaazare pwalyî saraai Jizaazari mîdîna. Gamîrei pwarîna Gotîyarîna Yîra'de Naangei nayaa yawî'na yadelyî. Yawî'na yadei angwaasavî kusîlaanna Jizaazalyî wîlaawîna. Jizaazari kuna mîdîna yagîlyai wîlaawîna. ¹⁶ Wîlaawîna kya' mwasîlaa tikuryaba Pitai daavîna. Sarevida'nyî gamîre pwarîna Gotîyarîna Yîra'de Naangei nayaa yawî'dei sai mwasîlaanna ayîna walyuna yaka tikuryavî maremwaaide sîdiraayavî wîdîna yaka kusîlaanna Pitarî makuna. ¹⁷ Sarevida'nyî tikuryavî sîdiraaya' Pitarî wîdîna “Pwaigîjî a'mwe sahwareigî midaaka?” Sai kwaasî wîdîna “Aawa, nîmî mîka!”

¹⁸ Sagaa' yîrîlyagaakî. Sare'na damerajî yaasîwa'wawînyarajî dîka marîra'na yeva savî daavîna yeva yîmwannyîna. Yîmwannyîna

yadaapi Pitai bina yaka kuminyaba daavina yaka yimwannyina ya'.

Gotiyar'ine Tamira'de Naangei Jizaazar'i y'iwaaravake'nesi.

(Mat'yui 26:59-66; Maak'i 14:55-64; Luk'i 22:66-71)

¹⁹ Sarev+daa'nyi a'mwera d'inyina “Anaazai, Gotiyar'ina Yira'de Naanga pwalyi.” Nabaai d'inyina yesai A'mwe Anaazai Jizaazar'i yiwaara'na. Gamireraav+naji gamire wijiwaakyav+naji yiwaara'na. ²⁰ Sara

yiwaara'na kya' Jizaazai ja'naw+id+ina “Yuyagaa' Kwaakevak+yaraayaba yuyaraavi ku'maayaba widad+inyainyira. Juyainaavire lotuangengiji Gotiyare Angeviji saba wijiwaak+ina. Juya yuyara yikabad+v+saba yuna wijiwaak+ina yad+inyainyi. Lika yulya'na yagaala aane pir+i' kir+i' mujad+inyainyi. ²¹ Sara

yad+inyainyine'na baa'na nyiwar'a'mwaa? A'mwera kad+ika nyu'nesaraavi yiwaarava'g+izi gith+p+i'derera. Yi+thaa, kumi yagaala sara wide'na nayaa yaw+i'na yesa'nanyira.” ²² Sai sara wid+ina yakegaa' dame pwai Jizaazare maangw+idaanyaba asasi j+i+r+i'bwararanna yaka wid+ina “Ami, Gotiyar'ine Tamira'de Naangeri sara baa'na ja'naw+idiwaana!”

²³ Jizaazai ja'naw+id+ina “Ni+mi kayaa'na wid+iwiji kwaji sa'na dava yuyara mwaai-hasaraavi duziwaakya! Sa'na ni+mi tewaanna wid+iwe' baa'na nyi+ramwaana?”

²⁴ Sarev+daa'nyi Jizaazai wila kuna pw+i+y+i+n+ikeri Anaazai yaas+ina kya' Gotiyar'ina

Yira'de Naangei Kaayapaazaryawinna pwara makuna ye'.

Pitai Jizaazarina “Maavelyi,” ayina widake'nesi.

(Matyui 26:71-75; Maaki 14:69-72; Luki 22:58-62)

²⁵ Sinnawi dikeyaba Pitai daavina yaka dikevi kuna yimwannyina. Kuna yimwannyina yadaa'nyi pwara Pitari widina “Nabaai, a'mwe sahwareigi midaaka?” Pitai kwaasi widina “Aawa, nimi mika!”

²⁶ Saba Gotiyarina Yira'de Naangere yaasiwa'wawinya pwai mwaalina. Pitai a'mwere kadikiki yuna daku'na gamijiyarajiyai mwaalina. Sai mwaalina yaka widina “Wawinyavi salyiaiginyi tinna magwanganyijiwa?” ²⁷ Sarevidaa'nyi Pitai kwaasi ayina widina “Aawa.” Widina yakegaa' yime'nya'bi' kukuraayai jaka dina ya'.

Ga'maaniyai Paailatimyaba Jizaazai daavake'nesi.

(Matyui 27:1,2,11-14; Maaki 15:1-5; Luki 23:1-5)

²⁸ Sarevidaa'nyi Kaayapaazare angevidaa'nyi Ga'maaniya naangere anga kotiyavina Jizaazari makuna. Sagaa' byaaka mena yakegaaki. Jizaazari makuna yeva Juyara dina “Ga'maaniyaraavire anga kotiyavina wilawaaji nemi kimaakeina nyima'naadika! Aawa. Pari'ma'munne tika naade'na,” deva kotiyavi mwilaawie'. ²⁹ Sarevidaa'nyi mwasawi daavesawinna A'mwe Paailati walyuna yaka

yíwaara'na “A'mwe darína kotiyaví be kayaa'nanya'na dīvanigatavaka?”

³⁰ Kumí ja'nawidína “Sai kayaa'nanya' myají kwají gīmīnyawinna mamakabi kyaadika!”

³¹ Sarevidaa'nyí Paailatí wídína “Sahwaihi makwalyuna yapi sarinna kíwinya'na kotiya' a'mwerí jila!” Juyara wídína “A'mwe Romiyaihi kíwinya' nedakadiví! ‘Kotiya'na aane pwai kwari maramakipinera!’ Sara nedadivisaihiyí.”

³² Sīnnawí Jizaazai “A'mwera nīmīnyí sara kyapijí balideinyí,” wídakesí. “Gamire yagaala sa' yune'na nebulya'na yima'nana!” Gotiyai kadozí Juyara sara wídína yesasí.

³³ Sarevidaa'nyí Ga'maaniyaraavire anga kotiyaví Paailatí ayína wílina yaka Jizaazarína dameraaví wídína “Dalyamaraawila!” Sara wídína yaka Jizaazarí wídína “Juyaraaví maremwaaidinya Kingiyaigí daaka?” ³⁴ Jizaazai ja'nawidína “Nyíwara'mwaanya' gīnnya yagaalya' dīngaka? Pwara nīmīnyina githiwaasa' dīngaka?” ³⁵ Paailatí ja'nawidína “Juyainyí daaka! Nīmīnyawinna gīnnya yisavaakiyara Juyarají Gotiyarína yira'divita naangerají sara gīmarīmwaihíwaa'. Berí! yagíneiginaka!” ³⁶ Jizaazai ja'nawidína “Kwaaka davakí nīmire maremwaalyabwi maayasira. Kwaaka davakí maremwaaidinyainyí kwají nyīmīdīdivisara dīna ‘Juyara sahwari nagalalīmwabíka!’ kadipíka! Sara dīna yipíjí kwají Juyaraaví mala karabithíka! Sare' Kwaaka davakídaa'nyí nīmire maremwaalyabwi mwarika.” ³⁷ Sarevidaa'nyí Paailatí wídína “Nabaai, sareví maremwaaidinya Kingiyaigí

daaka?” Jizaazai ja'nawidina “Niminyina nyidiwaa ‘Kingiyaiginyi.’ ‘Nebulyabwina wikalakurakima!’ dina yena niwaa' nyimaarakeinyi, Kwaakevaki yima'neinyi. Sareinyi nimire wawinyasi. Gazaizai nebulyavina wivu'nadei nimire maanguraayavi kadika nyu'nivanikelyira.” ³⁸ Paailati widina “Nebulyabwi berivaka!”

Jizaazar+ tamakya'na Paailati widake'nesi.

(Matyui 27:15-31; Maaki 15:6-20; Luk+ 23:13-25)

Sagaa' mwasawi Juyaraayawinna Paailati ayina wina yaka widina “Mena yawirena dina yiwa. Sai kayaa'nanya myiwakelyi. ³⁹ Sa'na kiri' sarimirebwina Pari'ma'munnegaa' kalavuzari yagalya'ma'dinyainyi. Sarevidaa'nyi Juyaihire Kingiyari yagalya'mavijiwa? Simunya gara yawi'mwaa'?” ⁴⁰ Sarevidaa'nyi kumi jaka ayina widina “Aawa, sai mika! Aawa. Baravaazari nejaama!” Baravaazai sai kuka yipalamaa'delyi.

19

¹ Sarevidaa'nyi Paailati sara widina kya' aawilasara Jizaazar+ maarina yeva wila lannakesi sara tamina. ² Mena tamina yeva taanya lannaka kave ghiipaina yeva yamingaina yeva mwaaihi'nya lannake' gamire m'nyaginyavi yilakina. Gamire m'nyaginyavi yilakina yeva kwaabi'yivita wayaake' egwewaari yewaa'bwa'na yeva ³ gaminyawinna bina yeva kwaasi yagaala widina “Naangeigi! Yuyagaa' Juyaraavire Kingiyaigi dimwaala!” Sara widina

yeva kunnya araraalyajî gamîre sinnyavî jirî'bwaraanna ye'.

⁴ Anga mwasawîna Paailatî ayîna walyuna yaka kwala bwa'naanyavî wîdîna “Yîthaa, tamakya'na gamîre kayaa'nanya' mwari'. Nîmî birîna birîna yena gamîre kayaa'nanya' mwanganyîwa. Dahaa' ‘ “Paailatî gamînyî yîwetawakya' mabîramaariwaka,” yawîpîka! dena sarîmînyabanna makabîvanîge.”

⁵ Sarevîdaa'nyî Jizaazai mwaaîhî'nya lannake' yîlakîni'ke' kwaabîyîvîta wayaake' yewaa'bwa'nîkei mwasawîna walyuna. Mwasawîna walyuna kya' Paailatî kumînyî wîdîna “Yîthaanyîla! A'mwe dalaakana!”

⁶ Sarevîdaa'nyî Gotîyarîna yîra'dîvîta naangerajî damerajî tîna wanganeva jaka dîna “Yîsavîrî nîliya dîramo! Yîsavîrî nîliya dîramo!” Jaka dîna kye' Paailatî wîdîna “Nabaai, sarîmî maarapîrî yîsavî nîliya dîramyîla! Sare' dare'nesî. Nîmî gamînyî mabîramaariwa yîwetawakya'!” ⁷ Juyara ja'nawîdîna “Nemî kiwînya' kîni'nnakeine. ‘Gotîyarî Gawaalîvaangeinyîra,’ kwaasî sara nedîvanîke'na nemîre kiwînya' dara dîni' ‘Balana!’ ”

⁸ Sarevîdaa'nyî Paailatî yagaala sa' kadîka wî'nyîna yaka lîka naanga yîna yaka

⁹ Ga'maanîyaraavîre kotîangevî ayîna wîlîna yaka Jizaazarî yîwaara'na “Gawîdaasaigînaka?” Sara yîwaara'na kya' kîrî' Jizaazai maja'nawîjîna. ¹⁰ Sarevîdaa'nyî Paailatî wîdîna “Nîmînyî manyîjîwaana? Jawîka! A'mwe naangeinyî, gîmîre wîlyabaai yaarîna kya'muri

dɪwode dɪragɪnya' kɪnɪnnakeinyɪ. Nabaai, 'Yisaviri niliya dɪramyɪla!' kuda'muri dɪvaide dɪragɪnya' kɪnɪnnakeinyɪra. Sare'na jawɪka!"

¹¹ Jizaazai ja'nawɪdɪna "Gɪmɪre dɪragɪnya' Sɪgunyavɪdaa'nyɪ Gotɪyai magɪzaayajɪ kwajɪ dɪragɪnya aane pɪrɪ' kɪrɪ' kɪnɪnnakeigɪ mamwaalyɪ kyɪdɪka! Sarevɪ gɪmɪnyawɪnna a'mwe kwai nyɪmakabɪwakei, kayaa'nanya naange' kɪnɪnnakelyɪra. Gɪmɪ kayaa'nanya maalɪke' kɪnɪnnakeigɪnyɪra." ¹² Sarevɪ

Paailatɪ kadɪka wɪ'nyɪna yaka dɪna "Jizaazari makwaasɪma!" Dɪna yaka yaamɪjɪ yaamɪjɪ yɪna. Yaamɪjɪ yaamɪjɪ yɪna yadaa'nyɪ kɪrɪ' Juyara jaka naanga wɪdɪna "Sari makwaasɪja! Romɪyaihɪrɪ yɪhɪmaremwaaide Sizaareigɪ mɪka! Gazaizai dada 'Kingɪyainyɪ,' a'mwe sai Sizaarɪna yɪkamaangelyɪra!"

¹³ Sarevɪdaa'nyɪ sa Paailatɪ kadɪka wɪ'nyɪna yaka kusawɪdaa'nyɪ mwasawɪnna Jizaazari wɪlamaraawɪna yaka kotɪya' yadei yawɪbwa'derɪ namwaalyɪsavɪ walamwaaina. Saba Angwaata Silaange' wo'nɪkesɪ. Nabaai, Yɪvɪruyagaalya' Gavaatha wo'nɪkesɪ. ¹⁴ Sagaa' Pari'ma'munne wona sagaaki. Sagaa' kumɪre yuya yovɪrawakyagaa'. Sɪrɪgwajahaa' aya kɪgaa' yɪma'nakegaaki. Paailatɪ walamwaaina yaka Juyaraavɪ wɪdɪna "Yɪthaanyɪla! Dai sarɪnnya Kingɪyalyɪ." ¹⁵ Sarevɪdaa'nyɪ

sahwara jaka naanga wɪdɪna "Dɪramakya! Dɪramakya! Yisaviri niliya dɪrama!" Paailatɪ yɪwaara'na "Sarɪnnya Kingɪyari yɪsaviri niliya tamɪdei daaka! Sara danyɪdɪwaava!" Gotɪyarɪna yɪra'dɪvɪta naangera ja'nawɪdɪna

“Nemire kingiya pwai mamwaalyi!. Sizaai gavei kingiyalyira.” ¹⁶ Sarevidaa'nyi sagaa' Paailati “Sari yisaviri niliya tabika!” daka wimwangimwaaihina ya'.

Yisaviri Jizaazari niliya tamesa'nesi.

(Matiyui 27:32-44; Maaki 15:21-32; Luk 23:26-43)

Sarevidaa'nyi aawilasara yisawa' Jizaazari wimaarina yeva Jizaazari makwalyuna. ¹⁷ Jizaazari makwalyuna yadivi' sai gannya yisawa' yikwa'na yaka Gileminyaginyaba wo'nikewinna makuna. Saba Yiviruyagaalya' Golihota wo'nikesi. ¹⁸ Makuna kya' aawilasara yita saviri niliya tamina. Nabaai, yisawaari a'mwe pwaraari niliya tamina yesaraalyi. Jizaazare aangasimagi pwar' niliya tamina, kwanaamimagi pwar' niliya tamina. Tinnyaba Jizaazai. ¹⁹ Paailati pikarya yida'na yaka aawilasaraavi widina “Jizaazari yisavi yagaala da' jilakyila!” Sara widina kya' sara yilakina. Dara pikarya yida'na “Jizaazai, Naazareti mwaalyai Juyaraavi maremwaaidei Kingiyai.” ²⁰ Sara yida'nike' yisaviri Jizaazari niliya tamesaba Anga Jeruzaalemi aya kiba wara'. Jeruzaalemi maalikeba wa'nike'na Juya kwalaalyara pikarya sa' tinna wanganna. Pikarya sa' Yiviruyagaalyasi Romiyaraavire yagaalyasi Girikiyaraavire yagaalyasi yida'nikesi. ²¹ Sarevidaa'nyi Gotiyarina yira'divita naangera Juyara Paailatimi widina “ ‘Juyaraavi maremwaaidei Kingiyai,’ pikarya myavikaryinnera! Aawa.

Javîkarya! ‘A'mwe dai wîdadelyî “Juyaraavî maremwaaîdînyainyî Kingîyainyîreva.” ’ ”

²² Paailatî ja'nawîdîna “Nîmî mena yîda'mwe' yîda'mwana! Mi'nanyîra.”

²³ Yîsavîri Jîzaazarî nilîya tamevevîdaa'nyî aawîlasara Jîzaazarî baazî'ma'nya saza maarîna yeva yanga munne'. Pîwa' pwai maarîna, pîwa' pwai maarîna, aawîlata pwaraai pwaraalyara maarîna. Nabaai Jîzaazarî baazî'ma'nya saamînaange' maarîna. Baazî'ma'nya sa' yavîkaryagaa' magîpwalyakesî. Sa' yuneba tîlayalawakîna yakesî.

²⁴ Sarevîdaa'nyî baazî'ma'nya saamînaange' maarîna yeva dînyîna “Baazî'ma'nya da' yuneba gave pîrî'na mîwî'nîke' lihîvalawaajî namunnaadîka! Aawa. Nemi' saatuya wasî'nyî wasî'nya yawaajî saatuya' tewaanya wavîlavajai maaradesî.” Sare'na Gotîyai “Nîmîre bukuya' dînîke' nebulya'na yîma'nana!” kada' sara ye'. Gotîyare bukuya' dara dînî'

“Nîmîre kwaabîhannya yîvîta saza yanga munne'.

“Nîmîre baazî'ma'nya'na saatuya' yeva wavîlavakei maara'.”

Sarevîdaa'nyî aawîlasara sara ye'.

²⁵ Yîsavîri Jîzaazarî nilîya tamesaba maalîkeba ganaangesî ganyîwanaangesî Kîlopaazare balaange' Maariyaasi Maahîthaala mwaalya' Maariyaasi sa daavîna. ²⁶ Sarevîdaa'nyî Jîzaazai tînna wanganna. Nabaai gamîrerîna tewaanya wîvu'nakei saba daa'dî'nyî tînna wanganaka ganaangevî sarîna wîdîna “A'mwe'gî, yîthaa, sai jîvwaaîvaangelyî.” ²⁷ Wîdîna yaka gannyarî

widîna “Yîthaa! Dahaa' a'mwe sa' ginnya gwaangesi.” Sara widîna yakegaa'daasi gannya angevi a'mwe savi maremwaala'.

Jizaazai balake'nesi.

(Matîyui 27:45-56; Maaki 15:33-41; Lukî 23:44-49)

²⁸ Sagaa' Jizaazai dara yawîrake' “Yuya mena daaka!” Sara kada' Gotiyai “Nîmîre Bukuya' dîni'ke' yuneba nebulya'na yîma'nana!” kada' widîna “Aalya'na mijîka nyîwaka.” ²⁹ Saba maa'gulyavi waainiya kayaa'nanya' yî'nîkesi. Sarevîdaa'nyî waainiya savi saalaalyaviya jî'mînya' paihîna yeva yîta yîzopiya taanyavi jî'mînya' baazi'makuna yeva Jizaazari maryîki dîhaihîrakîna. ³⁰ Sarevîdaa'nyî mi'na dîhaihîrakîna yesagaa' Jizaazai waainiya' yaamijî nyîna yaka widîna “Yuya menanyîra.”

Gannya mînyagînya' tuta'naraka gannya kuryai wîmwangîmwaaihîna ya'.

Jizaazari ligîligîsaba aawîlasai sîramînya saamînya' livapîna yake'nesi.

³¹ Sagaa' Juyara kunnya Kwazaakegaa'na yovîrawakîna yadîvîsagaaki. Nabaai, Kwazaakegaa' sagaa' Pari'ma'munnegaa' Kwazaaka naangegaaki. Kwazaaka naangegaa'na Juyara “Nemîre tewanyagaa' yîsangi gîlaayara warîna nyîpîdîka!” dîneva Paailatîmî yîwaara'na “‘A'mwera baibîka!’ nediwaanyaraavi sivîla kayaaka karîngîrawaaji yarai kabalapîri yîsangi'daasi makwalîna yaadeina daaka?”

³² Paailatî “Yo,” wîdakevîdaa'nyî aawîlasara bîna. Pîrî' darestî. Jizaazaryaba a'mweraari

tameta pwar+ sivilyaraai tingi'na, pwar+ sivila tingi'na. ³³ Sivila tingi'na kye' piri' daresi. Jizaazaryawinna bina yeva dara wangesa! "Ai, a'mwe sai mena davaimwaka!" Sara deva gamire sivilyaraai maringirina. ³⁴ Aawa. Gamire sivilyaraai maringiri kye' kiri' aawilata pwai Jizaazare ligiligisaba siraminya saaminyasi livadaakuna. Siraminya' livadaakuna kya' yime'nya'b+ tawesi aalyasi bwalaravaawina ya'. ³⁵ Sarimi wi'nipine'na nimi tinna sara wangane sara yihizal+kurakiwa. Jal+kurakya sa' nebulyasi. "Sarimi dilimwagyla!" dena sainyi dara yawi'mwa "Nimi nebulya'na yihithivanigesira." ³⁶ Sare' dare'nesi. Sinnawi Gotiyai "Nimire bukuya' dinike' yune'na nebulya'na yima'nana!" kada' aawilasara sara ye'. Dara dini' "Gamire yaginya aane piri' kiri' maringiri yadesira." ³⁷ Nabaai Gotiyare Bukuya gabinyaba dinyina "A'mwera pwar+ siraminya saaminyasi livadaakwapiji sari tinna wangabi'delyi." Sara dinikesi.

Jizaazai gilaayar+ wakagilya'nesi.

(Mat+yui 27:57-61; Maak+ 15:42-47; Luk+ 23:50-56)

³⁸ Sa mena yesagaa' Paailatimyawinna a'mwe naangei Jozepiyai Aarimathiya mwaalyai wina yaka yiwaara'na "Jizaazari gilaayar+ maarijiwana?" Jozepiyai sai Jizaazarei mwaalakelyi. Kiri' Juya naangera Jizaazareraavina sinna tika widavakevina lika ya'. Sa'na Jizaazarei mwaalake' lika yulyarakei. Sagaa' navika mwaalina yakei yiwaara'na

“Gilaayari maarijiwana?” Sara yiwaara'na kya' Paailati widina “Yo, gilaayari dulamaraawa!” Widina kya' Jozepiyai wilaawina yaka gilaayari makabina. ³⁹ Makabina yadaa'nyi A'mwe Nikothimaazai Jozepiyalyi bina. Nikothimaazai sai sinnawî sawîsavî Jizaazaryawîna angyîrî'maata yakelyî. Sai marazînanya wabatîrînya' makabina. Marazînanya mesî marazînanya aloziyasî yegîrîlya' gilaayaraavi yîdîvîsa' Juyara. Nikothimaazai marazînanya taanga teti (30) kilohîraamî makabina. ⁴⁰ Sarevîdaa'nyi Jozepiyalyi Nikothimaazalyi saraai Jizaazare kîlaakejikî marazînanya' wakîna yadi' kwaabîhannya saamînyajî pwiýîna yagi. Sara yîna yagîlyabwi Juyara kumîre gilaayaraavi wakya'ne'na sara yadîvîsabulyî. ⁴¹ Yîsavîri Jizaazari niliya tamîna yesaba yîwawînya' warîkebera. Yîwawînyavi gilaayari wakya'ne' simaange' warî'. Sagaa' simaangevî gilaaya aane pwai kwarî mwaki yadîvîsasi. ⁴² Sarevîdaa'nyi saba simaanga mudîke' warîke'na, mwanyavi Juyaraavîre Kwazaakegaa'na saraai Jizaazari kave wilakîna yagîlyaraalyî.

20

Simaanga kune' wa'dîsiyavînesî.

(Matîyui 28:1-8; Maaki 16:1-8; Lukî 24:1-2)

¹ Wikîyavîne yîrika sinnawînya' Saadehaa' yîrikunyagaa' jîhînyavi simaangevîna Maahîthaala mwaalya' Maarîyaa' wîna yaka tinna dara wanganake' “O, Nîwaava,

simaadikuryavi silaange' davisinadaavika!"

² Sarevida'nyî kaanyave'na kaanyave'na wîna. Jizaazarî gannya pwarîna tewaanya wîvu'nadei salyî Saaimoni' Pitalyî saraaryawî yî'ma'na yaka saraarî wîdîna "Simaangevida'nyî pwara Naangerî makwalyuna kyîwaa' nemi yawî'na 'Gazîyaka? Gîlaayarî gazi makuwaatabanaka?" "

³ Sarevida'nyî Pitalyî Jizaazare pwalyî ya'ma'na yagîla walyaabîna yagîla simaangevîna yarai wîna. ⁴ Saraai kaanyave'na wodaakîlyî kîrî' Jizaazare pwai kaanyave'na naanga yaka Pitari' wawîla'na yaka sinnawî simaangevî yî'ma'na. ⁵ Mi'na yî'ma'na yaka walaruta'nyîna yaka kusawî kwaabîhannya saamînya tînna wanganna. Tînna wanganna yaka kîrî' kusawînna mulaawîna. ⁶ Kusawînna mulaawî yadaa'nyî dîvidaasi Saaimoni' Pitai bîna yaka simaanga kusawînna yarai bulaawîna. Yarai bulaawîna yaka savî kwaabîhannya saamînya wa'dîsî tînna wanganna. ⁷ Nabaai Jizaazarî minyagînyavi kwaabîhannya saamînya' gwavaaihî'nîke' tînna wanganna. Kwaabîhannya sa' kwaabîhannya saamînya pîningyaba mwari ya'. Aawa. Gabinyaba gwavaaihî'nîke' wa'dîsî tînna wanganna. ⁸ Pitai tînna wanganna yakevida'nyî sinnawî simaangevî Jizaazare pwai yî'mavakei sagaa' wîlîna yaka tînna wanganna yada Jizaazarîna lîmwanna ya'. ⁹ Sare' dare'nesî. Sagaa' Gotîyare Bukuya' dî'nîke' "Sai mena balori ayîna dîkaavadelyîra," sa' dî'nîke'na kîrîmî myawîri yagîlyaraalyî. ¹⁰ Sarevida'nyî kîrînnya angevîna saraai Jizaazareraai ayîna wîna yagi.

Maariyaa', Maahithaala mwaalyayaba Jizaazai daavina yake'nesi.

(Matyui 28:9,10; Maak 16:9-11)

¹¹ Maariyaa' ayina bina yaka simaangevi mwasawi daavina yaka kinna dina. Kinna kuna dina yadevidaa'nyi walaruta'nyina yaka simaangevi kusawi tinna wanganna yaka ¹² Gotiyare mamaaya ejeliyaraari tinna wanganna. Ejeliyaraai baazi'ma'nya yaaka baazi'ma'nagileraai. Jizaazari kilaakeji' warakeba saraai walamwaaina yagi. Minyaginyayaba pwai walamwaaina, siwilyaraaryaba pwai walamwaaina yagi.

¹³ Maariyaa' tinna wanganna kya' saraai wiidina "A'mwe'gi, kinna baa'na divanigina?" A'mwe' wiidina "Piwinna nimir Naangeri makuna kiwaa' kumi wakina yiwaasa'na nimi mwanganyiwe'nyi."

¹⁴ Sara wiidina yakegaa' ginyima'nyina yaka saba Jizaazai daa'disiyari tinna wanganna ya'. Sa' kiri' dara myawiryake' "O, Jizaazai daaka!" ¹⁵ Sa'na maji kya' Jizaazai wiidina "A'mwe'gi, kinna baa'na divanigina? Aarina bi'di divanigi?" Wiidina kya' a'mwe' yawi'na yada "Yiwawinya' yadelyi," wiidina "A'mwe naangeigi, gimi damakuwana? Sara yagina nyidana! Yinagaavaihaba sabanna wakuwana.' Sara kanyida'gizi sawinna wawa'muri maraawide'nyi nimi."

¹⁶ Jizaazai wiidina "Maariyaa'!" A'mwe' gaminyina ginyiwanna yaka "Jizaazalyi," daka Yiviruyagaala wiidina "Raavoni!" Yagaala sa' "Nyijiwaakadinyaigi!" dinikesira. ¹⁷ Jizaazai

widîna “Manyîgalalîmwadînnêra! Sare' dare'nesî. Nîmwaryawîna mena ayîna yimwaaweinyî daaka! Sa'na nya'mweraayawî nîmînyîne widîna ‘Nîmwaryawîna ayîna yîlaawideinyî. Sai Nîmaamaangelyî. Sai Sîrînimaaangelyî. Sai Nînnya Gotîyalyî. Sai sarîmîre Gotîyalyî. Saryawîna ayîna yîlaawideinyî,’ sara duthana.”

¹⁸ Maariyaa' Maahîthaala mwaalya' bîna yaka gamîreraavî widîna “Ai, Naangerî tîna wangamwe'nyî,” widîna yaka Jîzaazai wîdake' sara widîna yakesîra.

Gannîyaraayawî Jîzaazai daavake'nesî.

(Matîyui 28:16-20; Maakî 16:14-18; Lukî 24:36-39)

¹⁹ Sarevîdaa'nyî Saadehaa' sawîsavi angevî Jîzaazarera yîkabîna yeva kaanya lokiya nayaa tihî'na. Juya naangeraavîna lîka yîna yadîvî' kaanya lokiya nayaa tihî'na ye'. Tihî'nyîna yadî'nyî Jîzaazai yîma'naabîna yaka kumînyaba daavîna. Tînnîyaba daavîna yaka widîna “Nya'mweihi, kwaamu'nanya' yîhwarana! Tewaanya dîmwaalyîla!” ²⁰ Sara widîna yaka gannîya a'araraalyawaalyî gannîya lîgîlîgisaba wîjîwaaînnîna ya'. Sarevîdaa'nyî gamîrera Naangerî tîna wanganeva yîlaaya naanga yîna. ²¹ Sarevîdaa'nyî Jîzaazai ayawî widîna “Nya'mweihi, kwaamu'nanya' yîhwarana! Nîmwai nyîdasaabakabaaîbî' sara yîhîthaasîdeînyîra.” ²² Sa' widîna yaka kumînyî pwa'nyî makuraasîna yaka widîna “Kuryai Tewaanyai sarîmînyî yîhîmwaalana!

23 Kyîhimwaalori sarîmî pwara kwaraavîre yîwetawakya wasî'na kyapîjî Gotîyai sara mena wasî'na yadelyî. Kwara pwaraavîre yîwetawakya kuna ja'nayîpîja' Gotîyai avaina mena ja'nayadelyîra.” Sara wîdîna ya'.

Jizaazalyî Tomaazalyî saraarînesî.

24 Kumînyabanna Jizaazai bakegaa' Jizaazarera sivîlyîraai ata purîdaasî pwaraalyai Tomaazai kumîjî mamwaalyîna. Mamwaalyai Tomaazai gîra'mîraalyai. 25 Sarevîdaa'nyî sai ayîna bîna kya' sahwara wîdîna “Naangerî tînna mi'na wangamworînera.” Wîdîna kye' Tomaazai wîdîna “Kwaasî nyîdîwaa'. Gamîre asawaarî nilîya tamwa'daata yîwihwaaryawaarî tînna mwanganyî yîwîja' yîwihwaarya sawaarî nînnya asai malakulayîwîja' gamîre ligîligîsaba nînnya asi malakulayîwîja' malîmwagyî yîdeinyî. Arîkawînyî.” Wîdîna ya' Tomaazai.

26 Wikîya ayawînyarîkî angevî ku-sawînna Jizaazarera ayîna yîkabîna yeva angevî bamwaaina. Nabaai Tomaazalyî mwaalina. Sagaa' kaanya yuya lokiya nayaa tihî'nîkengî. Yuyara mwaalina yadapi kaanya tihî'nadî'nyî kîrî' Jizaazai yîma'naabîna yaka tînnyaba daavîna yaka wîda' “Nya'mweihi, kwaamu'nanya' yîhwarana!” 27 Sara wîdaka Tomaazarî wîdîna “Davî gînnya asai daki! Nîmîre asîraarî tînna dînyangana! Gînnya asi yîwîbwa'na ya'gîzî nîmîre ligîligîsaba dînyulakaa! Nîmî kwaihwaainakeinyîna kuna manyîlîmwagyadînyaigî mamwaaidînna! Aawa. Nyîlîmwadînyaigî dîmwaala!”

28 Tomaazai wi'nyina yaka ja'nawidina
 “Ninnya Naangeiginyi. Ninnya Gotiyaiginyira.”
 29 Jizaazai widina “Tinna nyanganagina
 danyilimwamwaa? Pwara tinna manyanganyev-
 era kibanna nyilimwamwaa'. Sarera yilaaya
 naanga yadivi' tewaanaanga winikeraavi
 Gotiyai wimwaaihaderera.” Jizaazai sara widina
 yakelyi.

Bukuya da'yida'nike'nesi.

30 Sarevidaa'nyi piri' daresi. Bukuya davi
 Jizaazai yijiwaainya saji tewaanya saji yakengi
 yida'mwa. Gannyaraayaba Jizaazai naanga
 piniji tewaanya piniji kwalaalya yina ya'.
 Sangina bukuya davi myidayi yiweinyi. 31 Piri'
 daresi. Sara yida'mwe yawi'na yadi “Pwara
 yagaala da tinna wanganapiri dara limwabika!
 'Jizaazai Kiraazitiyalyira. Gotiyai Jizaazari
 dahilakakelyira. Yithaa, Jizaazai Gotiyare
 Gawaalivaangelyira.' 'Sara limwabika!' dadi
 yida'mwa.” Nabaai yida'mwe yawi'na yadi
 “Sahwara sara limwaga'divi' yuyagaa' gamire
 yayavi Jizaazarine gaalyabwi kininnakera
 mwaabika!” Sara dina yadi bukuya da'
 yida'mwa.

21

*Jizaazai gamirera ata yuyi ata puridaasi
 pwaraalyaraavi wijiwaainnake'nesi.*

1 Sa mena yima'nakegaa' divi Aalibunya
 Taaiviriyaazavi Jizaazai gannyaraavi ayina
 wijiwaainnyina. Dara wijiwaainnyina yakesi.

2 Saaimoni Pitalyi Tomaazai gira'miraalyiyalyi

Nataanyali Kwaaka Galili Anga Kena mwaalyalyi Sevathiyari gawaali vaangeraalyi Jizaazare pwaraalyi sara yikabina yeva aalibunyavi mwaalina. ³ Mwaalina yadapi Saaimoni Pitai pwaraavi widina “Jawinya maarya'neinyi wideinyira.” Sara widina kya' kumi widina “Gimiji wawaana!” Sarera wina yeva aalyavi sipiya' yila'disi yilamwaaina. Yilamwaaina yeva sawita yuyavi jawinyanne giya wasi'wasita yadaapi jawinya aane pwai kwai mabwalaminaawi yina. ⁴ Mabwalaminaawi yadaa'nyi nyilyai gaai byilyiri'daasiyagaa' aalimaangevi Jizaazai daavina. Jizaazai daavina yadi'nyi kiri' gamirera dina “Mudikelyi. Jizaazai mika!” ⁵ Sarevidaa'nyi Jizaazai widina “Kaimiraayaihi, jawinya aane piri' kiri' kininnakeihi daaka?” Kumi ja'nawidina “Aawa.” ⁶ Sai widina “Sipiyavi aangasimagi jawigilya' marasi'na yapiri jawinya bwalaminaapi'dengi.” Sarevidaa'nyi aangasimagi jawigilya' marasi'na yeva jawinya naanga naanga minnike'na sipiyavina ayina mamwagi'nyi yipinesi.

⁷ Sarevidaa'nyi Jizaazari gannyarina tewaanya wivu'nakei Pitari widina “Naangelyi.” Sarevidaa'nyi Saaimoni Pitai “Naangelyi,” kadika wi'nyina yaka yarai baazi'ma'nyina ya'. Sare' dare'nesi. Baazi'ma'nya yirainakei kunei mwaala'. Sara yaka aalibunyavi dikwosi'na. ⁸ Aalyavi dikwosi'na kya' sipiyavi Jizaazare pwara yilamwaaina yeva, jawinya minnike' mwagi'nyina yadaapiji aalibumaangevina sipiya' makuna. Sare' dare'nesi. Kwaakevidaa'nyi etaba mi'.

Aawa. Mitaaya 100 (waani aadireti) sipiya' makuna. ⁹ Sarevida'nyì maangebaari sivila paihi'na yeva wapaasi dikwaagidikevi jawinya piraayakeji sa tinna wanganna. ¹⁰ Tinna wanganna kye' Jizaazai wida'na "Jawinya ma'mwaata pini dimakabyila!"

¹¹ Sipiyavina Saaimoni Pitai wina yaka aalimaangevina jawigilya' mwagi'namaa'na. Gilya savi jawinya naanga minnyina. Jawinya 153 yuya sa minnyina yakengi. Jawinya naanga naanga sa minnaka kiri' gilya' mamumuniryakesi. ¹² Pitai gilya' mwagi'namaa'na kya' Jizaazai wida'na "Kaajila! Wapaaya dinyila!" Gamirerajiya aane pwai kwai yawi'na "Naangelyi," yaka "Aaihwaiginaka?" diraginna myiwaarayi, navika mwaalina. ¹³ Navika mwaalina yadisi sangyawinna Jizaazai bina yaka wapaaya maarina yaka wijaavina ya'. Nabaai jawinyaji wimaarina ya'.

¹⁴ Sare' dahasaai dahaa' Jizaazai gannyaraavi wijiwaainnakelyi. Mena balakei ayina dika'na yaka dahasaai dahaa' gannyaraavi wijiwaainnyina yakegaaki.

Jizaazalyi Pitalyi saraarinesì.

¹⁵ Sarevida'nyì mena nesagaa' Jizaazai Saaimoni Pitari wida'na "Saaimoni, Jonimireigi, a'mwe daraavi niminyina tewaanya wivu'nivani'. Gimire givu'nadevwi sahwaravirebwi davi'la'manika?"

Pitai wida'na "Naangeigi, yo, gimì mena yawi'mwaa 'Pitai niminyi nya'mwelyira.' Sara yawi'mwaanyasi."

Jizaazai widina “Nimire sipizipiya maalikeraavina wapaaya duzaama!”

¹⁶ Widina yaka pigasaai Jizaazai widina “Saaimonⁱ, Jonimireigⁱ, niminyina tewaanya gⁱvu'nivanikeigⁱ daaka?” Widina kya' “Yo, Naangeigⁱ,” Pitai widina “ ‘Pitai nya'mwelyi,' mena yawi'mwaanyaiginyi.” Jizaazai widina “Nimire sipizipiyaraavi dimaremwaala!”

¹⁷ Dahasaai dahaa' Jizaazai widina “Saaimonⁱ, Jonimireigⁱ, nimi ja'mweinyi daaka?”

Dahasaai dahaa' Jizaazai “Ja'mweinyi daaka?” widake'na Pitai kale wiadaa'nyi widina “Naangeigⁱ, yuyangina yawi'mwaa. Nabaai ‘Pitai nya'mwelyi,' sara yawi'mwaanyaiginyi.”

Jizaazai widina “Nimire sipizipiyaraavina wapaaya duzaama!” ¹⁸ Naanga nebulya'na githivanige. Miginyaigⁱ mwaalaginegaa' ginnya munnaanya' marina yadi ‘Yuyawinna wima!’ dina yadi sawinna wawaginyaiginyi. Sare' yadi kiri' neigⁱ jima'nadehaa' ginnya asiraai yiwibwa'nyina kya'giri pwara giminyi wila pwiya'na gyapiji ‘Sawinna mwiwinera!’ yawi'dinyawi sawinna makuna gyipi'deiginyi.” ¹⁹ Sa' Jizaazai widake' dara dina “Pitai sara balina kyori sare'na Gotiyai byaannakei yima'nadelyira.” Pitari widina “Dinyimidinaama!”

Jizaazalyi gamire pwalyi saraarⁱnesi.

²⁰ Pitai gⁱnyiwannyina yaka dusimagi Jizaazare pwari tinna wanganna. Sarina Jizaazari tewaanya wivu'nakelyi. Sai kigaa' wapaaya tika nyina yesagaa' Jizaazaryaba

walamwaainike', Jizaazari kave yiwaara'na
“Naangeigi, giminyi yikamaangeraavina
givwaridaakwodei aaihwilaka?” sara yakelyi.

²¹ Sarev+daa'nyi Pitai tinna mi'na wanganna
yaka Jizaazari widina “Naangeigi, diwaanya'na
a'mwe sarina berivaka?”

²² Jizaazai widina “Nimi sarina yawi'na
'Kaanya ayina bidehaa'na sai kuna
yemwaaladelyi.’ Sara yawi'na yiwija' gimire
wawinya' daaka! Sarebwina madinneiginyi.
Dinyim+inaama!”

²³ Jizaazai sara widakev+daa'nyi neya'mwera
dara d+nesa' “Ai, Jizaazarei sai mabalyi yadei
daaka!” Sara kade' kiri' sa'na Jizaazai maji “Ma-
balyi yadelyi,” Aawa. Maji yaka widina “Nimi
sarina yawi'na 'Kaanya bidehaa'na sai kuna
yemwaaladelyi.’ Sara yawi'na yiwija' gimire'
daaka!” Sara widina yakelyi Jizaazai.

²⁴ Jizaazarei sai dangina nejalikurakivanike',
nabaai sai yagaala da yida'na yakelyi.
Gamire wijalikurakyabwina nemi yawi'mwo
“Nebulyasira.”

Mi'nanya'nesi.

²⁵ Yithaa, Jizaazai yake pini kwalaalyangine
yagaala sa warikengi. “Yagaala yuya
sa pikarya yida'na yiwiji kwaji Kwaaka
yuyavaki maalikeba bukuya mwaki kyipidika!
Bukuya naanga naanga kwaradikengi.” Sara
yawimweinyi.

**Yipma Genesis and New Testament
Genesis and The New Testament in the Yipma/Baruya
language
Buk Stat na Nupela Testamen long tokples Yipma long
Niugini**

copyright © 1993, 1994 Wycliffe Bible Translators, Inc.

Language: Yipma (Baruya)

Translation by: Wycliffe Bible Translators

Video recording © The Jesus Film, a project of Cru.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

PDF generated using Haiola and XeLaTeX on 11 Nov 2022 from source files dated 9 Oct 2020

ef60f748-49e3-5ee0-8e6d-a25b74b7a93c